

ሌዌታ ማጻፋ ጊዶ ቆፋ

ሌዌታ ማጻፋይ በኒ ኢስራኤል አሳስ ዲዛ ጸሳስ ጎይኖ ዋጋ ጊሻሲኔ ኢስታ አማኖ ዋጋታ ጊሻስ ሄሳቶካ ሄ ዋጋታ ኦሶን ፖላና አላፊቴሌ ኢስታስ ዲዛ ቄሴታ ጊሻስ ዮቴስ። ሄ ማጻፋስ ዋና ቆፋይ ጸሳ ጌሻቴላ ጊሻስ ዮቶኔ ሄሳቶካ ጸሳ ዴሬይ ሃይሳ ጊሻስ ኢስራኤል ጎዳራ ማታ ጋይቶቴሌ ዳና ማላ ኢስቲ ኢዛስ ዋስቲ ዋስቲ ጎይናናኮ ኢስታስ ቢርሺ ዮቴስ። ማጻፋዛ ጋርሳን ኬሂ ኤሬቲዳ አዛዘታፔ ኢሶይ፣ ዬሱሲ ኦራላ ጫቆ ማጻፋን፣ «ናሞኣንሉ ባይራ አዛዘ» ጊ ሱንሊዳይሲ ሼሞፖ 19:18 ቦላ ዲዛይሳ፤ ሄሲካ፣ «ኔኒ አሳ ኡባ ኔ ሁኤ ማላ ሲቃ» ጊዛይሳ።

ሃ ማጻፋይ ኦይኪዳ ኩሜላ ቆፋ

ሙጹዋታኔ ያርሾ ዋጋ 1:1—7:38

ቄሴቴላን ኣርኔኔ ኢዛ ናይታ ሹሜቴላ 8:1—10:20

ጌሺኔ ቱና ሚሽ ቃሴ ጌሾ ዋጋ 11:1—15:33

ናጋራ ዲሳ ጋላስ 16:1-34

ዲማቴሊኔ ጎይኖ ዋጋ 17:1—27:34

ጸጌቲዛ ያርሾ

¹ ጎዳይ ጋይቶቴላ ዲንካኔዛ ጊዶን ዲሼ ሙሴ ጳይጊዲ ሂዘጊ አዛዘዴስ፣

² «ኢስራኤል አሳይ ጎዳስ ያርሾ ሺሺዛ ዋዴ ኢስቲ ናጋና ዋጋይ ሃይሳፊ ካሊዛይሳ፤ ኢሲ ኢሲ አሲ ሚዛፔ ጊዲን ዶርሳፊ ዋይኮ ዴይሻፊ ጊዲን አይ ቆሞ ያርሾካ ሺሺዛ ዋዴ፣

³ ሄሲካ ሚዛፔ ኢሳ ጸጌቲዛ ያርሾስ ሺሻናስ ኮይኮ ኢሲ ቦሬይካ ኢዛ ቦላ ባይንዳ ሚርጎ ቦራ ዶሪዲ ኤሆ፤ ሂስቲኮ ኢዚ ጎዳ ኡፋይሲዛ ያርሾ ጊዳና ማላ ጋይቶቴላ ዲንካኔዛ ፔንጌን ሺሾ።

⁴ ጸጌቲዛ ያርሾ ሺሺዛዴይ ባ ሺሺዛ ቦራ ሁኤ ቦላ ባ ኩሼ ዋሉ፤ ሄ ያርሾዚካ ኢዛ ናጋራ ዉርሳናስ ጎዳይ ኤኪዛ ሎኦ ያርሾ ጊዳና።

5 ሄሳዳይ ሚርጎዛ ሄን ጎዳ ሲንላን* ሹኮ፤ ሂስቲኮ ኣርኔ ዘሬላታፕ ጊዲዳ ቄሴቲ ቦራዛ ሱላ ጎዳስ ሺሼቶ፤ ጋይቶቴላ ዲንካኔን ጌሊዛ ፔንጌ ባጋራ ዲዛ ያርሾ ያርሺዛሶዛ ቦላ ላንቄራ ዩዩ ኣቆናሰ ሱላ ወጹቶ።

6 ሄሳፌ ጉዬ ሄ ያርሾዛ ሺሺዛይሲ ሄ ሹኬቲዳ ሜሄዛ ጋልባ ሾቂዲ ኬሶ፤ ኣሾዛ ቆሞን ቆሞን ቃንጾሬሶ።

7 ቄሴ ኣርኔ ዘሬላ ጊዲዳ ቄሴቲ ያርሾ ያርሺዛሶዛ ቦላ ሚላ ጎጲዲ ታማ ኤሌቶ።

8 ቄሴዛ ኣርኔ ዘሬላ ጊዲዳ ቄሴቲ ሄ ሜሄዛ ኣሾዛ ቆሞን ቆሞን ሻኪዲ ሁኤዛኔ ሃንዳዛ ጉጂዲ ያርሾ ሺሺዛሶን ኮሬቲዳ ሚላ ቦላ ወሌቶ።

9 ሄ ያርሾዛ ሺሺዛይሲ ሄ ሜሄዛ ቃንላ ኣሾዛኔ ጉዬ ጌዳታ ሃላን ሜጮ፤ ቄሴዚ ያርሾዛ ኡባ ያርሺዛሶዛ ቦላ ጹጎ፤ ሃይሳ ማላ ታማን ጸጌቲዛ ያርሾ ሳዎይ ጎዳ ኡፋይሴሰ።

10 «ኢዛዳይ ባ ዶርሳፌ ዎይኮ ባ ዴይሻፌ ኢሳ ጸጌቲዛ ያርሾስ ሺሻና ኮይኮ ኢሲ ቦሬይ ኢዛ ቦላ ባይንዳ ጳርሾ ዎይኮ ኦርጌ ጊዶ።

11 ሄሳካ ያርሾ ሺሺዛሶዛፕ ፑዴሃ ባጋራ ጸሳ ሲንላን ሹኮ፤ ኣርኔ ዘሬላ ጊዲዳ ቄሴቲ ሱላ ኤኪዲ ያርሾ ያርሺዛሶዛ ቦላ ዩዩ ኣቆናሰ ወጹቶ።

12 ሄ ያርሻ ሺሺዛዳይ ሄ ሹኪዳ ኣሾዛ ቆሞን ቆሞን ቃንጲ ኬሲዳፕ ጉዬ ሄ ኦሶዛሰ ዶሬቲዳ ቄሴይ ሄ ኬሲዳ ኣሾዛ ኡባ ሁኤዛኔ ሃንዳዛካ ኢሲፌ ያርሾ ያርሺዛሶን ጎጹቲዲ ታማን ኤጲዛ ሚላ ቦላ ወላ፤

13 ኣዴዚ ሄ ሜሄዛሰ ቃንላ ኣሾዛኔ ናምኡ ጌዳታ ሃላን ሜጮ፤ ቄሴዚካ ሄሳ ኡባ ጎዳሰ ያርሾ ኦሊ ሺሺዲ ያርሾ ሺሺዛሶዛ ቦላ ኡባ ጹጎ፤ ሄሳ ማላ ታማን ጸጌቲዛ ያርሾ ሳዎይ ጸሳ ኡፋይሴሰ።

14 «ኢሳዳይ ጎዳሰ ጸጌቲዛ ያርሾ ካፎፕ ሺሻና ኮይኮ ሃራጹ ጪዬ ዎይኮ ዋናሴ ጌቲቲዛ ካፎፕ ጊዳናሰ ዳንዳዬሰ።

15 ቄሴዚካ ሄ ካፎዛ ኤኪዲ ጌዴ ያርሾዛሶ ሺሺዲ ካፎዛ ቆጴ ሚርቆ፤ ያርሾዛ ሺሺዳ ታማን ኢዛ ጹጎ፤ ሱሊካ ያርሾይ ኢዛ ቦላ ሺቁዛይሳ ሚሌራ ዲጌ ጸኬቶ።

16 ባሌዛኔ ቃንላ ኣሾዛ ዲማ ሻኪዲ ያርሾ ኢዛ ቦላ ሺሺዛሶዛፕ ኣርሼይ ሞኪዛ ባጋራ ቢዲንላ ቆላቲዛሶን ዩጌቶ።

* 1:5 ጎዳ ሲንላን ጌቲቲዛይሲ ጋይቶቴላ ዲንካኔን ጉሳ።

17 ቂፌታ ኦይኪዲ ናምኡ ኬሲ ጳልቂዲ ኣሾዛ ሙሉራ ሻኪ ዩጎንታ ዲሼ ያርሾ ሺሺዛሶዛ ቦላ ዲዛ ታማን ሙሉራ ጹጎ፤ ሄሳ ማላ ታማን ጹጌቲዛ ያርሾ ሳዎይ ጎዳ ኡፋይሴስ።

2

ካላ ያርሾ

1 «ኣይ ኣሲካ ጸሳስ ካላ ያርሾ ሺሺዛ ዎዴ ሊቆ ጳሌ ሺሻና ቤሴስ፤ ሄ ጳሌዛ ቦላ ዎጋራ ዛይቴኔ ኤጸኔ ጉጆ፤

2 ኣርኔ ዜሬላፌ ጊዲዳ ቄሴታኮ ኤኪ ዮ፤ ሄ ዎዴ ኢዛ ኦሶ ታራይ ጋኪዳ ቄሴይ ሄ ጳሌዛፔ ባ ኩጳ ኩሜላ ዛይቴዛኔ ኤጸኔዛ ኤኪዲ ዉሪካ ጸሳስ ሺቂዳይሳ ኤሪሳናስ ያርሾ ሺሺዛይሳ ቦላ ታማን ጹጎ፤ ሄሳ ማላ ካላ ያርሾ ሳዎይ ጸሳ ኡፋይሴስ።

3 ካላ ያርሾፌ ኣቲዳ ጳሌይ ኣርኔ ዜሬላፌ ጊዲዳ ቄሴታስ ኢሜቶ፤ ሄሲካ ጸሳስ ሺቂዳ ያርሾፌ ሻኬቲ ኤኬቲዳ ጊሻስ ሃራታፔ ኬሂ ዲማቴስ።

4 «ያርሾዚ ኡኬላ ኡኬቲዛ ባሼን ኡኬቲዳ ጊዲኮካ ኢርሾይ ቦሻንታዝ ጊዶ፤ ኢዚካ ዎጋራ ሚላ ዛይቴራ ዋላኬቲዲ ሊቆ ጳሌራ ኡኬቲዳ ቄሪ ኡኬላ ዎይኮ ዛይቴን ጊንዴቲ ኡኬቲዳ ኡኬላ ጊዳናስ ቤሴስ።

5 «ያርሾዚ ታማ ጮጮን ኮምፔቲዳዝ * ጊዲኮ ኢርሾይ ቦሻንታ ዎጋራ ሚላ ዛይቴይ ጉጆቲዲ ሊቆ ጳሌፌ ጊጌቲዳዝ ጊዶ።

6 ኔ ኡኬላዛ ባሴሬላዳ ኢዛ ቦላ ዎጋራ ሚላ ዛይቴ ጉሳዳ ካላ ያርሾ ሺሻ።

7 «ያርሾዚ ቄሪ ባሼን ኡኬቲዳ ኡኬላ ማላ ጊዲኮ ዎጋራ ሚላ ዛይቴይ ኢዛን ጉጆቲ ሙኑቂቲዳ ሊቆ ጳሌፌ ጊጊዳዝ ጊዶ።

8 ካላ ያርሾ ጸሳስ ኢሜቲዛ ያርሾ ሂሰታ ቄሴዛስ ኢማ፤ ቄሴዚካ ያርሾ ያርሺዛሶን ያርሾ።

9 ቄሴዚ ሄሳ ሄ ያርሾዛፔ ባጋ ኤኪዲ ኡባ ጎዳይ ኢዚ ሺሺዳይሳ ዩሺ ቆፓና ማላ ያርሾ ያርሺዛሶን ዲዛ ታማን ጹጎ፤ ሃይሳ ማላ ታማን ጹጌቲዛ ያርሾ ሳዎይ ጎዳ ኡፋይሴስ።

10 ያርሺሺን ኣቲዳይሲ ቃሴ ቄሴታስ ኢሜቶ፤ ሄሲካ ጎዳስ ሺቂዳ ያርሾፌ ሻኬቲ ኤኬቲዳ ጊሻስ ሃራታፔ ኬሂ ዲማቴስ።

* 2:5 ኮምፓ፡ ኮምፓ ጌቲቲዛይሲ ታማ ጮጮን ዎይኮ ቦንቆ ታማ ጋርሳን ካሊዛ ኡኬላ።

11 «ጎዳስ ጸጌቲ ያርሼቲዛ ካላ ያርሾራ ሸቂዛ ኢርሾ ጊዲን ወይኮ ኤስ ጊዲኮካ ኔ ታማን ጸጋናስ ቤሶንታ ገሻስ ኔ ጎዳስ ሺሺዛ ካላ ያርሾን ኡባን ኣይኮ ኢርሾይካ ኢዛን ጌሎፖ።

12 ላይላን ላይላን ካላ ሺሺዛ ዎዴ ኮይሮ ማጽቲዳ ካላፌ ጸራ ያርሾ ኦሊዲ ጎዳስ ኤኪ ዪቲ፤ ሄ ያርሾዚ ያርሾ ያርሺዛሶዛን ታማን ጸጌቶፎ።

13 ኣይ ቆሞ ካላ ያርሾንካ ማጺኔይ ጳዮፖ፤ ሄሲ ኔኒ ኔ ጸሳራ ጫቂቲዳ ጫቆ ቃላስ ማላታ፤ ሄሳ ገሻስ ኔ ሺሺዛ ካላ ያርሾ ኡባ ማጺኔራ ማልኢንላ ኦላ።

14 ካላ ሺሺዛ ኮይሮ ኣገናን ካላ ጸራ ኔ ሺሺዛ ዎዴ ጫጮቲዲ ሸጌቹቲዳ ቲያ ገደ።

15 ሃይሲ ካላ ያርሾ ጊዲዳ ገሻስ ኢዛ ቦላ ዎጋራ ሚላ ዛይቲኔ ኤጸኔ ጉጃ።

16 ቄሴዚካ ሄ ያርሾዛፔ ባጋ ኤኪዲ ኢዚ ጎዳስ ሸቂዳዝ ጊዲዳይሳ ኣኬኪሳና ማላ ዛይቲዛካ፣ ኤጸኔዛካ ኡባ ካላራ ኢሲፌ ጸጎ።

3

ኢሲፌቲላ ያርሾ

1 «ኣይ ኣሲካ ሳሮቲላ ገሻስ ባ ሜሄፔ ጎዳስ ኢሲፌቲላ ያርሾ ሺሺዛ ዎዴ ኢዛ ቦላ ዎሶይ ባይንዳ ሚርጎ ወይኮ ማጫ ሚዝ ዶሪዲ ኤሆ።

2 ያርሾ ኤሂዛዴይ ያርሾስ ኢዚ ሺሺዛ ሜሄዛ ቦላ ባ ኩሼ ዎሊዲ ጋይቶቲላ ዱንካኔ ፔንጌ ማታን ሹኮ፤ ኣርኔ ዜሬላ ጊዲዳ ቄሴቲ ሱላ ኢዛፔ ኤኪዲ ያርሾይ ያርሼቲዛሶዛ ሚሌዛ ቦላ ዩዪ ኣጳናስ ወጹቶ።

3 ኢሲፌቲላ ያርሾስ ሸቂዛ ያርሾዛፔ ጎዳስ ታማን ጸጌቲዛ ያርሾ ጊዲ ሸቃናይቲ ቃንላ ኣሾታ ጎዚ ኦይኪዳ ሃንዳ ኩሜላ።

4 ኪላሆታኔ ኢስታ ቦላ ዲዛ ሃንዳ ሄሳላካ ቲሬ ጎዚ ኦይኪዳ ሃንዳታፔ ዶሬቲዳይታ።

5 ቄሴቲ ሄሳ ኡባ ሃራ ጸጌቲዛ ያርሾራ ጋሊ ያርሾ ያርሺዛሶን ጸጌቶ፤ ሄሳ ማላ ታማን ጸጌቲዛ ያርሾ ሳዎይ ጎዳ ኡፋይሴስ።

6 «ኢሲፌቲላስ ሸቂዛ ያርሾይ ዶርሳፌ ወይኮ ዴይሻፌ ጊዲኮ ኣዴ ወይኮ ማጫ ጊዲዲ ኢስታ ቦላ ዎሶይ ባይንዳይታ ጊዴቶ።

7 ኢሲ ኣሲ ጎዳስ ሺሺዛ ያርሾይ ዶርሳ ላቃ ጊዲኮ።

8 ባ ኩሼዛ ላቃ ሁኔ ቦላ ዋሊዲ ዲንካኔዛ ፔንጌ ቦላ ሹኮ፤ ቄሴቲ ሱላ ኢዛፔ ኤኪዲ ያርሾ ያርሺዛሶዛ ቦላ ሚሌዛ ዩዩ አዳናሰ ወጾቶ።

9 ኢሲፊቴላ ያርሾስ ሺቂዛ ያርሾዛፔ ጎዳሰ ታማን ጽጌቲዛ ያርሾ ጊዲ ሺቃናይቲ ሃንዳዛኔ ዘኮ ሜቄላ ጋርሳፊ ቃንጾቲዳ ጎይና ኡባ፥ ቃንላ አሾ ጎዚ ኦይኪዳ ሃንዳ ኡባ፥

10 ኪላሆታኔ ኢሰታ ጎዚ ኦይኪዳ ሃንዳ ኡባ ቃሴ ቲሬ ካሚ ኦይኪዳ ሎኦ ሃንዳ ኡባ፥

11 ቄሴዚካ ሄሳ ኡባ ጎዳሰ ካላ ያርሾ ሂሰቲ ሺሺዲ ያርሾ ያርሺዛሶዛ ቦላ ጽጎ።

12 «ኢሲ አሲ ጎዳሰ ያርሾ ዳይሼ ሺሺዛ ጊዲኮ፥

13 ባ ኩሼ ዳይሻዛ ሁኔ ቦላ ዋሊዲ ዲንካኔዛ ሲንላን ሹኮ፤ ቄሴቲ ሱላ ኢዛፔ ኤኪዲ ያርሾይ ያርሹቲዛሶዛ ቦላ ሚሌዛ ዩዩ አዳናሰ ወጾቶ።

14 ሄ ሹኬቲዳ አሾዛፔ ሃይሳፊ ካሊዛ አሾ ቆሞታ ካላ ያርሾ ኦሊዲ ጎዳሰ ሺሼቶ፤ ሄይቲካ ቃንላ አሾ ካሚዛ ሃንዳ ኡባ፥

15 ኪላሆታኔ ኢሰታ ጎዚ ኦይኪዳ ሃንዳ፥ ቃሴካ ቲሬ ካሚ ኦይኪዳ ሎኦ ሃንዳዛፔ ኤኬቶ።

16 ቄሴዚካ ሄሳ ታማን ጽጌቲ ሳዊዛ ያርሾ ኦሊዲ ያርሾ ያርሺዛሶን ጽጎ፤ ሃንዳይ ወሪ ጎዳሰ ሻኬቲዲ ዲማቶ።

17 ኢሰራኤሌ ናይታፔ ሃንዳ ሚዛዳይ ዋይኮ ሜሄ ሱላ ኡዩዛዳይ ዶፖ፤ ሄሲ ወሪ ኢሰራኤሌ ናይቲ ዲዛሶኒኔ ኢሰቲ ዲዛ ዋዴ ኡባን ሜርናሰ ኤቂ ዲዛ ዋጋ ጊዶ።»

4

ኤሮንታ ኦሊዳ ናጋራ ጊሻሰ ሺቂዛ ያርሾ

1 ጸሲ ሙሴ ሂዝጊ አዛዚዳሰ፤

2 «ኔኒ ኢሰራኤሌ ናይታሰ ዮታናይሲ ሃይሳ፤ እኒካ ኤሮንታ ባሌቴላን ናጋራ ኦሊኮ ዋይኮ ኤሮንታ ጎዳ አዛዞታፔ ኢሳ ሞሪኮ ሃይሳፊ ካሊዛ ዋጋ ናጎ!

3 «ሄ ዋዴ ቲዩቲዳ ቄሴይ ናጋራ ኦሊዲ ዳሬዚ ናጋራ ኦሊዳ ሚሳቲሲ ቤቲኮ ኢዛ ቦላ ኢሲ ዋሶይካ ባይንዳ ኢሲ ሚርጎ ቦራ ኤሂዲ ባ ናጋራ ጊሻሰ ጎዳሰ ያርሾ ሺሾ።

4 ኮርማዛ ዲንካኔዛ ፔንጌ ኤሂዲ ባ ኩሼ ኢዛ ሁኔ ቦላ ዋሊዲ ጎዳ ሲንላን ሹኮ።

5 ሄሳፊ ጉዬ ቄሴታ ሃላቃይ ሄ ቦራዛ ሱላፊ ጉላራ ኤኪዲ ጌዴ ዲንካኔዛ ጊዶ ጌሎ፤

6 ጎዳ ከላ ማጋላሻስ ሲንላ ባጋራ ኤቂዲ ባ ቢራዴ ሱላን ጌልሊ ጌልሊ ከሲዲ ላፑንቶ ጋካናስ ወጸ።

7 ኢዛፔ ጉላ ሱላ ኤኪዲ ዲንካኔዛ ጊደን ኤጸኔ ያርሺዛሶዛን ኦይዲ ባጋራ ዲዛ ዴዎታ ቦላ ዎሶ፤ ሃንኮ አቲዳ ሱላ ዲንካኔዛን ጌሊዛ ፔንጌ ባጋራ ጸጌቲዛ ያርሾይ ያርሼቲዛሶ ጋርሳን ጉሶ።

8 ሄ ሚርጎዛ ሃንዳዛ ኡባ፣ ቃንላ አሾ ካሚ ኦይኪዳ ሃንዳዛካ፣

9 ኪላሆታካ ኢሰታ ጎዚ ኦይኪዳ ሃንዳዛኔ ሄሳሶካ ቲሬ ካሚ ኦይኪዳ ሞዴዛፔ ዶሬቲዳይሳ ኤኮ።

10 ቄሴታ ሃላቃይ ሄሳ ኡባ ኤኪዲ ጸጌቲዛ ያርሾይ ሺቂዛ ያርሾሶዛ ቦላ ጸጎ፤ አሶዚካ ኢሲፌቲላስ ያርሾይ ሺቂዛ ሜሄዛ ሃንዳፌ ኤኪዲ ጸጌቲዛ ያርሾስ ሺቂዛ ማላ ሃኖ።

11 ጊዶ አቲን ጋልባዛ፣ አሾዛ፣ ሁኤዛኔ ቶሆታ፣ ማራጨዛራኔ ቃንላ አሾ።

12 ሄራፔ ጌዴ ካሬ ከሶ፤ ጌዴ ቢዲንሐ ከሲ ቆሊዛሶ፣ ቱኖንታሶ ኤፊዲ ሚሊ ሺሺዲ ታማን ጸጎ።

13 «ኢሰራኤሌ አሳይ ኤሮንታ ባላ ኦሊኮ ዎይኮ ኤሮንታ ጎዳ አዛዘፔ ኢሲኖ ሞሪዳ ጊዲኮ ሄ ናጋራይካ አሳፔ ጌሚኮ።

14 ሄ ኦሴቲዳ ናጋራይ ኤሬቲዳ ማላ ሄራካ ዴሬዚ ሄ ናጋራ ጊሻስ ያርሾስ ኢሲ ሚርጎ ኤሆ፤ ኢዛካ አሳይ ጋይቶቲላ ዲንካኔ ሲንሌ ሺሾ።

15 ዴራ ሃላቃቲ ባንታ ኩሼ ሚርጎዛ ሁኤ ቦላ ዎሊን ሄን ቦራዚ ጎዳ ሲንላን ሹኬቶ።

16 ቲዬቲዳ ቄሴይ ሄ ሚርጎዛ ሱላፌ ጉላራ ኤኪዲ ጌዴ ዲንካኔዛን ጌሎ፤

17 ጎዳ ከላ ማጋላሻስ ሲንላ ባጋራ ጊዲዲ ባ ኩሼ ቢራዴታ ላፑንቶ ሱላን ጌልሊ ጌልሊ ከሲዲ ጸሳ ሲንላን ወጸ።

18 ቃሴካ ጉላ ሱላ ኤኪዲ ዲንካኔ ጊደን ዲዛ ኤጸኔ ኢዛ ቦላ ያርሺዛሶዛን ኦይዲ ባጋራ ዲዛ ዴዎታ ቦላ ዎሶ፤ አቲዳ ሱላ ቃሴ ጌዴ ዲንካኔን ጌሊዛሶን ጸጌቲዛ ያርሾይ ያርሼቲዛሶዛ ጋርሳን ጉሶ።

19 ሄሳፌ ቃሴ ሄ ሚርጎ ሞዴዛ ኡባ ኤኪዲ ያርሾ ያርሺዛሶዛ ቦላ ጸጎ።

20 አሶዚ ወሪካ ናጋራ ጊሻስ ሺቂዛ ሚርጎ ያርሺዛይሳላ ኦሌቶ፤ ቲዬቲዳ ቄሴዚ ዴራፔ ናጋራ ዲጋና፤ ዴራሲካ አቶ ጌቲታና።

21 ሄሳፌ ጉዬ ሚርጎዛ አሳይ ዲዛሶፔ ጌዴ ካሬ ከሲዲ ባ ናጋራ ጊሻስ ሺሺዳ ሚርጎዛ ካሴ ጸጎይሳላ ጸጎ፤ ሄሲካ ዴሬዛ ናጋራፔ ጌሺዛ ያርሾ ጊዳና።

22 «ናጋራ ኦሊዳዳይኔ ኤሮንታ ዲሼ ባሌቱላን ጎዳ ባ ጸሳ አዛዘታፔ ኢሲኒዮ ሞሪዳዳይ ኢዚ ዳሬ ካሌሊዛዳ ገዲኮ።

23 ባ ኦሊዳ ናጋራ ኢዚ ኤሪዳ ማላ ሄራካ ኢሲ ቦሬይ ኢዛ ቦላ ባይንዳ ዳይሻ ኦርጌ ባ ናጋራፔ ማሬታናስ ያርሾ ሺሾ።

24 ባ ኩሼ ዳይሻ ሁኤ ቦላ ዋሊዲ ያርሾ ያርሺዛሶዛፔ ፑዴሃ ባጋራ ጸጌቲዛ ያርሾስ ሺቂዛ ሜሄቲ ሹኬቲዛሶን ጎዳ ሲንላን ሹኮ። ሄሲካ ናጋራ ዲጊዛ ያርሾ ገዳና።

25 ቄሴዚ ሄ ሹኬቲዳ ሜሄዛ ሱላን ባ ቢራዴታ ጌልሊ ጌልሊ ኬሲዲ ኦይዱ ባጋራ ዲዛ ዴሞታ ቲዮ፤ ኢዛፔ አቲዳ ሱላ ያርሾይ ያርሺቲዛሶዛ ጋርሳን ጉሶ።

26 ሃንዳዛ ኡባ ያርሾ ያርሺዛሶዛ ቦላ ጸጎ፤ ሄ ኦሶይ ካሴ ኢሲፌቱላ ያርሾስ ሺሺዳ ሜሄታ ሃንዳ ጸጎይሳላ ኦሌቶ፤ ሄሳላ ቄሴዚ ዳሬዛ ካሌሊዛዳ ናጋራ ዉርሳናስ ያርሾ ሺሾ፤ ኢዛሰካ አቶ ጌቲታና።

27 «ናጋራ ኦሊዳዳይኔ ኤሮንታ ዲሼ ባሌቱላን ጎዳ አዛዘታፔ ኢሲኒዮ ሞሪዳዳይ ሃንኮ ዳራ ገደፌ ገዲኮ።

28 ባ ኦሊዳ ናጋራ ኢዚ ኤሪዳ ማላ ሄራካ ኢዚ ቦላ ኢሲ ቦሬይካ ባይንዳ ማጫ ዳይሽ ባ ናጋራ ገሻስ ሺሾ።

29 ባ ኩሼ ሄ ዳይሻይ ሁኤ ቦላ ዋላ፤ ያርሾ ያርሺዛሶፔ ፑዴሃ ባጋራ ጸጌቲዛ ያርሾስ ሺቂዛ ሜሄቲ ሹኬቲዛሶን ሹኮ።

30 ቄሴዚካ ሄ ሹኬቲዳ ዳይሻይ ሱላን ባ ቢራዴታ ጌልሊ ጌልሊ ኬሲዲ ኦይዱ ባጋራ ዲዛ ዴሞታ ቲዮ፤ ኢዛፔ አቲዳ ሱላ ያርሾይ ያርሺቲዛሶዛ ጋርሳን ጉሶ።

31 ኢሲፌቱላስ ሺቂዛ ያርሾስ ሺቂዛ ሜሄታ ሞዴ ቦላራ ሾቂ ኬሲዛይሳላ ሃይሳ ሃ ሜሄዛ ሞዴካ ኡባ ቦላራ ሾቂ ዲጎ፤ ሳዋዚ ጎዳ ኡፋይሲዛ ያርሾ ኦሊዲ ያርሺዛሶዛ ቦላ ጸጎ፤ ሄሳላ ቄሴዚ ሄ አዴዛ ናጋራ ኢዛፔ ዲጋናስ ያርሾ ሺሾ፤ ኢዛዴሰካ አቶ ጌቲታና።

32 «ሄ አዴዚ ባ ናጋራፔ ማሬታናስ ያርሾስ ዶርስ ሺሻና ኮይኮ ኢዚ ቦላ አይኮ ቦሬይ ባይንዳ ማጫ ዶርስ ሺሾ።

33 ኢዛዴይካ ዶርሳይ ሁኤ ቦላ ባ ኩሼ ዋላ፤ ያርሾ ያርሺዛሶፔ ፑዴሃ ባጋን ጸጌቲዛ ያርሾስ ሺቂዛ ሜሄቲ ሹኬቲዛሶን ሹኮ።

34 ቄሴዚ ቃሴ ዶርሳይ ሱላን ባ ቢራዴ ጌልሊ ጌልሊ ኬሲዲ ያርሾ ያርሺዛሶዛስ ኦይዱ ባጋራ ዲዛ ዴሞታ ሱላራ ቲዮ፤ ኢዛፔ አቲዳ ሱላ ያርሾ ያርሺዛሶ ጋርሳን ጉሶ።

35 ሄሳፌ ካሊዲ ኢሲፌቴላ ያርሾስ ሸቂዛ ማሄታ ሞጴ ሾቂ ኤኪዛይሳ ማላ ሃ ደርሳይ ሞጴካ ኡባ ሾቂ ዲጎ፤ ሄሳካ ጎዳስ ሸቂዛ ካላ ያርሾስ ሺሺዛሶዛ ቦላ ጹጎ፤ ሄሳሶ ቄሴዚ ሄ ኣዳዘ ናጋራ ኢዛፔ ዲጋናስ ያርሾ ሺሾ፤ ኢዛዴሰካ ኣቶ ጌቴታና።

5

ቆሆ ያርሾይ ሸቂዛ ጋሶታ

1 «ኣሳዴይ ባ ቤኢዳ ሚሼ ማርካታና ማላ ፒርዳ ፒርዲዛሶ ጸይጌቴዲ ባ ቤኢዳይሳ ዋይኮ ባ ኤሪዛይሳ ማርካቶንታ ኢጲኮ ሄሲ ኢዛስ ናጋራ ጌዳና፤ ሄሳ ጊሻስ ኢዛዴይ ኦይሼታና።

2 «ኣይ ኣሲካ ኤሮንታ ዲሼ ዋጋን ዲጌቴዳ ዶኣታ ባወታ፤ ማሄታ ባወታ ዋይኮ ቲራን ቢታራ ጎሹቴዛ ሜጴቴላታ ባወታ ቦቹዳዴይ ቱኔሰ፤ ሄሲካ ኢዛዴሰ ናጋራ ጌዴስ።

3 «ኣይ ኣሲካ ኤሮንታ ዲሼን ኣሳፔ ጎጊ ኬዚዲ ቱኒሲዛ ሚሽ ቦቹኮ ኢዛዴይ ሄሳ ኤሪዳ ጋላሳፌ ዶሚዲ ኢዛስ ናጋራ ጌዴስ።

4 «ኣይ ኣሲካ ኢታሰ ጊዲን ኪያሰ ጊዲን ዩሹ ቆፖንታ ጮ ሚላ ኣዲና ኣዲኔቴኮ ኢዛዴይ ኦሒዳ ሞሮዛ ዛሪ ኣኬኪዳ ዋዴፔ ዶሚዲ ኢዛዴሰ ናጋራ ጌዳና።

5 «ኣይ ኣሲካ ሃይታ ሃ ሚሻታፔ ኢሳን ቆሂ ቤቴኮ ባ ናጋራ ቆንጪሲ ፓጽናስ ቤሴስ።

6 ኢዛዴይ ባ ናጋራ ጊሻስ ማጫ ዶርስ ዋይኮ ማጫ ዴይሽ ያርሻናስ ኤሆ፤ ቄሴይካ ኢዛፔ ኤኪዲ ኢዛዴ ናጋራ ወርሳናስ ጎዳ ሲንላን ያርሾ።

7 «ኣይ ኣሲካ ባ ኦሒዳ ናጋራ ጊሻስ ዶርስ ዋይኮ ዴይሼ ሸሻናስ ዳንዳዮንታዝ ጊዲኮ ናሞኡ ሃራጵታ ዋይኮ ሃራጵ ጪዬታ ኤሂዲ ኢሲኒዮ ናጋራ ያርሾስ ናሞኣንላዮካ ጹጌቴዛ ያርሾስ ጸሳ ሲንላ ሺሾ።

8 ኤሂዲ ቄሴዛስ ኢሞ፤ ቄሴዚካ ቆሆ ያርሾስ ሸቂዛ ካፎይ ቆጴ ቃንጾንታ ሚርቂዲ ቆሆ ያርሾስ ሺሾ።

9 ሱላፌ ጉላራ ኤኪዲ ያርሾ ያርሾዛሶዛ ቦላ ዩዩ ኣቆናስ ወጾ፤ ኣቴዳ ሱላ ያርሾ ያርሾዛሶ ጋርሳን ወጾ፤ ሄሲካ ናጋራ ወርሶ ያርሾ ጌዳና።

10 ሃንኮ ኣቴዳ ካፎዮ ዲዛ ዋጋ ማላ ጹጌቴዛ ያርሾ ሂሰቴ ሺሾ፤ ሄሳሶ ኦሒዲ ቄሴዚ ኢዛዴ ናጋራ ወርሳናስ ያርሾ፤ ኢታ ኦሒዳዴሰ ኢዛ ናጋራይ ኣቶ ጌቴታና።

11 ኢዛዴይ ናሞኡ ሃራጴታ ሺሻናሰ ዳንዳዮንታይሳ ጊዲኮ ባ ናጋራ ጊሻሰ ኢሲ ኪሎ ሊቆ ጳሌ ኤሆ፤ ሄሲካ ናጋራ ያርሾስ ጊዲዛ ጊሻሰ ዋጋራ ዛይቲይ ዋይኮ ኤጻኔይ ኢዛን ጉጃቶፎ።

12 ኢዛካ ኤሂዲ ቄሴዛሰ ኢሞ፤ ቄሴዚካ ሄ ጳሌዛፔ ባ ኩሼን ኩጳቲ ኤኪዲ ጎዳሰ ሸቂዛ ካላ ያርሾራ ኢሲፌ ጋሊ ሃሳኢሳናሰ ያርሾ ያርሺዛሶዛ ቦላ ጹጎ፤ ሄሲካ ናጋራ ጊሻሰ ሸቂዛ ያርሾ።

13 እይ አሲካ ሃይታንታ ማላ ናጋራታፔ ኢሳ ኦሊኮ ቄሴዚ ሄሳ ማላ ኦሊዲ ኢዛዴይ ኦሊዳ ናጋራ ወርሳናሰ ያርሾ ሺሾ፤ ሄሳዴሰካ እቶ ጌቲታና፤ ሃንኮ ኦቲዳ ጳሌይ ካላ ያርሾይ ቄሴዛሰ ኦቲዛ ማላ ኢዛሰ ጊዶ።»

ቆሆ ጊሻሰ ሸቂዛ ያርሾ ሺሾ ማራ

14 ጎዳይ ሙሴስ ሂዝጊዴሰ፤

15 «እይ አሲካ ጎዳሰ ኢማናሰ ቤሲዛይሳ ኤርንታ ኦጊዲ ኢሞንታ ኦጊኮ ኢዛሰ ናጋራ ጊዲዳ ጊሻሰ ኢሲ ዋሶይ ኢዛ ቦላ ባይንዳ ጳርሾ ቆሆስ ጊዲዛ ያርሾ ጎዳሰ ሺሾ፤ ኢዛ ዋጋ ሄሬጋይካ ካሴ ጸሳ ኬላን ኤሬቲዳ ሄሬጋ ማላ ጊዶ፤ ሄሲካ ቆሆ ጊሻሰ ሸቂዛ ያርሾ።

16 ጎዳሰ ኢማናሰ ቤሲሺን ኢዛዴይ ኢሞንታ ኦጊዳይሳ ጨጎ፤ ሄሳፌካ ቦላራ ሃይሳ ሃ ሄሬጋስ ኢቻሻፔ ኢሲ ኩሼ ጉጃዲ ቄሴዚካ ኢዚ ኤሂዳ ጳርሻራ ጋጊዲ ናጋራ ያርሾ ኦሊዲ ኤሂዳዴ ናጋራ ወርሳና፤ ሄ ሞሮ ኦሊዳይሲ እቶ ጌቲታና።

17 «እይ አሲካ ኤርንታ ዲሼ ጎዳይ ኦላፍቲ ጊዳ ኦዛዞታፔ ኢሲኒዮ ሞሪኮ ኢዛዴሰ ናጋራ፤ ሄ ናጋራ ጊሻሰ ኢዛዴይ ኦይሼታና።

18 ኢዛዴይካ ባ ሞሪዳ ሞሮዛ ጊሻሰ ባ ሜሄታ ጊዶፌ ኢዛ ቦላ ኢሲ ዋሶይ ባይንዳ ጳርሾ ቄሴዛኮ ኤሆ፤ ኢዚ ኤሂዳይሳ ዋጋይ ካሴ ቆሆ ያርሾስ ጨጊዛ ዋጋ ኬሲዛዝ ጊዶ፤ ቄሴዚካ ሄሳሶ አሲ ኤርንታ ኦሊዳ ሞሮዛ ጌሾ፤ ኢዛዴይካ ማሬታና።

19 ሄሲካ ቆሆ ጊሻሰ ሸቂዛ ያርሾ፤ ኢዛዴይካ ጎዳ ሲንላን ሞሮ ኦሊዳ ጊሻሰ ናጋራንቻ።»

6

1 ጎዳይ ሙሴስ ሂዝጊዴሰ፤

2 «ኦኒካ አሲ ኢዛሰ ሃዳራ ዋይኮ ታልኤ ኢሚዳ ሚሽ ካዲዲ ባ ላጌ ባሌሶን ናጋራ ኦሊዲ ሄሳን ጎዳ ሚሺሲኮ ዋይኮ ኦሳ ሚሼ ቦንቂ ኤኪኮ ዋይኮ ባሌሊኮ።

3 ዋይኮ አሳፔ ዋጂ ጳይዳ ሚሼ ዳሚ ኤኪዲ ታ ቤያቤኬ ገ ዋርዶራ ጫቂኮ አሲ ኦሊዛ ሃ ሞርታ ኡባፌ ኢሲኔይን ቆሂኮ፡

4 አይ አሲካ ሃይሳ ማላ ናጋራ ኦሊኮ ኢዚ ካይሶን ኤኪዳይሳ ኢዘሰ ሃዳራ ኢሚቲዳይሳ ዋይኮ ጳዩን ዳሚ ኤኪዳይሳ ዛር፡፡

5 ዋርዶራ ጫቂ ኤኪዳይሳ ኡባ ቆሆ ያርሾ ሺሺዛ ዋዴ ካሴ ባ ኤኮይሳ ቦላ ኢቻሻፔ ኢሲ ኩሼ ጉጂዲ ዛር፡፡

6 ባ ቆሂዳይሳሰ ኤዳ ገዳና ማላ ኢዛ ቦላ ኢሲ ዋሶይ ባይንዳ ጳርሾ ጎዳሰ ያርሻና ማላ ቄሴኮ ኤሆ፤ ኢዛ ዋጋይካ ካሴ ቆሆ ያርሾሰ ጪጌቲዛ ዋጋ ኬሲዛዝ ገደ፡፡

7 ቄሴዚካ ሄ አዴዛ ናጋራ ዲጋና ማላ ጎዳ ሲንላን ያርሾ፤ ኢዛዳሰካ አቶ ጌቲታና፡፡»

ጽጌቲዛ ያርሾ

8 ጎዳይ ሙሴ ሂዝጊዳሰ፡

9 «ኔኒ አርኔሲኔ ኢዛ ናይታሰ ኢሰቲ ናጋና ማላ ኔ ኢሰታሰ ኢማና አዛዘይ ሃይሳፌ ካሊዛይሳ፤ ጽጌቲዛ ያርሾይ ፓጮይ ባይንዳ ጋዴይ ዋንታና ጋካናሰ ያርሺዛሶዛ ቦላ ኡባ ዋዴ ታማይ ኤጲሼ አቆ፡፡

10 ቄሴዚ ላይኖፔ ዳዴቲዳ ቃሚሳኔ ሱሬ ማይኢዲ ጽጌቲዛ ያርሾዛ ታማይ ሚዳይሳፌ ጉዬ አቲዳ ቢዲንላ ሄፔ ያርሾ ያርሺዛሶዛፔ ሚሌ ባጋራ ቆሎ፡፡

11 ሄሳፌ ጉዬ ባ ማይኢዳ ማይኦ ላሚዲ ቢዲንላዛ ቶኪ ኤኪዲ አሲ ዲዛሶፔ ጌዴ ካሬ ኬሲዲ ማራራ ሎኦሶን ቆሎ፡፡

12 ያርሺዛሶ ቦላ ዲዛ ታማይ ቶኦንታ ኡባ ዋዴ ኤጲሼ ደ፤ አይዴካ ቶኦፖ፤ ቄሴዚካ ዋንታ ዋንታ ታማን ሚሶ ጉጂ፤ ኢዛ ቦላ ጽጌቲዛ ያርሾ ኡባ ዋዴ ገግሲ ዋሊዲ ኢሲፌቲላ ያርሾሰ ሺቂዛ ሃንዳ ጸጎ፡፡

13 ያርሾ ያርሺዛሶዛ ቦላ ዲዛ ታማይ ኡባ ዋዴ ቶኦንታ ኤጸናሰ ቤሴሰ፡፡

ካላ ያርሾ

14 «ካላ ያርሾ ሺሾ ገሻሰ ዋሊዳ ዋጋቲ ሃይሳፌ ካሊዛይታ፤ አርኔ ባጋፌ ገዲዳ ቄሴዚ ካላ ያርሾ ያርሺዛሶ ሲንላ ባጋራ ጸሳሰ ያርሾ፡፡

15 ካሌሊዲ ዛይቲራ ዲዛ ሊቆ ጂሌ ኩጳቲ ኤኪዲኔ ካላ ያርሾ ቦላ ዲዛ ኤጸኔዛ ኡባ ዳንሊዲ ጎዳሰ ሺሺዳይሳ ኤሪሳና

ማላ ያርሾ ሺሺዛሶ ቦላ ጹጎ፤ ሄሳ ሳዎይካ ጎዳ ኡፋይሲዛ ያርሾ ጊዳና።

16 ሄሳፌ አቲዳይሳ ቁሴቲ ሜቶ፤ ኢዛንካ ኢርሾይ ጌሎንታ ዲሺን ኡኪዲ ጎዳይ ዎሴቲዛ ጌሻ ዲንካናሲ ሲንላ ባጋራ ዲዛ ዴምባ ቦላ ሜቶ።

17 ሄሲካ ኢዛን ኢርሾይ ጌሎንታ ኡኬታናሰ ቤሴሰ፤ ታኒ ጎዳይ ታማን ጸጌቲዛ ካላ ያርሾፌ ሃይሳ ኢሰታ ጌሻ ሂሰታ ኢማዲሰ፤ ሄሲካ ናጋራ ጌሻሲኔ ቆሆ ጌሻሰ ሺሺዛ ያርሾ ማላ ወሪካ ኬሂ ዲማቲዳዛ።

18 ዎዴ ዎዴናሰ አሮኔ ዜሬላፌ አቱማ ጊዲ ዩሌቲዳይ ወሪ ጎዳሰ ሸቂዛ ያርሾፌ ሻኬቲዲ ዲማ ኢዛሰ ጌሻ ኢማቲዳይሲ ሄሲ ኢዛሰ ጌሻ ጊዲዳ ጌሻሰ ኢዚ ባ ጌሻ ማናሰ ዳንዳዬሰ፤ ኦኒካ ሄሳ ሄ ያርሾዛ ቦቺዳይይ ጎዳሰ ዲማቲዳይ ጊዳና ቤሴሰ።»

19 ጎዳይ ሙሴሰ ሂዝጊዴሰ፡

20 «አሮኔይ ዎይኮ ኢዛ ዜሬላቲ ቁሴቲላን ሹማቲዛ ጋላሰ ኢሰቲ ጸሳሰ ሺሻና ካላ ያርሾይ ኡባ ዎዴ ኢሲ ኪሎ ጊዲዛ ሊቆ ጳሌ ካላ ያርሾ ኦሊዲ ጎዳሰ ሺሹቶ፤ ሄሳፌ ባጋ ማላዶ፤ ባጋ ኦማርሰ ያርሹቶ።

21 ዛይቲን ሎኤሊ ሙኑቁቲዲ ባሼን ኡኬቶ። ሄሳፌ ጉዬ ካላ ያርሾዛ ባሴሬሊዲ ሳዎዚ ጎዳ ኡፋይሲዛ ሳዎ ጊዳና ማላ ጸሳሰ ሺቆ።

22 ሃይሳፌ ያና ላይላታን ቁሴ ጊዲዲ ኦሊዛ አሮኔ ዜሬሊ ወሪካ ሃይሳ ሃ ዎጋ ፖሎ፤ ሃይሲ ጸሳሰ ሸቂዛ ያርሾ ጊዲዲ ሙሌራ ጸጌቶ።

23 ቁሴዚ ሺሺዛ ካላ ያርሾዚ ኩሜላ ጸጌቶ ኣቲን ኣሲ ኢዛፔ ሞፖ።»

ናጋራ ጌሻሰ ሸቂዛ ያርሾ

24 ጎዳይ ሙሴ ሂዝጊ ኣዛዚዴሰ፡

25 «አሮኔሲኔ ኢዛ ናይታሰ ኔ ሂዝጋ ዮታ፡ «ናጋራ ጌሻሰ ያርሹቲዛ ያርሾ ዎጋይ ሃይሳፌ ካሊዛይሳ፡ ጸጌቲዛ ያርሾ ሜሄይ ሹኬቲዛሶን ናጋራ ጌሻሰ ያርሹቲዛ ያርሾ ሜሄይካ ሄን ጎዳ ሲንላን ሹኬቶ፤ ሄሲካ ኬሂ ዲማ ያርሾ።

26 ሄ ያርሾዛካ ሺሺዛ ቁሴዚ ዲማቲዳሶን ጋይቶቴላ ዲንካኔዚ ዲዛ ጊቤዛ ጊዶን ዲዛ ዴምባን ኣሾዛ ሞ።

27 እስ ጊዲን ሃራ አይ መሸከሃ ሄ አሾዛ ቦቹኮ ዲማታና፤ ሄ መሄዛ ሱላ ኢዛ ቦላ ፒንጺዳ አይ መይኦይካ ጸሳስ ዲማቲዳሶን መጪቶ።

28 ሄ አሾይ ኢዛን ዶይሴቲዳ ማና መሸ መቆ፤ አሾይ ጸርቂማላ ቢራታን ዶይሴቲኮ ሄ ጸርቂማላ ቢራታዚ ቂጪቲዲ ሃላን መጪቶ።

29 ቂሴታ ዜሬላፌ ጊዲዳ አቱማ ና ኡባይ ሄሳ ሄ ያርሾዛፔ ሞ፤ ሄሲካ ኬሄ ዲማ ያርሾ።

30 ጊዶ አቲን ናጋራ ጌሾስ ኦሴቲዛ ዎጋን ሱላይ ጋይቶቴላ ዲንካኔ ጊዶ ጌሊዳ ጊዲኮ ሄ መሄዛ አሾዚ ታማን ጹጌቶ አቲን መቴቶ።

7

ቆሆ ጊሻስ ሽቂዛ ያርሾ

1 « ኬሄ ዲማ ጊዲዳ ጊሻስ ቆሆ ጋሶን ሽቂዛ ያርሾ ዎጋይ ሃይሳፌ ካሊዛይሳ፡

2 ቆሆ ያርሾስ ሽቂዳ መሄይ ጸጌቲዛ ያርሾስ ሽቂዛ መሄቲ ሹኬቲዛሶን ሄን ሹኬቶ፤ ሱላካ ያርሾ ያርሺዛሶዛ ቦላ ዩዪ አፋናስ ወጴቶ።

3 ሞጼ ኡባ ሺሾ፤ ሄሲካ ጎይና ሃንዳ፡ ቃንላ አሾ ጎዚ ኦይኪዳ ሞጼይ፡

4 ኪላሆታ፡ ኢስታ ካሚ ኦይኪዳ ሞጼታኔ ሄሳሳካ ቲሬ ካሚ ኦይኪዳ ሞጼታ ኢሲ ቦላ ያርሾቶ።

5 ያርሾ ያርሺዛሶን ዲዛ ሞጼ ኡባ ቂሴዚ ጸሳስ ታማን ጹጊ ያርሾ፤ ሄሲካ ቆሆ ጊሻስ ሽቂዛ ያርሾ።

6 ቂሴታ ዜሬላ ጊዲዳ አቱማ ኦሲ ኡባይ ሄ ያርሾዛ አሾ ሞ፤ ጊዶ አቲን ሄ ያርሾዚ ዲማ ጊዲዳ ጊሻስ ኢዛስ ዲማ ጊጌቲዳሶን ሞ።

7 « ናጋራ ወርሳናስ ሽቂዛ ያርሾሲኔ ቆሆስ ሽቂዛ ያርሾ ጊዶን ናሞኦታስካ ኦሊዛ ኢሲ ዎጋይ ዳስ፤ ሄሲካ ሄ ሹኬቲዛ መሄዛ አሾይ ያርሾዛ ሺሺዛ ቂሴዛስ ማና ማላ ኢዛስ አሜቲስ።

8 ጸጌቲዛ ያርሾስ ሽቂዛ መሄዛ ጋልባይ ሾቂቲዲ ያርሾዛ ያርሺዳ ቂሴዛስ አሜቲስ።

9 ታማ ጮጪን ኮሞፔቲዳ ካላ ያርሾይ ወሬ ዎይኮ ዶይሲዛ መሻን ዶይሴቲዳዚኔ ባሼን ኡኬቲዳ ካላ ያርሾ ኡባይ ያርሾ ሺሺዛ ቂሴዛስ አሜቶ።

10 ዛይቴን መኑቁተዳዝ ጊዲኮ ዎይኮ ጮ መኑቁቶንታ ካላ ያርሾ ኡባይ ኣርኔ ዘፊላታፔ ጊዲዳ ቁሴታሰ ኡባሰ ኢሜቶ፤ ኢሰቲካ ኢዛ ባ ጋርሳን ኢሲ ገና ጊሼቲ ኤኬቶ።

ኢሲፊቴላ ጊሻሰ ሸቂዛ ያርሾ

11 « ሩሲ ጎዳሰ ሸሺዛ ኢሲፊቴላ ያርሾ ዎጋይ ሃይሳፊ ካሊዛይሳ፤

12 ኢሲ ኣሲ ጎዳሰ ጋላታ ያርሾ ሸሻና ኮይኮ ባ ኤሂዛ ጋላታ ያርሾዛራ ኢርሾይ ኢዛን ጌሎንታ ዛይቴን መኑቁቲ ኡኬቲዳ ኡኬላ፣ ኢርሾይ ኢዛን ጌሎንታ ሌኤን ኡኬቲዳ ዛይቴን ቲዬቲዳ ኡኬላ፣ ሊቆ ጳሌፊ ዛይቴን መኑቁቲዳ ኡኬላ ያርሾ።

13 ጋላታሰ ሸቂዛ ኢሲፊቴላ ያርሾዛራ ጋሊ ኢሞታሰ ጊዳና ማላ ኢርሾን መኑቁቲ ኡኬቲዳ ኡኬላ ሸሾ።

14 ኡኬቲዳ ዲማ ዲማ ቆሞ ኡኬላታፔ ኢሲ ኢሲ ኡኬላ ጎዳሰ ዲማ ያርሾ ሂሰቲ ሸሾ፤ ሄ ኢሲፊቴላ ያርሾሰ ሸቂዛ ሱላ ኤኪዲ ያርሾ ሸሺዛሰዛ ዩዩ ኣጳናሰ ወጺዛ ቁሴዛሰ ጊሻ ጊዶ።

15 ጋላታሰ ሸቂዛ ኢሲፊቴላ ያርሾዛሰ ሸቂዛ ኣሾይ ሄ ያርሼቲዛ ጋላሰ ሜቲቶ ኣቲን ሃራ ጋላሳሰ ኣቶፎ።

16 ኢሲ ኣሲ ሸሺዛ ያርሾይ ኣዲና ጋሶ ዎይኮ ባ ዶሳን ጮ ኢሚዛ ኢሲፊቴላ ያርሾ ጊዲኮ ሄ ያርሾዚ ሸቂዳ ጋላሰ ሜቲቶ፤ ኢዛፔ ኣቲዳ ኡባይ ዎንቴላ ጋላሰ ሜቲቶ።

17 ሄሳፊካ ቲርፒዲ ሄሻንሉ ጋላሰ ጋካናሰ ኣቲዳ ኣሾይ ታማን ጹጌቶ፤

18 ሄሻንሉ ጋላሰ ጋካናሰ ኣቲዳ ኣይ ኣሾይካ ሜቲቲዛ ጊዲኮ ሄ ያርሾዛ ሸሸዲዳ ያርሾዚ ኤኬቴና፤ ያርሾዚ ያርሼቲዳ ማላ ቆዴቴና፤ ሄ ያርሾይካ ቱና ጊዲ ቆዴታና፤ ሄ ኣሾዛ ሚዳዴይ ባ ናጋራን ኦይሼታና።

19 « ሩቱና ጊዲዳዛራ ቦሼቲዳ ኣሾይ ታማን ጹጌቶ ኣቲን ሜቲቶፎ፤ ሃንኮ ቱኖንታ ኣቲዳ ኣሾዛ ዎጋ ማላ ባና ጌሻቴላን ናጊዳዴይ ሞ።

20 ጊዶ ኣቲን ጌሽ ጊዶንታ ኣይ ኣሲካ ጸሳሰ ሸቂዛ ኢሲፊቴላ ያርሾ ኣሾዛ ሚኮ ጎዳ ዴራ ጊዶፊ ሻኬቲ ኪቾ።

21 ኣይ ኣሲካ ጌሽ ጊዶንታ ሚሽ ዎይኮ ሚዶሳታኔ ጎጊዛ ቱና ሚሽ ቦቺዲ ኢሲፊቴላሰ ሸቂዛ ያርሾ ኣሾ ሚኮ ሄሳዴይ ጎዳ ዴራ ጊዶፊ ሻኬቲ ጳዮ። »*

* 7:21 ሚዶሳታ ጊዛይሳሰ ቢርሼላይ ሚሄታ፥ ዶኣታኔ ኣሳታ ጉሳ።

22 ጎዳይ ሙሴስ፡
 23 «ኔኒ ኢሰራኤል አሳስ፡ ሰራ ወይኮ ሚዛ ሞጴ፡ ደርሳ ሞጴ ወይኮ ዳይሻ ሞጴ ሞጥቲ።
 24 ባዉታ ሃይቂዳ ሜሄ ሞጴይ ወይኮ ደኣይ ወጲዳ ሜሄ ሞጴይ ሃራ ኦሶስ ኤኬቶ አቲን ኣይ ኣሲካ ኢዛ ሞፖ።
 25 ጸጌቲ ጎዳስ ያርሾ ሺቂዛ ሜሄ ሞጴ ሚዛዳይ ኦኒካ ጸሳ ዴራ ጊዶፌ ሻኬቲ ጳዮ።
 26 ኢንቲ አዋን ዲኮካ ኢንቲ ዲዛሶን ካፎ ሱል ወይኮ ሜሄ ሱል ኡዮጥቲ፤
 27 ሱል ኡዱዛዳይ ኦኒካ ጸሳ ዴራ ጊዶፌ ሻኬቲ ጳዮ» ጊ ዮቴዴሰ» ጊዴሰ።

ቄሴታ ጋኪዛ ጊሻ

28 ጎዳይ ሙሴስ፡
 29 «ኔኒ ኢሰራኤል አሳስ፡ ላይ ኣሲካ ኢሲፌቴላ ያርሾ ሺሺዛ ጊዲኮ ኢዛፔ ባጋ ሻኪዲ ጎዳስ ዴማ ያርሾ ሂስቲ ኤሆ።
 30 ሄ ኢዚ ኤሆይሳካ ጎዳስ ጸጌቲዛ ያርሾ ሂስቲ ሺሾ፤ ሞጴዛካ ኣንጋሶዛራ ጎዳ ሲንላን ያኔ ሃ ቃሴሊ ሺሺዛ ያርሾ ሂስቲ ሺሾ።
 31 ቄሴዚ ቃሴ ሞጴዛ ያርሾ ያርሺዛሶዛ ቦላ ጸጎ፤ ኣንጋሶዚ ጊዲኮ ቄሴታሰ ኢማቶ።
 32 ኢንቲ ኢሲፌቴላ ያርሾዛፔ ኡሻቻ ሚሳ ቄሴዛሰ ጊሻ ሂስቲ ኢማቴ፤
 33 ኢሲፌቴላ ያርሾዛ ሱላኔ ሞጴዛ ሺሺዛ ቄሴዚ ኡሻቻ ሚሳ ባ ጊሻ ሂስቲ ኤኮ።
 34 ኢሰራኤል አሳ ኢሲፌቴላ ያርሾፌ ያኔ ሃ ቃሴሊዳ ኣንጋሶዛኔ ያርሾሰ ሺሺዳ ሚሳ ኤካዳ ቄሴ ኣሮኔሲኔ ኢዛ ኣቱማ ናይታሰ ኢማዲሰ፤ ሂሲካ ኡባ ወዴ ኢሰራኤል አሳፔ ኢሰታሰ ጊሻ ጊዳና ማላ ኢማዲሰ» ጋዳ ዮታ» ጊዴሰ።
 35 ሃይሲካ ጎዳይ ኣሮኔኔ ኢዛ ናይታ ቄሴ ሂስቲ ሹሚዳ ጋላሰ ጎዳሰ ሺቂዲ ጸጌቲዛ ያርሾፌ ቄሴታ ጊሻ ጊዳና ማላ ሻኪዳዛ።
 36 ሄ ጋላሲካ ኢሰቲ ቲዬቲዳ፤ ጎዳይ ሄሳ ሄ ያርሹቲዛይሳፌ ቄሴታሰ ኢማና ማላ ኢሰራኤል አሳ ኣዛዚዴሰ፤ ሄሲካ ጉዬፔ ያና ወዴ ኡባን ኢሰራኤል ናይታሰ ኢሰታ ጊሻ ሂስቲ ኢማና ማላ ኦሊዴሰ።

37 ሄሳ ጊሻስ ጸጌቲዛ ያርሾ ጊሻሴ ካላ ያርሾ ጊሻስ፡ ናጋራፔ ማርቴላስ ሸቂዛ ያርሾ ጊሻሴ ቆሆ ጊሻስ፡ ኤዳ ያርሾ ጊሻስ፡ ቄሴቴላ ጊሻስ ሸቂዛ ያርሾኔ ኢሲፌቴላ ያርሾ ፖላናስ ዋሊዳ ዋጋቲ ሃይታጎታ።

38 ሄይቲካ ባዞን ሲና ዙማ ቦላ ኢሰራኤሌ ናይቲ ያርሾ ሺሻና ማላ ኣዛዚዳ ዋዴ ሄ ጋላስ ጎዳይ ሙሴስ ሃይታ ኣዛዞታ ኢሚዴስ።

8

ኣርኔይኔ ኢዛ ናይቲ ቄሴቴላ ኦሶስ ሱሜላ

(ኬሳ 29:1-37)

1 ጎዳይ ሙሴስ፡

2 «ኣርኔኔ ኢዛ ኣቱማ ናይታ፡ ቄሴቴላ ማይኦዛካ፡ ቲዬቲዛ ዛይቴዛ፡ ናጋራ ጌሾስ ሸቂዛ ኮርማ ቦራ፡ ናሞኡ ሓርሾኔ ኢርሾይ ጌሎጎታ ኡኬቲዳ ኡኬሊ ኢዛን ዲዛ ለማቴዛ ኢስታራ ኤካ ያ።

3 ኩሜላ ኢሰራኤሌ ናይታ ዴይጋዳ ጋይቶቴላ ዱንካኔዛ ፔንጌን ሺሻ» ጊዴስ።

4 ሙሴይካ ጎዳይ ኢዛስ ዮቲዳ ማላ ኦሊዴስ፤ ዴሬይካ ጋይቶቴላ ዱንካኔ ፔንጌን ሸቂዴስ።

5 ሙሴይካ ዴራስ፡ «ኦሴታና ማላ ጎዳይ ኣዛዞይሲ ሃይሳኮ!» ጊዴስ።

6 ሙሴይካ ኣርኔኔ ኢዛ ኣቱማ ናይታ ዴራ ሲንላ ሺሺዲ ሃላን ሜጨዴስ።

7 ኣርኔ ቃሚሳ ማላ ኣዱሳ ማይኦ ማይዚዲ፡ ካቦርቴካ ኢዛ ቦላ ጎጲ ማይዚዲ ዳንጮ ዳንጨሲዴስ፤ ሄሳ ቦላካ ኤፋዴ ጌቲቲዛ ማይኦ ማይዚዲ ኢዛካ ዱማ ሂላቴላን ኦሴቲዳ ቃባቶን ኦይሴሊዲ ዳንጨዴስ።

8 ኤፋዴ ጌቲቲዛ ማይኦዛስ ቲራ ቦላ ኪሴይ ሲኬቲዲ ኡሪሜኔ ቱሚሜ ጌቲቲዛይታ ኢዛ ጊዶን ዋሊዴስ።

9 ኢዛ ሁኤ ቦላካ ጎሴ ጸጺ ዋሊዲ ሄ ጸላ ጎሳ ቦላ ሲንላ ባጋራ ጎዳይ ሙሴስ ዮቲዳ ማላ ዋርቃፌ ኦሴቲዳ ሴሎይ ጌሻቴላስ ማላታ ጊዳና ማላ ካላቻ ኢዛ ቦላ ዋሊዴስ።

10 ሄሳፌ ጉዬ ሙሴይ ቲዬቲዛ ዛይቴዛ ኤኪዲ ጋይቶቴላ ዱንካኔዛኔ ኢዛን ዲዛ ኡባ ቲይዲ ጎዳ ኦሶስ ዱማሲዴስ።

11 ዛይቴዛፔ ጉላራ ኤኪዲ ያርሾ ያርሺዛሶዛ ቦላ ላፑንቶ ዉዲዴስ፤ ቃሴካ ጎዳ ኦሶስ ዱማታና ማላ ያርሾ ያርሺዛሶዛኔ

ኢዛ ኦሶስ ጊጌቲዳ ሚሻታ ኩሜላ ቦላ ሃሳላካ ኢዛን ሜጨቲዛ ሳኔዛኔ ሳኔዛ ኢዛ ቦላ ዋሊዛይሳ ቦላካ ወጺዳስ።

12 ቲዬቲዛ ዛይቲዛ ኣሮኔ ሁኤን ጉሲዲ ጎዳ ኦሶስ ኢዛ ዲማሲዳስ።

13 ካሌሊዲካ ሙሴይ ጎዳይ ኢዛ ኣዛዚዳ ማላ ኣሮኔ ኣቱማ ናይታ ሲንሐ ሺሺዲ ኣዲሳ ማይኦ ማይዚዳስ፤ ጸሓን ቃባቶ ዳንጨሲዲ ኢስታ ሁኤን ቆቤ ዋሊዳስ።

14 ሃሳፌ ጉዬ ሙሴይ ናጋራ ጊሻስ ያርሻናስ ኮርማ ቦራ ኤሂዳስ፤ ኣሮኔይኔ ኢዛ ናይቲ ኮርማ ቦራዛ ቦላ ባ ኩሼ ዋሊዳ።

15 ሙሴይካ ቦራዛ ሹኪዳስ፤ ቦራ ሱላን ባ ቢራዴ ጌልሊዲ ያርሾ ያርሺዛሶዛስ ኦይዲ ባጋን ዲዛ ዴሞታ ቲይዲ ጌሺዳስ፤ ሃሳፌ ኣቲዳ ሱላ ያርሾ ያርሺዛሶዛ ጋርሳን ጉሲዳስ፤ ሃሳ ማላን ያርሾ ያርሺዛሶዛ ጎዳስ ሻኪ ዲማሲዳስ።

16 ሙሴይ ሹኪቲዳ ሜሄዛ ቃንላ ኣሾዛ ቦላ ዲዛ ሞዴዛ ኡባ፣ ቲሬ ካሚ ኦይኪዳ ሞዴዛ፣ ኪላሆታኔ ኢስታ ካሚ ኦይኪዳ ሞዴዛ ኡባ ኤኪዲ ያርሾ ያርሺዛሶዛ ቦላ ጸጊዳስ።

17 ኮርማዛ ኣሾፔ ኣቲዳይሳኔ ማራጨዛ ኤኪዲ ጎዳይ ኢዛ ኣዛዚዳ ማላ ኣሳይ ዲዛሶፔ ጌዴ ሃሲዲ ጸጊዳስ።

18 ሃሳፌ ጉዬ ሙሴይ ጸጌቲዛ ያርሾስ ሺቂዛ ዶርሳ ጳርሾ ኤሂን ኣሮኔይኔ ኢዛ ናይቲ ጳርሾዛ ሁኤ ቦላ ባ ኩሼ ዋሊዳ።

19 ሙሴይካ ጳርሻ ሹኪዳስ፤ ሱላካ ያርሾ ያርሺዛሶዛ ቦላ ዩዪ ኣጳናስ ወጺዳስ።

20 ጳርሾዛ ኣሻ ቆሞን ቆሞን ቃንጺዲ ኬሲዳስ፤ ሁኤዛ፣ ቆሞን ቆሞን ቃንጾቲዳ ኣሾታኔ ሞዴዛ ጸጊዳስ።

21 ጎዳይ ኢዛ ኣዛዚዳ ማላ ሙሴይ ቃንላ ኣሾታኔ ቶሆታ ሃላን ሜጨዳስ፤ ሄ ጳርሾዛ ኣሾ ኡባ ጎዳስ ታማን ጸጌቲ ሳዊዛ ያርሾ ኦሊዲ ያርሾ ያርሺዛሶዛ ቦላ ጸጊዳስ።

22 ሃሳፌ ካሊዲ ሙሴይ ቄሴቲላ ሱላሳስ ናሞኣንላ ጳርሾዛ ኤሂዳስ፤ ኣሮኔይኔ ኢዛ ኣቱማ ናይቲ ባ ኩሼ ጳርሻ ሁኤ ቦላ ዋሊዳ።

23 ሙሴይ ጳርሻ ሹኪዳስ፤ ሱላፌ ጉላራ ኤኪዲ ኣሮኔስ ኡሻቻ ሃይላ ጸራ፣ ኡሻቻ ማንላ ቢራዴኔ ኡሻቻ ቶሆ ማንላ ቢራዴ* ቲይዳስ።

* 8:23 ማንላ ቢራዴ፡ ማንላ ቢራዴ ጊዛይሳ ኢሲ ኢሲ ባጋ ጋሞላ ቃላን ኣዴ ቢራዴ ጌቲቲስ።

24 ቃሴካ ኣሮኔ ናይታ ዴራ ሲንሐ ሺሺዲ ኢስታ ኡሻቻ ሃይላታ ዴራኔ ኡሻቻ ኩሹ ማንላ ቢራዴታኔ ኡሻቻ ቶሆታ ማንላ ቢራዴታ ቲይዴሰ፤ ሄሳፌ ቲርፒዳ ሱላ ያርሾ ያርሺዛሶዛ ቦላ ዩዩ ኣጳናሰ ዉዲዴሰ።

25 ሃንዳ፥ ጎይና፥ ቃንላ ኣሾ ካሚ ኦይኪዳ ሞዴ ኡባ፥ ቲሬ ካሚ ኦይኪዳ ሞዴ፥ ኪላሆታካ፥ ኪላሆታ ቦላ ዲዛ ሞዴዛኔ ኡሻቻ ሚሴዛ ኤኪዴሰ።

26 ኢርሾይ ቦቾንታ ጎዳሰ ዲማ ኡኬሊ ኢዛን ዲዛ ለማቴዛፒ ኢሲ ዳቦ ኤኪዴሰ፤ ሄሳሶካ ዛይቴን ሙኑቄቲ ኡኬቲዳ ዳቦይ ኢዛን ዲዛ ለማቴዛፒ ኢሲ ዳቦኔ ሌኤ ኡኬሰ ኤኪዲ ሞዴዛ ቦላኔ ኡሻቻ ሚሳ ቦላ ዋሒዴሰ።

27 ሄ ካላ ኡባ ኤኪዲ ኣሮኔ ኩሼኒኔ ኢዛ ናይታ ኩሼን ኦይሒዴሰ፤ ኢስቲካ ኦይኪዲ ያኔ ሃ ቃሴሒዲ ጎዳሰ ያርሾ ሺሺዲ።

28 ሄሳፌ ቃሴ ሙሴይ ኢስታ ኩሼፔ ኤኪዲ ቄሴቴላ ያርሾ ጊዳና ማላ ሺቂዲ ጽጌቲዛ ያርሾፌ ቦላራ ዋሒዲ ያርሾ ያርሺዛሶዛ ቦላ ዋሒዲ ጽጊዴሰ፤ ሄሲካ ኢዛ ሳዋይ ጎዳ ኡፋይሲዛ ካላ ያርሾ።

29 ሙሴይ ቃሴካ ኣንጋሶዛ ኤኪዲ ያኔ ሃ ቃሴሒዲ ጎዳሰ ሺሺዴሰ፤ ሙሴይ ኡባካ ጎዳይ ኢዛ ኣዛዚዳ ማላ ቄሴቴላ ሱንሐ ሱማናሰ ሺሺዛ ጳርሾፌ ሙሴ ጊሻይ ሄሳ።

30 ሙሴይ ቲዬቲዛ ዛይቴፔኔ ያርሾ ያርሺዛሶዛን ዲዛ ሱላፌ ጉላራ ኤኪዲ ኣሮኔ ቦላ፥ ኣሮኔ ናይታ ቦላኔ ቃሴካ ኢስታ ማይኦ ቦላ ዉዲዴሰ፤ ሄሳ ማላን ሙሴይ ኢስታኔ ኢስታ ማይኦ ኡባ ጎዳሰ ዲማሲዴሰ።

31 ሙሴይ ኣሮኔኔ ኢዛ ኣቱማ ናይታሰ፥ «ኣሾዛ ጋይቶቴላ ዲንካኔ ፔንጌን ዶይሲቴ፤ ኣሮኔይኔ ኢዛ ናይቲ ማና ማላ ጎዳይ ኣዛዚዳይሳ ቄሴቴላ ሱንሐ ሱሚዛ ዋዴ ያርሾ ኢዛራ ሺሺዛ ለማቴን ዲዛ ኡኬላራ ሄን ሚቴ።

32 ኣሾዛፔ ዋይኮ ኡኬላዛፔ ቲርፒኮ ታማን ጽጌቴ።

33 ኢንቴ ቄሴቴላ ሱንሐ ሱሚዛ ዋጋይ ፖሌታናሰ ላፑን ጋላሰ ኤኪዛ ጊሻሰ ሄ ላፑን ጋላሳይ ዉራና ጋካናሰ ጋይቶቴላ ዲንካኔዛ ፔንጌፌ ኪቾፍቴ።

34 ኢንቴና ናጋራፔ ጌሻናሰ ሃይሳ ሃቕ ኑ ኦሒዳ ዋጋ ፖላና ማላ ጸሳይ ኑና ኣዛዚዴሰ።

35 ሄሳ ጊሻሰ ጎዳይ ኣዛዚዳይሳ ፖላናሰ ላፑን ጋላሰ ኩሚሐ ጋላሲኔ ኦማርሰ ጋይቶቴላ ዲንካኔዛ ፔንጌፌ ኪቾፍቴ፤ ጎዳ ዋጋካ

ናገቴ፤ ሂሰቶንታ ኣጊኮ ኣንቴ ሃይቃና፤ ታና ጎዳይ ኣዛዚዳ ዋጋይ ሃይሳ» ጊዴሰ።

³⁶ እርሴይኔ ኢዛ ናይቲ ሙሴ ባጋራ ጎዳይ ኣዛዚዳይሳ ኡባ ፖሊዳ።

9

ኢሮኔይ ገዳሰ ሺሺዳ ያርሾ

¹ ኦሰቸንላ ጋላሳን ሙሴይ ኣሮኔ፡ ኢዛ ኣቱማ ናይታኔ ኢሰራኤሌ ኣሳ ካሌሊዛ ጨማታ ጸይጊዴሰ፤

2 ኣርጌካ፡ «ኢሲ ዋሪይካ ኢስታ ቦላ ባይንዳ ኢሲ ሚርጎኔ ኢሲ ዳርቮ ኤካዳ ሚርጎዛ ናጋራ ጊሻስ ያርሺዛ ያርቮ ዳርቮዛ ደጌቲዛ ያርቮ ሂሰታ ጎዳስ ያርቫ።

3 ሃሳፌ ጉዩ ኢስራኤል ናይታ ናጋራ ጊሻስ ሺቂዛ ያርሾስ ዳይሻ ኦርጌኔ ኢስታ ቦላ ኣይኮ ዋሶይ ባይንዳ ኢሲ ላይላ ማራራኔ ኢሲ ላይላ ደርሳ ላቃ ጸጌቲዛ ያርሾስ ኤሃና ማላ ዮታ።

4 ቃሴካ ኢሲ ኮርማኔ ኢሲ ዶርሳ ላቃ ኢሲፌቴላ ያርሾስ ኤሄቶ፤ ሄይታገታ ዛይቴገ ጊንዴቲዳ ካላ ያርሾራ ገዳስ ያርሾ ሽሼቶ፤ ሄሳ ኡባ ኦፊቶ፤ ጋሶይካ ጸሲ ኢስታስ ሃቾ ቆገጫና» ገደሰ።

5 ኢስቲካ ሙሴይ ኢስታ አዛዚዳይሳ ኡባ ዱንካኔዛ ፔንጌ ኤሃዳ፤ አሳይ ዉሪካ ጎዳ ሰንላን ሸቄ ኤቁዳሰ።

6 መኩረት አለታለሁ፡ «ገዳ ቦንጃይ አንቴሰ ቆንጫና ማላ አንቴ ኦላናሰ ገዳይ አንቴና ኦዛዚዳ ኦዛዞይ ሃይሳ» ጌደሰ።

7 ቃሴን ሙሴይ አሮጌሰ፡ «ጌዴ ያርሾይ ያርሾቴዛሶ ሺቃዳ ኔ ናጋራኔ ዴሬዛ ናጋራ ዉርሳናሰ ሸቁዛ ያርሾኔ ጸጌቴዛ ያርሾ ያርሻ፤ ሄሳ ኡባ ጎዳይ ዴሬዛ ናጋራ ዉርሳና ማላ ኢዚ ኔና ኣዛዚዳ ማላ ሸሻ» ገደሰ።

8 እርኔይካ ያርሾ ያርሺዛሶ ቢዲ ኮይሮ ባ ናጋራ ገሻስ ሸቂዛ ያርሾስ ሸቂዛ ሚርጎዛ ሹኪዴስ።

9 እዚ ናይቲ ሱላ እዛሰ ኤሂዳ፤ እዚካ ሱላን ባ ቢራዴ ጌልሊ ኬሲዲ ያርሾ ያርሺዛሶዛ ቦላ ዲዛ ዴሞታ ሱላ ቲይዴሰ፤ ኣቲዳ ሱላ ያርሾ ያርሺዛሶ ጋርሳን ጉሲዴሰ።

10 ሄሳፌ ካሌሉ ዋጭ፡ ከላሆታኔ ቲሬ ካሚ ኦይኪዳ
ዋጭታ ኤኪዳ ጎዳይ ሙሴ ኣዛዚዳ ማላ ያርሾ ያርሺዛሶዛ
ቦላ ጸገዱ።

11 እሾዛኔ ጋልባዛ ቃሴ አሳይ ዲዛሶፔ ጌዴ ሃራሶ ሃሲዲ ጸጊዴሰ።

12 ሃሳፌ ጉዬ አርኔይ ጸጌቲዛ ያርሾሰ ሹኪዴሰ፤ ሂስቲን ኢዛ ናይቲ ሱፋ ኢዛሰ ኤሂዳ፤ ኢዚካ ሱፋዛ ኤኪዲ ያርሾ ያርሺዛሶዛ ቦላ ዩዩ አቋናሰ ወጺዴሰ።

13 ኢዛ ናይቲ ጸጌቲዛ ያርሾሰ ሹኪቲዳ እሾዛ ቆሞን ቆሞን ሁኤዛራ ጋሊ ኢዛሰ ኤሂ ኢሚዳ፤ ኢዚካ ሃሳ ኡባ ያርሾ ያርሺዛሶዛ ቦላ ጸጊዴሰ።

14 ሃሳፌ ቃሴካ ቃንፋ እሾዛኔ ጉዬ ቶሆታ ሃፋን ሚጪዲ ያርሾ ያርሺዛሶዛ ቦላ ጸጌቲዛ ያርሾዛራ ኢሲፌ ጋሊ ጸጌቲዛሶን ጸጊዴሰ።

15 ሃሳፌ ካሌሊዲ አርኔይ ዴሬዛ ናጋራ ጊሻሰ ሹኪቲዛ ዴይሻ ኦርጌ ኤኪ ሹኪዲ ባ ናጋራ ጊሻሰ ያርሺዳይሳ ያርሺዴሰ።

16 ጸጌቲዛ ያርሾዛ ኤሂዲ ካሴ ዲዛ ዋጋ ማላ ያርሺዴሰ።

17 ካፋ ያርሾዛካ ሺሺዴሰ፤ ጂሌዛፔ ኩጳ ኩሚፎ ኤኪዲ ያርሾ ያርሺዛሶዛ ቦላ ጸጊዴሰ፤ ሂሲካ ጸጌቲዛ ያርሾሰ ማላዶ ማላዶ ሺቂዛ ያርሾዛ ቦላ ጉጃቲዲ ሸቂዴሰ።

18 ኮርማ ቦራኔ ቋርሾዛ ሹኪዲ ዴሬዛ ጊሻሰ ኢሲፌቱፋ ያርሾ ሺሺዴሰ፤ ኢዛ ናይቲካ ሱፋ ኢዛሰ ኤሂዳ፤ ኢዚካ ሱፋ ኤኪዲ ያርሾ ያርሺዛሶዛ ዩዩ አቋናሰ ወጺዴሰ።

19 አርኔይካ ኮርማ ቦራ ሞጴዛ፤ ቋርሻ ሞጴዛ፤ ኡባካ ጎይና ቶልፎዛ፤ ቃንፋ እሾ ካሚ ኦይኪዳ ሞጴዛኔ ቲሬ ካሚ ኦይኪዳ ሞጴዛ ደሬቲዳይሳ ቲሬታኔ ኢሰታ ቦላ ዲዛ ሞጴዛ ኤኪዲ፤

20 ሃ ሚሃታ አንጋሶ ጼራ ቦላ ዋሊዳ፤ አርኔይ ሞጴዛ ኡባካ ያርሾ ያርሺዛሶዛ ቦላ ጸጊዴሰ።

21 አንጋሶታኔ ኡሻቻ ጌዳ እሾታ ሙሴይ አዛዚዳ ማላ ያኔ ሃ ቃሴሊዲ ጎዳሰ ዴማ ያርሾ ሂስቲ ሺሺዴሰ።

22 አርኔይ ናጋራ ጊሻሰ ሸቂዛ ያርሾ፤ ጸጌቲዛ ያርሾኔ ኢሲፌቱፋ ጊሻሰ ሸቂዛ ያርሾ ያርሺዳፔ ጉዬ ባ ኩሼ ጶቁ ሂስቲዲ ዴራ አንጂዲ ዋጂዴሰ።

23 ሙሴይኔ አርኔይ ጋይቶቱፋ ዴንካኔ ጊዶ ጌሊዳ፤ ሄፔ ኬዚሼ ዴሬዛ አንጂዳ፤ ጎዳ ቦንቾይ አሳ ኡባሰ ቆንጪዴሰ።

24 አሳይ ቆፖንታ ዲሺን ጎዳ አቻፌ ከቲቲዳ ታማይ ዩዲ ያርሾ ያርሺዛሶዛ ቦላ ዲዛ ያርሾሰ ሸቂዳ ሃንዳዛ ኡባ ሚዴሰ፤ ዴሬዚካ ወሪ ሃሳ ቤኢዲ ኢሊሊ ጌዴሰኔ ወሪካ ሆኪ ጎይኒዴሰ።

10

ናዳቤይኔ ኣብዮይ ኦሊዳ ሞሮ

1 ኣዳቤይኔ ኣቢሁ ጌቲቲዛ ኣሮኔ ና ናምእቲ ኢሶይ ኢሶይ ባሰ ባሰ ኤጳኔ ጩዋሲዛ ጸና ኤኪዲ ቦንቆ ታማ ኢዛን ጉጂዲ፤ ቃሴካ ኤጳኔካ ኢዛን ጉጂዲ ጎዳሰ ሺሺዲ፤ ሄ ኢሰቲ ኤኪዲ ታማይ ጎዳሰ ዱማቲዳ ታማ ጊደንታ ጊሻሰ ኢሰቲ ሄሳ ማላ ታማ ሺሻና ማላ ጎዳይ ኢሰታ ኣዛዚቤና።

2 ኢሰቲ ቆፖንታ ጸሳ ኣቻፌ ዪዳ ታማይ ኢሰታ ሚዳ ጊሻሰ ኢሰቲ ጎዳ ሲንፋን ሃይቂዳ።

3 ሙሴይ ቃሴ ኣሮኔስ፡ «ጎዳይ፡ ቀጥ ሲንፋ ሺቂዲ ታሰ ኦሊዳይታሰ ታኒ ታ ጌሻቲፋ ቆንጪሳና፤ ታኒካ ታ ዳሬዛ ኣቻን ቦንቹቲዳዴ ጊዳና፤ ጊዲ ኢዚ ኣሳ ካሴ ቆፍሲዳይሲ ሃይሳ» ጊዳሰ። ኣሮኔይካ ኣይ ዛሮካ ኢሞንታ ጮኡ ጊዳሰ።

4 ሙሴይካ ኣሮኔስ ኣዋ ኢሻ ኡዚኤሌ ናይታ ሚሻኤሌኔ ኤልጸፋኔ ጸይጊዲ፡ «ሃ ዪቲ! ሃይሳ ኢንቲ ኢሻታ ኣሃ ጌሻ ዲንካኔ፤ ዳንፋዲ ኣሲ ዲዛሶፔ ጌዴ ሃራሶ ኤፍቲ» ጊዳሰ።

5 ኢሰቲካ ቄሴቲፋ ማይኦዛ ሃይቂዳይታ ኣሃ ቦላፌ ኬሶንታ ዲሼ ቢዲ ሙሴይ ኣዛዚዳ ማላ ኣሳታ ኣሃ ኣሳይ ዲዛሶፔ ጌዴ ሃራሶ ኤፊዳ።

6 ሃሳፌ ካሊዲ ሙሴይ ኣሮኔስ፡ ኢዛ ና ኤልኤዜሬሲኔ ኢታማሬስ፡ «ኢንቲ ሃይቆንታ ማላኔ ጎዳ ሃንቆይ ዳራ ቦላ ዮንታ ማላ ሃይቂዳይታሰ ሚሹቲዲ ኢንቲ ሁኤ ቡጮፍቲ፤ ኢንቲ ማይኦዛ ዳኮፍቲ፤ ጊደ ኣቲን ሃንኮ ኢሰራኤሌ ናይቲ ጎዳ ኣቻፌ ዪዳ ታማን ሃይቂዳይታሰ ዬካና ዳንዳዬቲስ።

7 ኢንቲ ጎዳይ ኣዛዚን ቲዬቲዛ ቲዮ ዛይቲን ቲዬቲዳ ጊሻሰ ኢንቲ ሃይቆንታ ማላ ጋይቶቲፋ ዲንካኔ ፔንጌፌ ካሬ ኬዘፒቲ» ጊዳሰ። ኢሰቲካ ሙሴይ ኣዛዚዳ ማላ ሃኒዳ።

ቄሴታሰ ዋዲዳ ዋጋ

8 ጎዳይ ኣሮኔስ ሂዘጊዳሰ፡

9 «ኔኒኔ ኔ ናይቲ ዋይኔ፤ ኦሴቲዳ ኡሹ ዋይኮ ሃራ ማሶሲዛ ኡሹ ኡዬዲ ጋይቶቲፋ ዲንካኔዛን ኢንቲ ጌሎንታ ማላ ናጌቲቲ፤ ሂሰቶንታ ኣጊኮ ኢንቲ ሃይቃና፤ ሃይሲ ሃ ዋጋዚ ኢንቲፊካ ጉዬን ያና ዬሌታ ኡባ ማታንካ ሜርናሰ ናጌታናሰ ቤሴስ።

10 ኢንቲ ዱማቲዳይታኔ ዱማቶንታይታ፡ ጌሺኔ ቱና ጊዲዳይታ ጊደን ዲዛ ዱማቲፋ ሻኪ ኤራናሰ ቤሴስ።

11 ታ ኢንቴስ ሙሴ ባጋራ አሟዳ ዋጋ ኡባ ኢስራኤል ናይታ ታማርሲቴ።»

12 ሙሴይካ ኣሮኔኔ ኣቲዳ ኢዛ ና ናምኣታ ኤልኤዜሬኔ ኢታማሬስ፡ «ጎዳስ ታማን ጽጌቲ ሸቂዳ ካፋፌ ኤኪዲ ኢርሾይ ቦቾንታ ኡኬል ኡኪቴ፤ ኢዚካ ኬሂ ዱማቲዳ ያርሾ ጊዲዳ ገሻስ ያርሾ ያርሺዛሶዛ ኣቻን ሚቴ።

13 ጎዳስ ታማን ጽጌቲ ሸቂዛ ካፋ ያርሾፌ ሻኬቲዲ ኢንቴሲኔ ኢንቴ ናይታስ አሜቲዳ ገሻ ጊዲዳ ገሻስ ኢንቴ ኢዛ ጎዳስ ዱማቲዳሶን ሚቴ፤ ኢንቴ ሄሳፆ ሂስታና ማላ ጸሲ ታና ኣዛዚደስ።

14 ጊዶ ኣቲን ያኔ ሃ ቃሴፆን ዱማ ያርሾ ጊዲዲ ጎዳስ ሸቂዳፔ ጉዬ ቄሴታ ገሻ ጊዳና ማላ ጌቲቲዳ ገሻስ ኣንጋሶዛኔ ሚሴዛ ኔኒኔ ኔ ኬፋን ዲዛ ኔ ማጫ ናይቲ ማንዴታ፤ ሄሳ ሄ ዋጋካ ጎዳስ ዱማቲዳሶን ማንዴታ፤ ሄሲካ ኢስራኤል ኣሳይ ኢሲፌቲፋ ገሻስ ሺሺዛ ያርሾ ኡባፌ ሻኬቲ ኔሲኔ ኔ ናይታስ አሜቲዳ።

15 ሸቂዳ ሚሴዛኔ ኣንጋሶዛ ጎዳ ሲንፋን ያኔ ሃ ቃሴፊ ሺሺዛ ያርሾዛ ማላ ቃሴፋናስ ኤሄቶ፤ ሄሲካ ጎዳይ ኣዛዚዳ ማላ ሜርናስ ኔሲኔ ኔ ናይታስ ገሻ ጊዶ» ጊደስ።

16 ሙሴይ ናጋራ ገሻስ ሸቂዳ ያርሾስ ሸቂዳ ዴይሻ ኦይቺ ሲዱዲ ኢዚ ጽጌቲዳይሳ ኤሪደስ፤ ሄሳ ገሻስ ሙሴይ ኤልኤዜሬ ቦላኔ ኢታማሬ ቦላ ሃንቄቲዲ።

17 «ኢንቴ ናጋራ ገሻስ ሸቂዳ ያርሾዛ ጸሳስ ዱማቲዳሶን ኣዛስ ሚቤኬቲ? ያርሾዚ ጎዳስ ኬሂ ዱማ፤ ኢዚ ዴፊዛፔ ናጋራኔ ቆሆ ዉርሳና ማላ ጎዳይ ሄሳ ኢንቴስ አሟዳዛ።

18 ሱፋዚ ጌዴ ጎዳስ ዱማቲዳ ዴንካኔዛን ጌሎንታ ገሻሲኔ ታ ኢንቴና ኣዛዚዳ ማላ ኢንቴ ሄ ዱማቲዳሶን ሸቂዳ ያርሾዛ ኢንቴ ማናስ ቤሴስ» ጊደስ።

19 ኣሮኔይካ ሙሴስ፡ «ናጋራ ገሻስ ሸቂዛ ጽጌቲዛ ያርሾ ሄኮ ሃቕ ኣሳይ ጸሳ ሲንፋ ኤኪ ዪደስ፤ ታናካ ሃይሳ ማላ ሜቶይ ጋኪደስ፤ ሂስቲን ሃቕ ናጋራ ገሻስ ሸቂዛ ያርሾዛ ታ ሚዳኮ ጎዳይ ኡፋዬታናሺን ኣቲዴ?» ጊደስ፤

20 ሙሴይካ ሄሳ ሲዱዲ ኢዚ ዛሪዳ ቃላን ኡፋዬቲደስ።

11

ሜቴቲዛኔ ሜቴቶንታ ሜሄታኔ ዶአታ

(ዛሬ 14:3-21)

1 ጎዳይ ሙሴሲኔ አርኔስ ሂዝጊዴስ፡

2 «ሃይሳ ኢስራኤል ናይታስ ዮቲቴ፡ ሰታ ቦላ ዲዛ ዶአታፔኔ ሜሄታፔ ኢንቴ ማናይቲ ሃይሳፌ ካሊ ዲዛይታ፡

3 ቶሆ ቂንጨፊሌይ ጳልቄላታኔ ባንቺኪዛይታ ሚቴ።

4 « ረዶ አቲን ባንቺኪዛይታ ጊዲ ኡቲዲ ቂንጨፊሌይ ጳልቄቶንታይታ ዎይኮ ባንቺኮንታይታ ጊዲ ኡቲዲ ቂንጨፊሌይ ጳልቄቲዳይታ ሞፒቴ፤ ጋሜላይ ባንቺኬስ ሺን ቂንጨፊሌይ ጳልቄቶንታ ጊሻስ ኢዚ ኢንቴስ ቱና ጊዶ።

5 ጉፓሌይ ባንቺኬስ ሺን ቂንጨፊሌይ ጳልቄቶንታ ጊሻስ ኢዚ ኢንቴስ ቱና ጊዶ።

6 ሃርባይኖይ* ባንቺኬሲሺን ቂንጨፊሌይ ጳልቄቶንታ ጊሻስ ኢዚ ኢንቴስ ቱና ጊዶ።

7 ጉዲንሱካ ሞፒቴ፤ ኢዛ ቂንጨፊሌይ ጳልቄላ ጊዲኮካ ኢዚ ባንቺኮንታ ጊሻስ ኢንቴስ ቱና ጊዲ ቆዴቶ።

8 ሄይታንቲ ቱና ጊዲዳ ጊሻስ ኢስታ አሾ ሞፒቴ፤ ሃራይ አቶሺን ኢስታ አሃካ ቦቾፍቴ።

9 « ሳባ ጊዶኒኔ ሻፋ ሃላታ ጊዶን ዲዛ ሜዴቴላታ አባ ጊዶፊ ቂፊይኔ ፖቆ ማላ ጋልባይ ዲዛ ኡባ ሚቴ።

10 አባ ጊዶኒኔ ሻፋ ሃላ ጊዶን ዲዛ ሜዴቴላታፔኔ ሸምፖራ ፓጻ ዲዛ ሃራ ሜዴቴላታ ኡባ ጊዶፊ ቂፊይኔ ፖቂቲዛ ጋልባይ ባይንዳ ኡባይ ኢንቴስ ቱና ጊዲዳ ጊሻስ ሞፒቴ።

11 ሄይታንቲ ቱና ጊዲዳ ጊሻስ ኢስታ አሾ ሞፒቴ፤ ሃራይ አቶሺን ኢስታ አሃካ ቦቾፍቴ።

12 ሄሳ ጊሻስ ሃላ ጊዶን ዲዛ ቂፊይኔ ፖቂቲዛ ጋልባይ ኢስታ ቦላ ባይንዳ ሜዴቴላቲ ወሪካ ኢንቴ አቻን ኢጾቲዳይታ ጊዴቶ።

13 « ሳኪፓፔ ሃይሳፌ ካሊዛይቲ ቱና ጊዲዳ ጊሻስ ሞፒቴ። ሄይታንቲካ ጎሌ፡ ቆሎ፡ ዎሌ †

14 ጸሎ፡ ዲማ ዲማ ቆሞ ጸርጮታ።

15 ዲማ ዲማ ቁርታ

16 ያንቻ፡ ጫንጨፍ ጉቶ፡ ሃላ ካፎ፡ ጋጩ ዛሬ ኡባ፡

* 11:6 ሃርባይኖይ፡ ሃርባይኖይ ኢሲ ኢሲ ባጋ ጋሞላ ቃላን እቺ ጌቴቴስ። † 11:13 ዎሌ፡ ዎሌ ኢሲ ኢሲ ባጋ ጋሞላ ቃላን ዎዳ ዎይኮ ዉኮ ጌቴቴስ።

- 17 ጉቶ፥ ቢያ፥ ዩንዳሬ ተ፥
 18 ዋይኖ፥ ሃላ ካፎ፥ አንኮ፥
 19 ዚጊሌ፥ ሳቢሳ ካፎ ዛሬ ኡባ፥ ጂንጂላቴ ጌቴቴዛ ካፎኔ
 ዉርካዉርኮ።
 20 « ሳፌይ ዲሺን ኦይዱ ቶሆራ ቃሲዛ ሜዴቴላቴ ዉሪካ
 ቱናታ፤
 21 ሄይታንታ ጊዶፌ ጉፓናሰ ማዲዛ ጌዳይ ዲዛ ሜዴቴላታ
 ሚቴ፤
 22 ሄይቴካ ቦሌ ዛሬታ፥ ጸንጎታ ዛሬታኔ ጉምባሮ ዛሬ ኡባ።
 23 ሂንኮ ቁፌይ ዲሺን ኦይዱ ቶሆራ ሄሜቴዛ ሜዴቴላታ
 አንቴ ቱና ማላ ቆዲቴ።
 24 « ሳይሳፌ ካሊ ዲዛይታ ቦቹዳዳይ ዉሪ ኦማርሰ ጋካናሰ
 ቱና ጊዳና።
 25 « ሳይታንታ አሃ ዴንሲዳዳይ ዉሪካ ባ ማይኦ ሃላን ሜጮ፤
 ሜጪኮካ ኦማርሰ ጋካናሰ ኢዛዳይ ቱና ጊዶ።
 26 « ሳቢፌሌይ ኢሰታሰ ዲሺን ጳልቁቶንታይቴኔ
 ባንቹኮንታ ሜሄይ ዉሪካ አንቴሰ ቱና ጊዳና፤ ሄይታንታ ቦቹዳዳይ
 ዉሪካ ቱኔሰ።
 27 ኦይዱ ቶሆራ ዲዛይታፕ ቁንጪፌሌይ ባይንዳ ካንቴን
 ሄሜቴዛይቴ ዉሪካ አንቴ አቻን ቱናታ ጊዴቶ፤ ኢሰታ አሃ
 ቦቹዳዳይ ኦማርሰ ጋካናሰ ቱና ጊዶ፤
 28 ሄይታንታ አሃ ዴንሲዳዳይ ዉሪካ ባ ማይኦ ሃላን ሜጮ፤
 ሜጪኮካ ኦማርሰ ጋካናሰ ኢዛዳይ ቱና ጊዶ፤ ኢሰቴካ አንቴ
 አቻን ቱና።
 29-30 « (ቢታራ ጎሼቴዛይታ ጊዶፌ ሃይሳፌ ካሊዛይቴ አንቴሰ
 ቱና ጊዴቶ፤ ጊርይ፥ ኤጩሬይ፥ ዛሬይ፥ ኮርቹይ፥ ሃይላሾይ፥
 ጌይይ፥ ዋካላይኔ፥ § ሻቃንቻይ አንቴሰ ቱና ጊዴቶ።
 31 ቢታራ ጎሼቴዛ ኡባታፕ ቱና ጊዲዳይቴ ሃይታንታ፤ ኢሰታ
 ጊዲን ዋይኮ ኢሰታ አሃ ቦቹዳዳይ ዉሪ ኦማርሰ ጋካናሰ ቱና
 ጊዶ።
 32 ኢሰታ አሃይ ኢዛ ቦላ ዋዲዳ ሚሺ ዉሪካ ቱኔሰ፤ ሄሲካ
 ሚላፌ ኦሴቴዳ ሚሻቴ፥ ማይኦቴ፥ ጋልባ፥ ካራጲቴ፥ ኦጎሮኔ
 ሄይታንታ ሚሳቴዛ ሃራታካ ጉጄሰ፤ ኢሰታ አሃ ቦቹዳ ሚሺ ዉሪካ

‡ 11:17 ዩንዳሬ፡ ዩንዳሬይ ኢሲ ኢሲ ባጋ ጋሞላ ቃላን ሃዘ ዋይኮ ኦይኦሬ ዋይኮ
 ሆቃ ጌቴቴሰ። § 11:29-30 ዋካላ፡ ዋካላይ ኢሲ ኢሲ ባጋ ጋሞላ ቃላን ያሮ
 ጌቴቴሰ።

ሃላን ጌሊዲ ጋሞኦ፤ አማርስ ጋካናስ ቱና ጌዲዲ ሄሳፌ ጉዬ ጌሽ ጌዶ።

33 ሄይታንታ አሃይ ማና ሚሻ ጌዶን ጌሊኮ ሄ ሚሻ ጌዶን ዲዛ ሚሽ ወሪካ ቱኒዛ ጌሻስ ሄ ማና ሚሻዛ ዋጂቱ።

34 ሄ ማና ሚሻፌ ሃሊ ኢዛ ቦላ ጸኬቲዳ ካሊ ወሪካ ቱና ጌዴስ፤ ኢዛን ዲዛ ኡዬቲዛ ሚሽካ ቱና ጌዴስ።

35 አይ አሃይካ ቦቹዳ ሚሽ ወሪካ ቱና ጌዲዳ ጌሻስ ኢዛ ኢጸቲ፤ ማኒ ሜጂዳ ጮጮ ጌዲን አቶይ ሜቆ።

36 ሄይታንታ አሃይ ሃራ ኡባ ቱኒሲዛዝ ጌዲኮካ ፑልቶ ሃሌኔ ሃሊ ዲዛ ኦላ ቱኒሴና።

37 ዜሬላስ ኡቲዳ ካላ ቦላ ዋጂኮ ዜሬላይ ቱኔና።

38 ጌዲኮካ ዜሬላ ቦላ ሃሊ ጉኪ ሲሚን አሃይ ቦቹኮ ሄ ዜሬላይ ሄሳፌ ጉዬ ቱና ጌዴስ።

39 « ሪሜቲዛ ሜሄ ጋርሳፌ አዋይሲካ ሃይቁን ሄ ሃይቁላ ቦቹዳዴይ አማርስ ጋካናስ ቱና።

40 አይ አሲካ ሄ ሃይቁላፌ ሚኮ ባ ማይኦ ሜጮ፤ አማርስ ጋካናስ ቱና ጌዶ፤ አይ አሲካ ሄ ሃይቁላ አሃ ቶኪኮ ባ ማይኦ ሜጮ፤ ጌዲኮካ አማርስ ጋካናስ ኢዛዴይ ቱና ጌዶ።

41 « ሲታራ ጎሼቲዛ አይ ሜጄቲላቲ ወሪካ ኢንቴ አቻን ሜቲቶንታዚኔ ኢጸቲዳዝ ጌዴቶ።

42 ቲራን ጎሼቲዛ፤ ኦይዱ ቶሆራ ቢዛይታ፤ ዋይኮ ዳሮ ቶሆይ ዲዛይታ ኡባካ ሞፒቲ፤ ኢስቲ ኢንቴ ማታንካ ኢጸቲዳይታ ጌዴቶ።

43 ሄይታንታፌ አዋይሳካ ሚዲ ኢንቴና ቱኒሶፒቲ።

44 ታኒ ጎዳ ኢንቴ ጸሳ፤ ታኒ ሃራፔ ዳማ ጌዲዳ ጌሻስ ኢንቴካ ዳማ ጌዲቲ፤ ባ ቲራን ጎሼቲዛይታ ሚዲ ኢንቴርካ ኢንቴና ቱኒሶፒቲ።

45 ኢንቴሰ ጎዳ ጌዳናስ ጌብጾፔ ኢንቴና ካሌላ ኬሲዳይ ኢንቴ ጸሳይ ታና፤ ሄሳ ጌሻስ ታኒ ዳማ ጌዲዳ ማላ ኢንቴካ ዳማ ጌዲቲ።

46 « ሪሜሃታ፤ ዶኦታ፤ ካፎታ፤ ሃላ ጌዶኒኔ ቢታ ቦላ ቲራን ጎሼቲዛ ሜጄቲላታ ኡባ ጌሻስ ኢሜቲዳ ዋጋይ ሃይሳ፤

47 ዋጂዳ ዋጋ ማላ ጌሻታኔ ጌሽ ጌዶንታይታ ጌዶን ዲዛ ዳማቲላ ሻኪ ኤራናስ ሄሲካ ሜቲቲዛይታኔ ሜቲቶንታይታ ጌዶን ዲዛ ዳማቲላ ሻኪ ኤራናስ ኢንቴ ሎኤሊ ናጌቲቲ። »

12

ማጫሳይ ዩሊዳፔ ጉዬ ጌሾ ዋጋ

¹ ጎዳይ ሙሴስ ሂዝጊዴስ፤

² «ኢሰራኤል አሳስ፤ ማጫሳይ ሻራዳ አቱማ ና ዩሊኮ ካሴ ማጫሳ ዋጋይ ኢዚ ቦላ ቤተዳ ዋዴ ሃኒዛይሳሉ ላቸን ጋላስ ጋካናስ ኢዛ ቱና ጊዳወስ።

³ ዩሊተዳ ናዚ ኦስቸንሳ ጋላስ ቃጸሬታናስ ቤሴስ።

⁴ ሃሳፌ ጉዬ ጋጪኖ ሱላይ ኢዚፔ ኤቃና ጋካናሴ ኢዛ ዩሎሶፌ 33 ጋላስ ጋካናስ ጸሳስ ዱማቲዳ ኣይ ሚሺካ ቦቻናስ ቤሴና፤ ሄሲካ ኢዛ ጌይዛ ዋዴይ ዉሮንታ ዲሺን ጋይቶቴላ ዱንካኔ ጊዶ ጌሉቱ።

⁵ « ሲሃሳካ ኢሲ ማጫሳይ ማጫ ና ዩሊኮ ካሴ ቦላ ቂታይ ኢዚ ቦላ ቤተዳ ዋዴ ሃኒዛይሳሉ 14 ጋላስ ጋካናስ ቱና ጊዳወስ፤ ሃሳፌ ጉዬ ሱላይ ኢዚፔ ሲሚን ኢዛ ዩሎሶፌ 66 ጋላስ ጋካናስ ጋምኡ።

⁶ « ሲዛ ጌይዛ ጋላሳቲ ዉሪዛ ዋዴ አቱማ ና ጊሻስ ጊዲን ዋይኮ ማጫ ና ጊሻስ ጸጌቲዛ ያርሾስ ኢሲ ላይላ ላቃኔ ናጋራፔ ጌያናስ ሺቂዛ ያርሾስ ሃራጼ ዋይኮ ሃራጼ ጨዬ ጋይቶቴላ ዱንካኔ ፔንጌ ኤሃዳ ሄን ኦሊዛ ቄሴስ ኢሙ።

⁷ ቄሴዚካ ኢዛ ኢሚዛይሳ ኢዚፔ ኤኪዲ ጎዳስ ያርሾ ሺሾ፤ ማጫሳያካ ኢዛ ዩሊሺን ኢዚፔ ጉኪዳ ሱላፌ ጌያወስ፤ ሃይሲ አቱማ ና ዋይኮ ማጫ ና ዩሊዛ ማጫሳስ ዋዲዳ ዋጋ።

⁸ ዩሊዳ ማጫሳያ ዶርሳ ላቃ ኤሃናስ ዳንዳዮንታሮ ጊዲኮ ናምኡ ሃራጼታ ዋይኮ ናምኡ ዋኖሴታ ኤሁ፤ ናምኦታፔ ኢሶይ ጸጌቲዛ ያርሾስ፤ ሃንኮይሲ ናጋራ ጌሾስ ያርሾ ሺቆ፤ ቄሴዚካ ኢዛ ናጋራፔ ጌሾ፤ ሃሳፌ ጉዬ ኢዛ ጌሽ ጊዳና ጌስ።»

13

አሳስ ጋልባ ቦላ ኬዚዛ ሃርጌ ጊሻስ ኢሜቲዳ ዋጋ

¹ ጎዳይ ሙሴሴኔ አርኔስ ሂዝጊዴስ፤

² «ኣይ አሲካ ኢዛዴ ቦላ ኪጻይ ዋይኮ ሺምፔይ ዋይኮ ኢለዋይ ኢዛዴ ቦላ ቤተዲ ቃቻ ሃርጌ ማላ ካሴፔ ጌዴ ዳሪ ዳሪ ቢኮ ኢዛዴ ጌዴ ቄሴ አርኔኮ ዋይኮ ቄሴ ጊዲዳ ኢዛ ናይታፔ ኢሳኮ ኤፌቶ።

3 ቄሴዚካ ሄ ማዲንላ ሎኤሊ ደሎ፤ ሄ ማዲንላ ሄራን ዲዛ ኢስኬይ ቦጺዛዝ ጊዲኮኔ ማዲንላዚ ዲጌ ኦላቲ ቤቲኮ ሄሲ ዳሮ ኢታ ሃራ ኣሳ ቦላ ኣጲዛ ጋልባ ሃርጌ፤ ቄሴዚ ካሴ ዋጋ ማላ ኢዛዴይ ቱና ጊዲዳይሳ ኣሳሰ ኤሪሶ።

4 ጊዶ ኣቲን ማዲንላዚ ቦጺዲ ዳጌ ኦላቶንታ ኣጊኮኔ ኢዛ ሄራን ዲዛ ኢስኬዚካ ቦጺንታ ኣጊኮ ቄሴዚ ሄሳዴ ላቸን ጋላሰ ጋካናሰ ሶን ካሬ ባ ቦላ ጎርዲ ባርካ ጋምኣና ማላ ኦሶ።

5 ላቸንሶ ጋላሰ ቄሴዚ ኢዛ ቃሴካ ፓፌ ደሎ፤ ኢዚ ኢዛ ፓፌሺን ማዲንላይ ካሴፔ ኣይኮካ ዲማቴል ቤሶንታ ኣጊኮ ሃኢካ ሃራ ላቸን ጋላሰ ኢዚ ባ ኬላን ካሬ ባ ቦላ ጎርዲ ኡታና ማላ ኦሶ።

6 ላቸን ጋላሳፌ ጉዬ ቄሴዚ ኢዛ ቃሴካ ፓፌ ደሎ፤ ኢዚ ፓፌ ደሊሺን ማዲንላይ ጌዴ ዲቕ ኣጊዲ ካሴፔ ጉጺ ቤቲኮ ሄ ማዲንላይ ዴጾ ጊዶንታይሳ ኢዛሰ ዮቲዲ ዋጋን ዲዛይሳ ማላ ኢዚ ጌሽ ጊዲዳይሳ ኢዛ ኤሪሶ፤ ኢዛዴይካ ዋጋይ ጊዛ ማላ ጌያናሰ ባ ማይኦዛ ሃላን ሜጮ።

7 ሄሲካ ቄሴዚ ኢዚ ጌሽ ጊዲዳይሳ ፓፌዲ ኢዛዴሰ ኤሪሲዳፔ ጉዬ ቃሴካ ማዲንላይ ካሴፔ ኣኪ ኣኪ ቢኮ ሄሳዴይ ቃሴካ ቄሴዛኮ ሺቆ።

8 ቄሴዚ ቃሴካ ፓፌ፤ ማዲንላይ ካሴፔ ኣኪኮ ኢታ ጋልባ ሃርጌ ጊዲዳ ጊሻሰ ዋጋን ዲዛ ማላ ኢዛዴይ ኢታ ጋልባ ሃርጋንቻ ጊዲዳይሳ ኤሪሶ።

9 «ኦኒካ ኢዛዴ ኣሾዛ ጋልባ ቦላ ኬዚዛ ሃርጌይ ኦይኪኮ ሄሳዴ ቄሴኮ ኤሄቶ።

10 ቄሴዚካ ሄ ኢዛዴ ቦላይ ኡዛዚዛኮ ሎኤሊ ደሊዲ ኢዛዴ ኣሳቴላ ቦላ ዲዛ ኢስኬታ ቦሊዛ ኪጸ ጊዲኮ ኪጸዚ ኡዛዚዲኔ ሄ ኡዛሳይ ዲዛሶን ዲዛ ጊዲኮ፤

11 ሄሲ ኢታ ቦላ ጋልባ ሃርጌ ጊዲዛ ጊሻሰ ቄሴይ ሄ ሃርጋንቻዚ ቱና ጊዲዳይሳ ኢዛሰ ዮቶ፤ ኢዚ ቱኒዳይሲ ኤሬቲዳ ጊሻሰ ሄሳ ማላ ኣሲ ካሬይ ጎርዴቲን ኬላን ጋምኣናሰ ቤሴና።

12 ሄ ጋልባ ሃርጌዚ ኢዛዴ ቦላ ቶሆ ጸጉንላፌ ቢዲ ሁኤ ኢስኬ ጋካናሰ ኡባ ጋኪኮ፤

13 ቄሴዚ ቃሴካ ፓፌ ደሊዲ ሃርጌዚ ኢዛዴሰ ኩሜላ ኣሳቴላ ጋኪ ማይኢዳ ጊዲኮ ቄሴዚ ሄሳዴ ዋጋ ማላ ጌሽ ጊዲዳይሳ ኤሪሶ፤ ጋሶይካ ኢዛ ቦላይ ኩሜል ላሜቲዲ ቦል ጊዲዳ ጊሻሰ ኢዛዴይ ጌሻ።

14 ጊደ ኣቲን ማዲንላይ ዛሪ ኡዛዚዲ ዞኦ ኣሾ ጊደፌ ቤሲኮ ሄሳዴይ ቱና ጊደሰ።

15 ቄሴይ ቃሴካ ዛሪ ፓፌ ጸሊሺን ማዲንላይ ኡዛዚሺን ዞኦ ኣሾ ቤይኮ ኡዛዴይ ቱና፤ ኡዚ ቱና ጊዲዳይሳ ኡዛሰ ኤሪሶ፤ ጋሶይካ ሃርጌዚ ሃራ ኣሳ ቦላ ኣጲዛ ሃርጌ ጊዲዳ ገሻሰ ሄሳዴይ ቱና።

16 ማዲንላይ ፓጺዲ ቦቲዛዝ ጊዲኮ ሄሳዴይ ቃሴካ ቄሴኮ ቦ።

17 ቄሴይካ ፓፌ ጸሊዲ ማዲንላይ ቦጺ ቤሲኮ ቄሴይካ ሄሳዴይ ጌሽ ጊዲዳይሳ ኡዛሰ ዮቶ፤ ኡዛዴይካ ጌሽ ጊዳና።

18 «ኢሳዴይ ካሴ ኪጻይ ኢዛ ቦላ ኬዚዲ ፓጺኮ፤

19 ቃሴ ጋምኢሼ ካሴ ማዲንላይ ዲዛሶን ቦላ ኪጻይ ዋይኮ ዞኦ ኢሊዋይ ኬዚኮ ኡዛዴይ ቄሴኮ ቦ።

20 ቄሴዚ ሎኤላ ጸሊዲ ማዲንላይ ዲጌ ኣሾ ጊደ ጌሊ ቤቲኮ ኡዛ ሄራን ዲዛ ኢሰኬይ ቦጺ ቤሲኮ ሄሳዴይ ቱና ጊዲዳይሳ ኡዛ ኤሪሶ፤ ጋሶይካ ሄሲ ኪጻ ኦይኪዳይሲ ባ ባጋራ ኢታ ጋልባ ሃርጌ።

21 ጊዲኮካ ቄሴዚ ፓፌ ጸሊን ጋልባ ቦላ ዲዛ ኢሰኬይ ቦቶንታ ኣጊኮኔ ሃንኮ ኣሳቴላ ጋልባፌ ኦላቲ ቤሶንታዝ ጊዲኮ ቃላሜ ዲማቴላ ገሻሰ ቄሴይ ሄሳዴይ ላቸን ጋላሰ ጋካናሰ ካሬይ ጎርዴቲን ኬላን ጋምኣና ማላ ኦሉ።

22 ማዲንላይ ዲዛሶይ ካሴፔ ኣኪ ኣኪ ቢኮ ሄሳዴይ ኣሳ ቦላ ኣጲዛ ኢታ ሃርጌን ኦይኬቲዳ ገሻሰ ኡዚ ቱና ጊዲዳይሳ ኡዛሰ ቄሴዚ ዮቶ።

23 ጊደ ኣቲን ኢሊዋዚ ካሴፔ ኣኪ ኣኪ ቦንታ ኣጊዲ ካሴ ባ ዲዛሶን ዲኮ ካሴ ኪጻይ ፓጺዳሶ ኣቲን ሃርጌ ዴና፤ ቄሴዚ ኡዚ ጌሽ ጊዲዳይሳ ኤሪሶ።

24 ካሴ ኡዛ ታማይ ሚዳዴይ ዲኮ ሄ ኡዚ ታማን ሜቴቲዳሶይ ቦላ ኢሊዋ ዋይኮ ዞኦናዳን ሃኒ ቤሲኮ፤

25 ቄሴዚ ኡዛ ፓፌ ጸሎ፤ ሄ ኢሊዋይ ዲዛሶን ሞኪዳ ኢሰኬይ ቦላ ጊዲኮኔ ሃንኮ ኡዛ ኣቻን ዲዛ ጋልባፌ ዲጌ ኣሾን ጌሊኮ ሄሲ ታማን ጸጌቴላ ጋሶን ኣሳፔ ኣሳን ኣጲዛ ኢታ ጋልባ ሃርጌ፤ ሄሳ ገሻሰ ቄሴይ ሄሳዴይ ቱኒዳይሳ ኡዛሰ ኤሪሶ።

26 ኡዛ ቦላ ሞኪዳ ኢሰኬዚ ቦላ ኢሰኬን ላማቶንታ ኣጊኮኔ ማዲንላዚ ዲጌ ኣሾን ጌሎንታ ኣጊዲ ሾሎቲ ሾሎቲ ቢኮ ቄሴዚ ሎኤላ ቤኤዲ ላቸን ጋላሰ ጋካናሰ ካሬ ኡዛ ቦላ ጎርዲ ዋሉ።

27 ቃሴካ ላቸንላ ጋላሰ ፓፌ ጸሎ፤ ኡዚ ካሴፔ ኣኪ ኣኪ

ቢኮ ሄሴ ኢታ ጋልባ ሃርጌ፤ ሄሳ ገሻሰ ሄሳዴይ ቱና ገዲዳይሳ ቄሴዚ ኢዛ ኤሪሶ።

28 ማዲንሳይ ዲዛሶይ ቃሴ ካሴፔ ኣይኮካ ኣኮንታ ኣጊኮኔ ፓጺ ፓጺ ቢኮ ኢዚ ታማይ ሚዳሶ ኣቲን ሃራ ገዴና፤ ሄሳ ገሻሰ ሄሳዴይ ዋጋ ማላ ጌሽ ገዲዳይሳ ቄሴይ ኢዛ ኤሪሶ።

29 «ኣዴ ገዲን ማጫሰ ገዲን ሁኤ ቦላ ዋይኮ ሻጋላ ቦላ ማዲንሳ ዲኮ፤

30 ቄሴዚ ሄ ማዲንሳ ፓጪ ጸሊሺን ማዲንሳይ ዲጌ ኣሾን ጌሊኮ ኢዛ ቦላ ዲዛ ኢሰኬይ ጋላልኦ ማላ ገዲዲ ለኢ ቤሲኮ ሄሴ ሁኤ ዋይኮ ቡቻ ቃጪሲ ጎኢሲዛ ዳር ኢታ ጋልባ ሃርጌ ገዲዳ ገሻሰ ሄሳዴይ ቱና ገዲዳይሳ ቄሴዚ ኢዛ ኤሪሶ።

31 ቃሴካ ቄሴይ ፓጪ ጸሊሺን ማዲንሳይ ሃንኮ ኢዛ ኣቻን ዲዛ ጋልባፌ ዲጌ ኦላቲ ቤሶንታ ኣጊኮ፤ ኢዛ ቦላ ዲዛ ኢሰኬይ ሎኦ ገደንታ ኣጊኮ ሄሳዴ ላቸን ጋላሰ ጋካናሰ ካሬ ጎርዲዲ ኬላን ዋሶ።

32 ላቸንሶ ጋላሰ ቃሴካ ቄሴዚ ኢዛዴ ፓጪ ጸሎ፤ ካሴፔ ኣኪ ኣኪ ቦንታ ኣጊኮ ቆሩማ ሚሳቲዛ ኢሰኬይካ ባይንዳ ኣጊኮኔ ማዲንሳዚ ዲጌ ኣሾን ጌሎንታ ኣጊኮ፤

33 ሄሳዴይ ማዲንሳ ዩዩ ኣፄ ዲዛ ኢሰኬዛ ኡባ ሜዴቶ፤ ቄሴይካ ኢዛ ቃሴካ ላቸን ጋላሰ ጋካናሰ ካሬይ ኢዛ ቦላ ጎርዴቲን ጋሞኣና ማላ ኦሶ።

34 ላቸንሶ ጋላሰ ቄሴዚ ቃሴካ ሄ ማዲንሳ ፓጪ ጸሎ፤ ማዲንሳይ ካሴፔ ኣኪ ኣኪ ቦንታ ኣጊኮኔ ኣሾ ሚ ኦላሶንታ ኣጊኮ ሄሳዴይ ዲዛ ዋጋ ማላ ገዲዳይሳ ኢዛ ኤሪሶ፤ ኢዛዴይካ ባ ማይኦ ሜጪዲ ጌሽ ገደ።

35 ገደ ኣቲን ኢዚ ጌሽ ገዲዳይሳ ቆንጪሲዳፔ ጉዬ ማዲንሳይ ካሴፔ ኣኪ ኣኪ ቢኮ፤

36 ቄሴዚ ቃሴካ ፓጪ ጸሎ፤ ማዲንሳይ ኣዳካ ካሴፔ ኣኪዳ ገዲኮ ኢሰኬይ ቆሩሚኮ ዋይኮ ቆሩሞንታ ኣጊኮካ ኢዛዴይ ቱና።

37 ገደ ኣቲን ቄሴዚ ቤዩሺን ማዲንሳይ ካሴፔ ኣኪ ኣኪ ቦንታ ኣጊኮኔ ሎኦ ኢሰኬይ ሞኪኮ ማዲንሳይ ፓዲዳይሳኔ ኢዛዴይ ጌዩዳይሳ ቄሴዚ ኢዛ ኤሪሶ።

38 «ማጫሰ ገዲን ዋይኮ ኣዴ ገዲን ኢሳዴ ቦላ ኢሊዋይ ኬዚኮ፤

39 ቄሴዚ ሄ ኢሊዋይ ዲዛዴዛ ፓጪ ጸሎ፤ ኢሊዋይ ዲዛሶይ ጮ ሜላ ፑቃ ቦላ ገደንታ ኣጊኮ ኢዛ ዳር ቆሆንታ ጮ ሜላ

ቦላራ ጋልባ ቦላ ኬዚዳ ሺምፔ ጊዲዳ ጊሻስ ሄሳዴይ ዲዛ ዋጋ ማላ ኢዚ ጌሻ።

40-41 «ኢሳዴስ ሁኤ ኢስኬይ ጉዬ ባጋራ ዋይኮ ሲንላ ባጋራ ቦላቲኮ ሄሳዴ ቦኣይ ኢዛ ቱኒሴና።

42 ጊዶ ኣቲን ኢዛ ቦኣ ቦላ ዋይኮ ሊጴ ቦላ ዞኢ ቤሲዛ ቦላ ማዲንሳ ቤቲኮ ሄሲ ኢታ ሃራ ኣሳ ቦላ ኣጳዛ ጋልባ ሃርጌ።

43 ቄሴዚ ሄሳዴ ፓጪ ጴሊሺን ሄሲ ሃራ ኣሳ ቦላ ኣጳዛ ጋልባ ሃርጌ ሚሳቲዲ ዞኢ ቤሲዛ ቦላ ማዲንሳ ጊዲኮ።

44 ሄሳዴይ ሃራ ኣሳ ቦላ ኣጳዛ ኢታ ሃርጌን ኦይኬቲዳ ጊሻስ ኢዛዴይ ቱና ጊዲዳይሳ ቄሴዚ ኢዛዴ ኤሪሶ።

45 ሄሳ ማላ ሃርጌይ ኢዛ ቦላ ዲዛዴይ ዳኬላ ማይኦ ማይኦ፤ ባ ሁኤካ ፒጾፖ፤ ባ ዶና ካሚዲ፤ ታኒ ቱናኮ! ታኒ ቱናኮ!) ጊሼ ዋሶ።

46 ሄ ሃርጌዚ ኢዛ ቦላ ዲዛ ዋዴ ኡባን ኢዚ ቱና፤ ሄሳ ጊሻስ ኢዚ ኣሲ ዲዛሶፔ ጌዴ ሃራሶ ሃኪዲ ባርካ ዴኦ።

ኣሳ ቦላ ሃርጌ ጋልዛ ቡቃ

47-48 «ኣሳ ቦላ ሃርጌ ጋልዛ ቡቃይ ዶርሳ ኢስኬፌ ኦሴቲዳ ማይኦ ቦላ ዋይኮ ኣይ ቆሞ ማይኦ ቦላካ ሃርፓን ዳዴቲዳ ማይኦ ቦላ ዋይኮ ኩሺን ኦሴቲዳ ጋልባ ማይኦ ዋይኮ ጋልባፌ ኦሴቲዳ ማይኦ ቦላ ቤቲኮ።

49 ሄ ሃርጌዛስ ማላይ ማታ ማላ ጨሊሊ ቤሲኮ ዋይኮ ዞኢ ቤሲኮ ሄሲ ኢሳፌ ኢሳን ኣጳዛ ሃርጌ ጊዲዳ ጊሻስ ቄሴዚ ኢዛ ቤዮ።

50 ቄሴዚ ሄ ሃርጌዛ ሎኤሊ ጴሊዲ ሄ ማይኦታ ኡባካ ላፑን ጋላስ ጋካናስ ኢሲ ኬላን ጌልሊ ዲማ ዋሶ።

51 ላፑንሶ ጋላስ ቃሴካ ፓጪ ጴሊሺን ኣሳ ቦላ ሃርጌ ጋልዛ ቡቃዚ ካሴይሳፌ ዳሪ ቤቲኮ ሄሳ ማላ ማይኦዚ ቱና።

52 ሄሳ ማላ ማይኦ ቡቃይ ኣሳ ቦላ ሃርጌ ጋልዛ ጊሻስ ቄሴዚ ሺሺዲ ሄ ቡቃ ማይኦታ ታማን ጹጎ።

53-54 «ቄሴዚ ዛሪ ፓጪ ጴሊሺን ቡቃዚ ካሴፔ ሃ ዳርንታ ኣጊኮ ማይኦዛ ሃላን ሜጫና ማላ ኣዛዞ፤ ሄ ሜጩቲዳ ማይኦዛ ላፑን ጋላስ ጋካናስ ሻኪ ዋሶ።

55 ሄሳፌ ቃሴካ ጴሊሺን ካሴፔ ቡቃይ ጉጃቶንታ ኣጊኮኦ ቡቃዛ ሜጳይ ካሴፔ ላሜቶንታ ኣጊኮ ሃኢካ ኢዚ ቱና፤ ካሴይሳ ቦላ ጊዶራ፤ ካሬራ ቡቃዚ ጉጃቲኮ ሄ ማይኦዚ ታማን ጹጌቶ።

56 ጊደ አቲን ማይኦዛ ሜጪ ሲሚዳፔ ቄሴዚ ቃሴካ ዛሪ በኢዛ ዋዴ ቡቃዚ ካሴፔ ዳጌ ጉጺኮ ቡቃዚ ዲዛሶዮ ጸላ ኢታ ማይኦፊ ጊዲን ዋይኮ አፋላ ጊዲን ዳኪ ኬሶ።

57 ቡቃዚ ቃሴካ በቲኮ ሄሲ ጌዴ ዳሪ ዳሪ ቢዛ ጊሻሰ ሄ ማይኦዚ ጸጌቶ።

58 ኣይ ማይኦኔ ጋልባፊ ኦሴቲዳ ኣይ ሚሽ ሜጪሺን ቡቃዚ ኢዛፔ ጳይኮ ቃሴካ ሜጮ፤ ሄሳፊ ጉዬ ዋጋይ ጊዛ ማላ ማይኦዚ ጌሽ ጊዳና።»

59 ሃይሲ ዶርሳ ኢሰኬፊ ኦሴቲዳ ማይኦ ቦላ ዋይኮ ኣይ ቆሞ ማይኦ ቦላ ዋይኮ ሃርፓን ዳዴቲዳ ዋይኮ ኩሽን ኦሴቲዳ ማይኦ ቦላ፤ ጋልባ ዋይኮ ጋልባፊ ኦሴቲዳ ማይኦ ቦላ አሳ ቦላ ሃርጌ ጋሊዛ ቡቃይ በቲኮ ሄ ማይኦዚ ጌሽ ዋይኮ ቱና ጊዲዳይሳ ኤሪሲዛ ዋጋይ ሃይሳፊ ቦላን ዲዛይሳ።

14

ጋልባ ቦላ ኬዚዛ ኢታ ሃርጌፊ ጌይዛ ዋጋ

1 ጎዳይ ሙሴሰ ሂዝጊዴሰ፤

2 «ኢሳዴይ አሳቴላ ቦላ ዲዛ ኢታ ጋልባ ሃርጌፊ ፓጺዳፔ ጉዬ ጌሾ ዋጋይ ሃይሳፊ ካሊዛይሳ፤ ኢዚ ጌሽ ጊዲዳይሳ ኢዛዴሰ ዮቴቲዛ ጋላሰ ሄሳዴይ ቄሴኮ ባና ማላ ኢዛሰ ዮቴቶ።

3 ሄ ኢዛሰ ዮቴቲዳ ቄሴዚ አሲ ዲዛሶፔ ጌዴ ሃራሶ ኬሲዲ ባኮ ዪዳይሳ ሎኤሊ ጸሎ፤ ኢዛዴይ ሃርጌዛፔ ፓጺዳ ጊዲኮ፤

4 ቄሴዚ ፓጺ ዲዛ ናሞኡ ጌሻ ካፎታኔ ዚጋ ሚሐ፤ ዞኦ ጸላታ፤ ሂሶጴ ሚላ ሃይሐ ጉጂ ኤኪ ያና ማላ አዛዞ።

5 ሄሳፊ ጉዬ ቄሴዚ ካፎታፔ ኢሳ ፑልቶ ሃሊ ኢዛን ዲዛ ጉቃ ኬሬ ቦላ ሹኬታና ማላ አዛዞ።

6 ሃንኮ ፓጺ ዲዛ ካፎዛ ኤፊዲ ዚጋ ሚሐራ፤ ዞኦ ጸላታራኔ ሂሶጴ ሚላ ቦንጮራ ኢሲፊ ጋሊ ካሴ ሹኬቲዳ ካፎዛ ሱላን ጌልሊ ኬሶ።

7 ሱላካ አሳቴላ ቦላ ዲዛ ጋልባ ሃርጌፊ ፓጺዳዴ ቦላ ላፑንቶ ወጸ፤ ሄሳፊ ጉዬ ኢዚ ጌሽ ጊዲዳይሳ ኢዛ ኤሪሶ፤ ሃንኮ ፓጺ ዲዛ ካፎዛካ ጌዴ ሃራሶ ኬሲዲ ዴሞባን ፒራታና ማላ ዬደ።

8 «ኢታ ጋልባ ሃርጌፊ ፓጺዳዴይ ባ ማይኦ ሜጮ፤ ባ ቦላ ዲዛ ኢሰኬ ኡባ ሜዴቶ፤ ባ ቦላካ ሜጮቶ፤ ዋጋይ ጊዛ ማላ

ኢዚ ጌሽ ጊዳና፤ ሃሳፌ ጉዬ አሲ ዲዛሶ ጌላናሰ ዳንዳዬሰ፤ ጊዳ ኣቲን ላፑን ጋላሰ ጋካናሰ ኢዚ ባ ዲንካናፔ ካሬን ዳኦ።

9 ላፑን፡፡ ጋላሰ ቃሴካ ባ ሁኤ፡ ባ ቡቲኔ ባ ዳሞ፡ ሃራ ኣዋንካ ባ ኣሳቲፋ ቦላ ዲዛ ኢሰኬ ኡባ ሜዳቶ፤ ባ ማይኦ ሃላን ሜጮኔ ባ ቦላካ ሜጮቶ፤ ሃሳፌ ጉዬ ኢዚ ጌሽ ጊዳና።

10 «ኦሰፑን፡፡ ጋላሰ ኢሲ ዋሶይካ ኢሰታ ቦላ ባይንዳ ናሞኡ ደርሳ ላቃታኔ ኢሲ ላይፋ ኡዞ ኤሆ፤ ካፋ ያርሾ ጊሻሰ ዋጋራ ሚፋ ዛይቲን ሙኑቁቲዳ ሂቡ ኪሎ ዲሌኔ ኢሲ ሊቲሮ ዛይቲሰ ሃቕን፡፡ ኩሽ ዋጋራ ሚፋ ዛይቲ ኤሆ።

11 ቄሴዚካ ኣዳዚ ኢዚ ኤሂዳ ኡባራ ኢሲ ቦላ ጋይቶቲፋ ዲንካኔዛ ፔንጌን ጎዳ ሲንፋ ሺሾ።

12 «ሃሳፌ ጉዬ ናሞኡ ቄሪ ዳርሾታፔ ኢሳ ኤኪዲ ኢሲ ሊቲሮሰ ሃቕን፡፡ ኩሽ ጊዲዛ ዋጋራ ዛይቲራ ኢሲፌ ጋሊ ኤኪዲ ቆሆ ጊሻሰ ሺቂዛ ያርሾ ሂሰቲ ሺሾ፤ ቄሴዚ ሂ ያርሾዛካ ያኔ ሃ ቃሴ፡፡ ዛይቲ ያርሾ ሂሰቲ ጎዳ ሲንፋን ቃሴ፡፡ ሺሾ።

13 ላቃዛካ ናጋራ ያርሾሲኔ ጸጌቲዛ ያርሾሰ ሹኪዛ ጌሻሶሆን ሹኮ፤ ጋሶይካ ቆሆ ጊሻሰ ያርሾይ ናጋራ ዉርሳናሰ ሺቂዛ ያርሾ ማላ ቄሴዛሰ ጊሻ ጊዳና፤ ኢዚካ ከሂ ዳማ።

14 ቄሴዚ ቆሆ ያርሾሰ ሺቂዛ ሱፋፌ ጉፋራ ኤኪዲ ሂ ጌይዛዳሰ ኡሻቻ ሃይፋ ጸራ ኢዛሰ ኡሻቻ ኩሽ ማንፋ ቢራዴኔ ኡሻቻ ቶሆ ማንፋ ቢራዴ ቲዮ።

15 ቄሴዚ ዋጋራ ሚፋ ዛይቲዛፔ ጉፋራ ኤኪዲ ባ ሃዲርሳ ኩሽ ቃኣን ቲጎ።

16 ባ ኡሻቻ ኩሽ ጸራን ጉፋራ ኤኪዲ ጸሳ ሲንፋን ላፑንቶ ወጽ።

17 ባ ኩሽ ቃኣን ኣቲዳ ዛይቲዛፔ ጉፋራ ኤኪዲ ጌይዛዳሰ ኡሻቻ ሃይፋ ጸራ፡፡ ኡሻቻ ኩሽ ማንፋ ቢራዴኔ ኡሻቻ ቶሆ ማንፋ ቢራዴ ቲዮ።

18 ባ ኩሽ ቃኣን ኣቲዳ ዛይቲዛካ ጌይዛዳ ሁኤን ጉሶ፤ ቄሴይ ኢዛዳ ናጋራ ጌሾ።

19 «ሃሳፌ ጉዬ ቄሴዚ ባ ቱናቲፋፌ ጌይዛዳ ናጋራ ዉርሳናሰ ሺቂዳ ሚሂ ሹኮ።

20 ቃሴካ ቄሴዚ ሂ ጸጌቲዛ ያርሾዛ ካፋ ያርሾዛራ ኢሲፌ ያርሾ ያርሼዛሶዛ ቦላ ዋሊዲ ጸጎ፤ ሃሳ ማላ ኦሶን ኢዛዳ ናጋራፔ ማሪሴሰ፤ ኢዛዳይካ ጌሽ ጊዳሰ።

21 «ኢዛዳይ ሃሳ ኡባ ኤሃናሰ ዳንዳዮንታ ማንቆ ጊዲኮ ጎዳ ሲንፋን ያኔ ሃ ቃሴ፡፡ ዛይቲ ባ ናጋራ ዉርሳናሰ ኢሲ ዳርሾ ላቃ ኤሂዲ

ቆሆ ያርሾ ገሻሰ ሺሾ፤ ቃሴ ካላ ያርሾዛሰካ ዋጋራ ሚላ ዛይቲን ሙኑቁቲዳ ኢሲ ኪሎ ሊቆ ጳሌ ካላ ያርሾሰ ኤሆ፤ ሄሳቶካ ኢሲ ሊቲርሰ ሄሻንሶ ኩሼ ገዲዛ ዛይቲ ኤሆ።

22 ቃሴካ ኢዛ ዋልቃይ ዳንዳይዳ ማላ ናምኡ ሃራጴታ ዋይኮ ናምኡ ዋናሴታፔ ኢሳ ናጋራ ገሻሰ ያርሾሰ፤ ናምኢንሶዛ ቃሴ ጸጌቲዛ ያርሾሰ ኤሆ።

23 «ጌሾ ዋጋይ ፖሌቲዛ ኦሰፑንላ ጋላሰ ሄይታ ኡባ ኤሂዲ ጋይቶቲላ ዳንካኔ ፔንጌን ጎዳ ሲንላን ቄሴሰ አሞ።

24 ቄሴዚካ ቆሆ ያርሾሰ ሸቂዛ ዶርሳ ላቃኔ ዋጋራ ሚላ ዛይቲዛ ኤኪዲ ያኔ ሃ ቃሴሊዛ ያርሾ ኦሊ ጎዳ ሲንላን ያርሾ።

25 ቆሆ ገሻሰ ሸቂዛ ያርሾሰ ሸቂዳ ዶርሳ ላቃ ሹኮ፤ ሱላፌ ጉላራ ኤኪዲ ጌይዛዴሰ ኡሻቻ ኩሼ ማንላ ቢራጴ፤ ኡሻቻ ቶሆ ማንላ ቢራጴ፤ ኡሻቻ ሃይላ ጴራ ቲዮ።

26 ቄሴዚ ዛይቲዛፔ ጉላራ ባ ሃዲርሳ ኩሼ ቃኢን ቲጎ።

27 ባ ኡሻቻ ኩሼ ቢራጴን ጉላራ ቦቺዲ ጸሳ ሲንላን ላፑንቶ ወጸ።

28 ባ ኩሼ ቃኢን ቲጌዳ ዛይቲፔ ጉላራ ኤኪዲ ቆሆ ያርሾ ሱላን ቦቺዳሶን ሄሲካ ጌይዛዴሰ ኡሻቻ ሃይላ ጴራ፤ ኡሻቻ ኩሼ ማንላ ቢራጴ ጴራ፤ ኡሻቻ ቶሆ ማንላ ቢራጴ ጴራ ቦሺሶ።

29 ቄሴዚ ባ ኩሼን ኣቲዳ ዛይቲዛ ኣዴዛ ሁኤን ጉሶ፤ ሄሳሶ ኦሊዲ ጌሾ ዋጋ ጎዳ ሲንላን ፖሎ።

30 ሄሳፌ ጉዬ ሃራጴታ ዋይኮ ዋናሴታ ጌይዛዴ ዋልቃይ ጋሊዳ ከና ቄሴዚ ያርሾ።

31 ሄይታንታፌ ኢሳ ናጋራሰ ሸቂዛ ያርሾሰ ናምኢንሶዛ ቃሴ ጸጌቲዛ ያርሾሰ ካላ ያርሾራ ጋሊ ሺሾ፤ ቄሴዚ ኡባካ ሃይሳ ማላን ጌይዛዴ ናጋራፔ ጌሾ።

32 ኣሳፔ ጌዴ ሃራ ኣሳን ኣጳዛ ኢታ ጋልባ ሃርጌፌ ጌያናሰ ኮሺዛ ዋጋ ፖላናሰ ዳንዳዮንታ ማንቆ ኣሳሰ ዲዛ ዋጋይ ሃይሳ» ጌዴሰ።

ቡቃይ ቤቲዳ ኬላ ጌሾ ዋጋ

33 ጎዳይ ሙሴሲኔ ኣርኔሰ ሂዝጊዴሰ፤

34 «ታኒ ኢንቴሰ አሚዛ ካናኔ ቢታ ኢንቴ ጌሊዛ ዋዴ ኢሲ ኬላን ታኒ ቡቃ ዬጊኮ፤

35 ሄ ኬላዴይ ቢዲ ቄሴዛ፤ ታሶን ኣይ ኢታ ሃርጌይ ዲዛኮ» ጌዲ ዮቶ።

36 ሶን ዲዛ ሚሽ ኡባይ ቱና ጌቱቸንታ ማላ ቄሴዚ ሄ ኢታ ሃርጋ ቤያናሰ ጌላናፔ ካሴቲዲ ሶን ዲዛ ሚሽ ኡባ ካሬ ኬሳና ማላ አዛዘ፤ ሄሳፌ ጉዬ ቄሴዚ ጸላናሰ ኬላ ጊዶ ጌሎ።

37 ሃርጌዛ ሎኤሊ ፓጪ ጸሊዛ ዋዴ ኬላ ሉኪ ሉኪ ሚዛ ሃርጌዛሰ ሜቆይ ማታ ማላ ጨለላ ዋይኮ ዞኦ ዋይኮ ፑንጫርካ ሚሳቲ ቤቲኮ።

38 ቄሴዚ ሄ ኬላፌ ኬዚዲ ኬላይ ላፑን ጋላሰ ጋካናሰ ጎርዴታና ማላ አሉ።

39 ቄሴዚ ላፑንላ ጋላሰ ሲሚዲ ቃሴካ ጸሎ፤ ሃርጌዚ ካሴፔ ጌዴ ዳሪ ዳሪ ቢኮ።

40 ሃርጌይ ኢሰታ ሶላ ቤቲዳ ሹቻቲ ኬላፌ ዋጮቲ ኬዚዲ ካታማፔ ጌዴ ካሬን ዲዛ ቱና ሚሽ ዩጌቲዛሶን ዩጌታና ማላ አዛዘ።

41 ሄሳፌ ጉዬ ኬላሰ ሶ ባጋ ጌሪዲ ሄ ጌሬላዛ ካታማፔ ካሬ ባጋራ ቱና ሚሽ ዩጌዛሶን ዩጋና ማላ አዛዘ።

42 ሄሳፌ ጉዬ ካሴ ሹቻታ ሶሆን ሃራ ኦራላ ሹቺ ጌሊን ሄ ኬላን ሃራ ኦራላ ኡርቃይ ሚሹቶ።

43 «ሹቻቲ ዲጌቲን ቃሴካ ኡርቃካ ቆቆፊዲ ሃራ ኡርቃን ሚሽ ኦራሊዳፔ ጉዬ ሄ ሃርጌዛ ማላታይ ቃሴካ ሲሚ ቤቲኮ።

44 ቄሴዚ ሲሚ ቢዲ ቤዮ፤ ሃርጌዚ ካሴፔ ጌዴ አኪ አኪ ቢዛ ማላ ጊዲኮ ሄ ሃርጌይ ኢሳፌ ኢሳን አፂዛ ኢታ ሃርጌ ጊዲዳ ጊሻሰ ሄ ኬላይ ቱና።

45 ሄሳ ጊሻሰ ሄ ኬላይ ላሌታናሰ ቤሴሰ፤ ሄ ኬላ ሹቻይ፤ ሚላይኔ ሚሹ፤ ኡርቃይ ወሪካ ካታማፔ ጌዴ ካሬ ቱና ሚሽ ዩጌቲዛሶን ዩጌቶ።

46 ጎርዴቲዳፔ ጉዬ ሄ ኬላን ጌሊዳ አሲ ወሪካ ኦማርሰ ጋካናሰ ቱና ጌዴሰ።

47 ሄ ኬላን ኢቺዳዴይ ዋይኮ ካላ ሚዳዴይ ባ ማይኦ ሜጮ።

48 «ኬላይ ቃሴካ ኦራጲዲ ሚሹቲዳፔ ጉዬ ቄሴዚ ዪዲ ጸሊሺን ሃርጌዚ ካሴፔ አኪ አኪ ሶንታ አጊኮ፤ ሃርጌዛ ማላታይ ቆይዳ ጊሻሰ፤ ሄ ኬላይ ጌሽ ጊዲዳ ጊሻሰ ቄሴዚ ኬላ አዋ ኤሪሶ።

49 ሄ ኬላ ጌሻናሰ ናምኡ ካፎ፤ ሊባናሴ ዚጋ፤ ዞኦ ጸላታኔ ሂሶጴ ጌቲቲዛ ሚላ ሃይላ ኤሆ።

50 ካፎታፔ ኢሳ ፑልቶ ሃሊ ኢዛን ዲዛ ጉቃ ኬሬን ሹኮ፤

51 ሄሳፌ ጉዬ ዚጋ ሚላ፤ ሂሶጴ ሚላ ሃይላ፤ ዞኦ ጸላታኔ ፓጸ ዲዛ ካፎዛ ኢሲፌ ጋሊ ኤኪዲ ጉቃ ኬሬን ዲዛ ፑልቶ

ሃላኒኔ ሃንኮ ሹኩቲዳ ካፎዛ ሱላን ጌልላ ኬሲዲ ኬላዛ ላፑንቶ አራጮ።

52 ቄሴዚ ሃሳላ ሂሰቲዲ ሄ ኬላ ካፎዛ ሱላን፣ ፑልቶ ሃላን፣ ፓጻ ዲዛ ካፎን፣ ዚጋ ሚላን፣ ሂሶጼ ሚላ ሃይላኒኔ ዞኑ ጸላታን ጌሹ።

53 ሃሳፌ ጉዬ ፓጻ ዲዛ ካፎዛ ኢዚ ፒራጂ ባና ማላ ጌዴ ዴምባ ኬሲ ዬዶ፤ ሃሳላ ኦሊዲ ኬላ ጌሺዛ ዋጋ ፖሊኮ ኬላይካ ጌሽ ጊዴሰ።»

54 ሃይሲ ሃ ዋጋዚ ኢሳፌ ኢሳን ኣጂዛ ጋልባ ቦላ ኬዚዛ ኣይ ሃርጌስ፣ ቃቻ ሃርጌስ፣

55 ማይኦ ቦላኔ ኬላ ቦላ ኢሳፌ ኢሳን ኣጂ ኣጂ ዬዛ ሃርጌስ፣

56 ኪጸ ሃርጌስ፣ ባጂንቴሲኔ ኢለዋ ሃርጌስ፣

57 ሃይሲ ኣይ ሚሺካ ቱና ዋይኮ ጌሽ ጊዲዳይሳ ሻኪ ኤሪሳናሲኔ ኢሳፌ ኢሳን ኣጂዛ ኢታ ሃርጌ ዋይኮ ቡቃ ጌሻናሰ ዲዛ ዋጋ።

15

ኣሳፔ ጎጊ ኬዚዲ ኣሰ ቱኒሲዛ ሚሽ

1 ጎዳይ ሙሴሲኔ ኣርኔሰ ሂዝጊዴሰ፣

2 «ኣይ ኣሳሰካ ኢዛዴ ኣሳቴላፌ ጎጊዛ ሚሺ ዲኮ ሃሳዴይ ቱና ጋዳ ኢሰራኤሌ ኣሳሰ ዮታ።

3 ኣሳቴላፌ ጎጊ ኬዚዛይሲ ኣጎንታ ኢጸኮ ዋይኮ ጎጌላ ኣጊኮካ ሃሳዴይ ቱና።

4 «ሃሳዴይ ኢዛ ቦላ ኢቺዳ ሂሊ፣ ኡቲዳ ኣይ ሚሺካ ቱና ጊዴሰ።

5 ሂጸዛ ቦቺዳ ኣይ ኣሲካ ባ ማይኦኔ ባ ቦላ ሃላን ሜጮ፤ ጊዲኮካ ሃሳዴይ ኦማርሰ ጋካናሰ ቱና ጊዴ።

6 ኣሳቴላፌ ቱኒሲዛ ሚሺ ጎጊ ኬዚዛ ኣሲ ኡቲዳሶሆን ኡቲዳ ኣይ ኣሲካ ባ ማይኦኔ ባ ቦላ ሃላን ሜጮ፤ ጊዲኮካ ሃሳዴይ ኦማርሰ ጋካናሰ ቱና ጊዴ።

7 «ኣሳቴላፌ ቱኒሲዛ ሚሺ ጎጊ ኬዚዛ ኣሰ ቦቺዳይ ኣይ ኣሲካ ባ ማይኦኔ ባ ቦላ ሃላን ሜጮ፤ ጊዲኮካ ኦማርሰ ጋካናሰ ቱና ጊዴ።

8 «ኣሳቴላፌ ቱኒሲዛ ሚሺ ጎጊ ኬዚዛ ኣሲ ሃንኮ ፓጻ ዲዛ ኣሳ ቦላ ጨቕ ጨቲኮ ሄ ጨቻይ ኢዛ ቦቺዳ ኣሲ ባ ማይኦኔ ባ ቦላ ሃላን ሜጮ፤ ጊዲኮካ ሃሳዴይ ኦማርሰ ጋካናሰ ቱና ጊዴ።

9 «አሳቴላፌ ቱኒሲዛ ሚሺ ጎጊ ከዚዛ አሲ ኡቲዳ ኮራ ኡባይ ቱና፤

10 ሄሳዴይ ኢዛ ቦላ ኡቲዳ ሚሽ ቦቺዳ አሲ ኡባይ ኦማርስ ጋካናስ ቱና፤ ጊዶ አቲን ሄ ቱኒዳ ኢሲ ሚሻታፔ ኢሳ ዴንሊዳ ኣይ አሲካ ባ ማይኦኔ ባ ቦላ ሜጮ፤ ጊዲኮካ ኢዚ ኦማርስ ጋካናስ ቱና ጊዶ።

11 «አሳቴላፌ ቱኒሲዛ ሚሺ ጎጊ ከዚዛ አሲ ባ ኩሼ ሜጮቶንታ ዲሼ ሃራ ቦቺኮ ሄ ቦሼቲዳዴይ ባ ማይኦኔ ባ ቦላ ሃላን ሜጮ፤ ጊዲኮካ ኦማርስ ጋካናስ ቱና ጊዶ።

12 አሳቴላፌ ቱኒሲዛ ሚሺ ጎጊ ከዚዛ አሲ ቦቺዳ ማና ሚሺ ሜቆ፤ ሚላፌ ኦሴቲዳ ሚሺ ወሪካ ሃላን ሜጮቶ።

13 «አሳቴላፌ ቱኒሲዛ ሚሺ ጎጊ ከዚዛ አሲ ሄ ሃርጌዛፔ ፓጺኮ ካሴ ዲዛ ማላ ባ ፓጺዳይሳ ኤሪሳናስ ላቸን ጋላስ ጋካናስ ጋምኢሾ፤ ሄሳፌ ጉዬ ባ ማይኦ ሜጮ፤ ቃሴካ ባ ቦላ ጸሎ ጊዲዳ ፑልቶ ሃላን ሜጮቶ፤ ሂስቲዲ ጌሽ ጊዶ።

14 አስቸንላ ጋላስ ናምኡ ሃራጴታ ዎይኮ ናምኡ ሃራጴ ጨዬታ ጋይቶቴላ ዱንካኔ ፔንጌ ኤፊዲ ጎዳ ሲንላን ቄሴዛስ አሞ።

15 ቄሴዚካ ሃራጴታ ኤኪዲ ኢሳ ናጋራ ወርሶስ ያርሾ፤ ሃንኮይሳ ቃሴ ጸጌቲዛ ያርሾ ሂስቲ ያርሾ፤ ሄሳላ ሂስቲዲ ቄሴዚ ሄሳዴ ጎጊ ከዚዛ ሚሻስ ጌይዛ ዎጋ ጎዳ ሲንላን ፖሎ።

16 «ኣይ አሲካ ኢዛ አቱማቴላፌ ዜሬሊ ጉኪኮ ኢዚ ባ ቦላ ሜጮቶ፤ ጊዲኮካ ኦማርስ ጋካናስ ቱና ጊዶ።

17 ዜሬላይ ኢዛ ቦላ ጉኪዳ ኣይ ማይኦ ጊዲን ዎይኮ ጋልባ ጊዲኮ ሃላን ሜጮቶ፤ ጊዲኮካ ኦማርስ ጋካናስ ቱና ጊዶ።

18 ኣዴይ ማጫሳራ ዚንኢ ዴንዲዳፔ ጉዬ ናምኣይካ ባንታ ቦላ ሃላን ሜጮቶ፤ ጊዲኮካ ኦማርስ ጋካናስ ቱና ጊዳቶ።

19 «ማጫሳስ አጊናን አጊናን ዪዛ ዎጋይ ቤቲኮ ላቸን ጋላስ ጋካናስ ኢዛ ቱና ጊዱ፤ ኢዞ ቦቺዛ ኣይ አሲካ ኦማርስ ጋካናስ ቱና ጊዶ።

20 ማጫሳስ አጊናን አጊናን ዲዛ ዎጋይ ዪዛ ዎዴ ኢዛ ኡቲዛሶይኔ ኢቺዳሶይ ኡባይ ቱና ጊዶ።

21 ኢዛ ኢቺዳ ሂጸ ቦቺዳ ኣይ አሲካ ባ ማይኦኔ ባ ቦላ ሜጮ፤ ጊዲኮካ ኦማርስ ጋካናስ ቱና ጊዶ፤

22 ኢዛ ኡቲዳ ኣይ ሚሺካ ቦቺዳዴይ ባ ማይኦኔ ባ ቦላ ሜጮ፤ ጊዲኮካ ኦማርስ ጋካናስ ቱና ጊዶ።

23 ኢዛ ኢቺዳሶ ዎይኮ ኡቲዳሶ ሚሽ ቦቺዳ ኣይ አሲካ ኦማርስ ጋካናስ ቱና ጊዶ።

24 አገሩን አገሩን በቲዛ ማጫሳ ዋጋይ ዪዛ ዋዴ ኢዚራ ዚንኢዛ አይ አዳይካ ኢዚ ማላ ቱና ጊዲዛ ጊሻሰ ላቸን ጋላሰ ጋካናሰ ቱና ጊዶ፤ ኢዚ ኢቺዛ ሂጻይ ቱና ጊዳሰ።

25 ኢሲ ማጫሳሰ አገሩን አገሩን በቲዛ ማጫሳ ዋጋይ ጉኪዛ ዋዴፔ ዳሮ ጋላሰ ጉኪኮ ዋይኮ አገሩን አገሩን በቲዛ ዋዴዛፔ ቦላራ አጎንታ ሱሊ ጉኪኮ ሄ ሱላይ ኤቃና ጋካናሰ ኢዛ ቱና ጊዳዉሰ።

26 ሄ ዋዴ ኢዛ ኢቺዳ ሂጻ ጊዲን ዋይኮ ኢዛ ኢዛ ቦላ ኡቲዳ ሚሺ አገሩን አገሩን በቲዛ ማጫሳ ዋጋይ ዲዛ ዋዴ ሃኒዛ ማላ ኡባ ዋዴ ቱና።

27 ሄይታ ቦቺዳ አይ አሲካ ቱኒዳ ጊሻሰ ባ ማይኦኔ ባ ቦላ ሚጮ፤ ጊዲኮካ ኦማርሰ ጋካናሰ ቱና ጊዶ።

28 «ኢዚፔ ጉኪዛ ሱላይ ኤቁኮ ሄ ሱላይ ኤቆ ጋላሳፌ ቢዲ ላቸን ጋላሰ ጋካናሰ ጋሞኦዳ ሄሳፌ ጉዬ ዋጋይ ጊዛ ማላ ጌዩ።

29 ኦሰቸንላ ጋላሰ ናሞኡ ሃራጴታ ዋይኮ ናሞኡ ዋናሴታ ጋይቶቴላ ዱንካኔ ፔንጌ ኤካ ያዳ ቄሴዛሰ ኢሙ።

30 ቄሴዚካ ኢሳ ናጋራፔ ጌሺዛ ያርሾሰ ናሞኦንላዛካ ጸጌቲዛ ያርሾሰ ሺሾ፤ ሂሰቲዲ ሄ ማጫሳዮ ቱናቴላፌ ጌሺዛ ዋጋ ፖሎ።

31 «ሄን ኢሰታ ጊዶን ዲዛ ጋይቶቴላ ዱንካኔ ቱኒሲዲ ሃይቆንታ ማላ ኢሰራኤሌ ናይታ ቱኒሲዛ ሚሻፌ ናጌቱ።»

32 ቱኒሲዛ ሚሺ ኢዛ አሳቴላፌ ጎጊ ኬዚዛዴሲኔ ኢዛ አቱማቴላፌ ዜሬሊ ጉኪዛዴሰ፤

33 ቃሴካ አገሩን አገሩን በቲዛ ማጫሳ ዋጋይ በቲዛ ማጫሳሰ ዋይኮ አዳ ጊዲን ማጫ ጊዲን ቱኒሲዛ ሚሺ ኢሰታ አሳቴላፌ ጎጊዛ ዋዴ ዋይኮ ጌዮንታ ማጫሳራ ዚንኢዛ አቱማሳሰ ዋዲዳ ዋጋይ ሄሳ።

16

ጌሾ ጋላሰ

1 እርኔ አቱማ ና ናሞኦቲ በሶንታ ታማ ጎዳ ሲንሐ ኤኪ ሸቂዳ ጊሻሰ ሃይቂዳ፤ ሄሳፌ ጉዬ ጎዳይ ሙሴሰ ሂዝጊዴሰ፤

2 «ኔ ኢሻ እርኔይ ታቦታ ቦላን ዲዛ አቶ ጊዛሶዛ ካሚዛይሳ ሲንላን ማጋላሻፔ ጉዬ ባጋራ ዲዛ ኬሂ ዲማ ጌቱቲዛሶዛ ባ ሼኔ ማላ ኡባ ዋዴ ጌሎንታ ማላ ኢዛሰ ዮታ፤ ኢዚ ኡባ ዋዴ

ባ ሸኔን ጌሊዛ ጊዲኮ ሃይቃና፤ ጋሶይካ ታኒ ሻራ ጊደራ አቶ ጊዛሶዛ ካማ ቦላ ቆንጫይሰ።

3 «አሮኔይ ናጋራፔ ማሬሊዛ ያርሾሰ ኢሲ ሚርኅ ቦራኔ ቃሴ ጸጌቲዛ ያርሾሰ ኢሲ ቆርሾ ኤኪዲ ኬሂ ዲማ ጌቲቲዛሶዛ ጌሎ።

4 አሮኔይ ኬሂ ዲማ ጌቲቲዛሶ ጌላናፔ ካሴ ማይኦቲ ዲማ ጊዲዳ ጊሻሰ ባ ቦላ ሜጨቲዲ ቄሴቲላ ማይኦ ማይኦ፤ ሄሲካ ላይኖፔ ኦሴቲዳ ቃሚሳኔ ሱሬ ማይኦ፤ ሄሳሶካ ላይኖፔ ኦሴቲዳ ቃባቶን ጊጸ፤ ላይኖፔ ኦሴቲዳ ጎሴካ ጎዞ።

5 «ኢሰራኤሌ ናይታ ማባራይ ናጋራ ጊሻሰ ሸሺዛ ያርሾሰ ናምኡ ዳይሻ ኦርጌኔ ጸጌቲዛ ያርሾሰ ኢሲ ቆርሾ አሮኔስ ኤሄቶ።

6 አሮኔይ ባሲኔ ባሶ አሳ ናጋራ ወርሳናሰ ኢሲ ኮርማ ቦራ ያርሾሰ ሸሾ።

7 ሂሳፌ ጉዬ ሄ ናምኡ ዳይሻ ኦርጌታ ጌዴ ጋይቶቲላ ዱንካኔዛ ፔንጌን ጎዳ ሲንሳ ኤፎ።

8 ሂሰቲዲ ሄ ናምኡ ኦርጌታ ቦላ ኢዚ ሳማ ዬጎ፤ ሄይታፔ ኢሶይ፥ ሳዳ፥ ናምኦንሶዚ፥ ሳዛዜሌ)* ጊዛ ማላታይ ዲዛ ሹቻታ ኦርጌታ ቦላ ዬጎ።

9 ጎዳሰ ጊዛ ማላታይ ኢዛ ቦላ ዋዲዳ ዳይሻዛ ናጋራፔ ጌሺዛ ያርሾሰ ሹኮ።

10 አዛዜሌሰ ጊዛ ማላታይ ኢዛ ቦላ ዋዲዳ ዳይሻዚ ሹኬቶንታ ፓጻ ጎዳሰ ሸቆ፤ ዳሬዛ ናጋራ ቶኪዲ ዱጌ ባዞ ዬዴቶ።

11 «አሮኔይካ ኮርማ ቦራዛ ባ ናጋራ ወርሳናሰኔ ባሶ አሳ ናጋራ ወርሳናሰ ያርሾ ሹኮ።

12 ቃሴ ጎዳ ሲንሳን ዲዛ ያርሾ ያርሺዛሶፔ ኤጻኔ ጨዋሲዛ ሚሻ † ኩሜላ ቦንቆኔ ሊቂ ጋጨቲዳ ናምኡ ዞሌ ሳዊዛ ኤጻኔ ኤኪዲ ማጋላሻ ጊደን ዲዛ ኬሂ ዲማ ጊዲዳ ኪፊሌ ኤሆ።

13 ኤጻኔዛ ሄን ጎዳ ሲንሳን ታማን ዬጎ፤ ኢዚ ኢዛ ቤኢዲ ሃይቆንታ ማላ ኤጻኔዛ ጨዋይ ታቦታ ካሚዛይሳ ኡባ ጌንሶ።

14 ኮርማዛ ሱላፌ ጉላራ ኤኪዲ ኢዛን ባ ቢራጼ ጌልሊ ጌልሊዲ ታቦታ ካማዛ ቦላ ሲንሳ ባጋራ አራጮ፤ ሄሳሶካ ኢዛፔ ጉላራ ጫቆ ቃላ ታቦታ ሲንሳን ላፑንቶ ወጸ።

16:2 ኢብ 6:19 16:3 ኢብ 9:7 * 16:8 አዛዜሌ፡ አዛዜሌ ጊዛይሳሰ ኢብራዊ ቃላሩ ቢርሼሊ ኤሬቲና፤ ባዞን ዲዛ ጸላኤ ጊደንታ ኣጌና ጌቲሰ። † 16:12 ኤጻኔ ጨዋሲዛ ሚሻ፡ ኤጻኔ ጨዋሲዛ ሚሻ ጊዛይሲ አማራሳ ቃላሩ ጸና ጌቲቲሰ።

15 «ሄሳፌ ጉዬ ሃንኮ ዳሬዛ ናጋራ ገሻሰ ሹኬቲዛ ዳይሻ ሹኮ፤ ኢዛ ሱላ ከሂ ዱማ ጌቲቲዛ ኪፊሌዛ ጌልሊዱ ካሴ ኮርማዛ ሱላ አሶይሳሶ አቶ ገዛሶ ታቦታ ካማዛ ቦላኒኔ ኢዛሰ ሲንላ ባጋራ ላፑንቶ ወጸ።

16 ሄሳሶካ ኦሊዱ ከሂ ዱማ ገዱዳ ኪፊሌዛ ኢሰራኤሌ ናይታ ቱናቴላፌኔ ኢሰታ ናጋራ ኡባፌ ጌሻናሰ ጌሾ ዋጋ ፖሎ፤ ካሴ ኢሰቲ ቱና ሚሽ ኦሊሺን ኢሰታ ገደን ዱዛ ጋይቶቴላ ዱንካኔዛካ ሄሳሶ ጌሾ።

17 ጌሾ ዋጋ ፖላናሰ አሮኔይ ከሂ ዱማ ጌቲቲዛ ኪፊሌዛ ጌሊዱ ባ ናጋራ ገሻሰ፤ ባሶ አሳ ናጋራ ገሻሲኔ ኢሰራኤሌ ዳሬ ናጋራ ገሻሰ ያርሾ ሺሺ ማሪሲዱ ከዛና ጋካናሰ ኣይ ኣሲካ ጋይቶቴላ ዱንካኔዛ ገደን ደፖ።

18 ሄሳፌ ካሊዱ ኢዚ ጎዳ ሲንላን ያርሾ ያርሺዛሶ ከዚዱ ጌሾ፤ ኮርማ ሱላፌኔ ዳይሻ ሱላፌ ጉላራ ኤኪዱ ያርሾ ያርሺዛሶዛን ዩዩ አቆናሰ ዱዛ ዴሞታ ቲዮ።

19 ቃሴ ኢሰራኤሌ ናይታ ቱናቴላፌ ያርሾ ያርሺዛሶዛ ጌሻናሲኔ ዱማሳናሰ ሱላፌ ጉላራ ኤኪዱ ባ ቢራዴ ዴራን ያርሾ ያርሺዛሶዛ ቦላ ላፑንቶ ወጸ።

ባዞ ጎዴቲዛ ዳይሽ

20 «አሮኔይ ከሂ ዱማ ጌቲቲዛሶ፤ ጋይቶቴላ ዱንካኔኔ ያርሾ ያርሺዛሶዛ ጌሾ ዋጋ ፖሊዳፔ ጉዬ ሹኬቶንታ ኣቲዳ ባቃ ዳይሻ ኤኪዱ ጎዳሰ ሺሾ።

21 ባ ኩሼ ናሞኣታ ዳይሻ ሁኤ ቦላ ዋሊዱ ዳሬዛ ናጋራ፤ ኢታቴላኔ ማካላቴላ ኡባ ፓጾ፤ ዳይሻዛ ሁኤ ቦላ ዩሺ ፒቲሼ ዳራ ናጋራ ኢዛ ቦላ ዋሶ፤ ሄሳፌ ጉዬ ካሴ ዳይሻዛ ኤፋናሰ ጌቲቲ ኡቲዳዴ ቦላ ዱጌ ባዞ ዬዴቶ።

22 ሄሲካ ዳይሻይ አሳ ኡባ ናጋራ ኡባ ቶኪዱ ኣይ ኣሲካ ባይንዳሶ ዱጌ ባዞ ሃሲ ዬዶ።

23 «አሮኔይካ ጋይቶቴላ ዱንካና ገደ ጌሎ፤ ጌዴ ከሂ ዱማ ጌቲቲዛ ኪፊሌዛ ጌላናፔ ካሴቲዱ ኢዚ ካሴ ማይኢዳ ቄሴቴላ ማይኦዛ ሄን ቃሪ ዋሶ።

24 ባ ቦላ ሄን ጌሻሶሆን ማጮቲዱ ባ ካሴ ማይኢዛ ማይኦ፤ ሄፔ ከዚዱ ባ ናጋራ ወርሳናሲኔ ዳራ ናጋራ ወርሳናሰ ጸጌቲዛ ያርሾ ሺሾ።

25 ናጋራ ወርሳናስ ሸቂዳ ሜሄዛ ሞጂ ያርሾ ያርሺዛሶዛ ቦላ ጹጎ።

26 «ባዘ ዩዴቲዛ ዳይሻ ዱጌ ባዘ ላጊ ኤፊዳዴይ ጉዬ አሳይ ዲዛሶ ሲሚ ጌላናፔ ካሰቲዲ ባ ማይኦ ሜጮ፤ ባ ቦላካ ሜጮቶ፤ ሄሳፌ ጉዬ አሳይ ዲዛሶ ጌሎ።

27 ናጋራ ጊሻስ ያርሼታና ሸቂዳይታኔ ናጋራ ጌሻናስ ኢስታ ሱሉ ከሂ ዱማ ኪፊሌ ጌቲቲዛሶ ጌሊዳ ኮርማዛኔ ዳይሻዛ አሾይ፥ ጋልባዚኔ ቶጮይ አቶንታ አሲ ዲዛሶፔ ጌዴ ሃራሶ ቢዲ ጹጌቶ።

28 ሄሳ ኡባ ጸጊዛዴይ ጸጊዲ አሲ ዲዛሶ ሲሚ ጌላናፔ ካሰቲዲ ባ ማይኦ ሃላን ሜጮ፤ ባ ቦላካ ሜጮቶ።

ጌሾ ጋላስ ቦንቻናስ አሜቲዳ ዋጋ

29 «ሃይሳፌ ካሊዲ አንቴስ አሜቲዛ ዋጋታ ሃይሳፌ ጉዬ ያና ላይላታን ኡባን ላሜቶንታ ኤቂ ዲዛ ዋጋ ሂስቲዲ ናጊቲ፤ ላይላፌ ላፑንላ አጊናይ ጌሊዳ ታማንሶ ጋላስ ኢስራኤሌ ዴሬ አሳይኔ ኢስታ ጋርሳን ዲዛ ሃራ ዴሬ አሳይ ጸማ ጸማናስ ቤሴስ፤ ሄ ጋላስ አይ አሶይካ አሴቶ።

30 ሄ ጋላስ አንቴ ናጋራይ ኪቻና ማላኔ አንቴ ጌያና ማላ ጌሾ ዋጋይ ፖሌቲዛ ጊሻስ አንቴ ጎዳ ሲንላን አንቴ ናጋራ ኡባፌ ጌዬዳይታ ጊዳና።

31 ሄ ጋላሳይ ጸማ ጋላሲኔ ሼምፖ ሼምፒዛ ሳምባታ ጋላስ ጊዶ፤ ሄሲካ ሜርና ዋጋ ጊዶ፤

32 ባ አዋ ሶዎን ቄሴታ ሃላቃ ጊዳናስ ቲዬቲዳኔ ሹሜቲዳ ቄሴይ ናጋራ ኡባ ዋጋ ፖላናስ ባ ቄሴቲላ ማይኦዛ ማይኢዲ ፖሎ።

33 ኢዚካ ከሂ ዱማ ኪፊሌዛ፥ ያርሾ ያርሺዛሶዛ፥ ጋይቶቲላ ዱንካኔዛ፤ ቄሴታኔ ኢስራኤሌ አሳ ኡባ ናጋራ ወርሶ።

34 ኢስራኤሌ አሳ ናጋራ ኡባ ዋጋ አንቴ ላይላን ላይላን ኢሲቶ ፖላና ማላ ሄሲ አንቴስ ሜርናስ ላሜቶንታ ዋጋ ጊዶ።»

ሄሳሶ ጎዳይ ኢዛ አዛዚዳ ማላ ሙሴይ ኦሊዴስ።

17

ሱሉ ኡዬቶንታ ማላ አሜቲዳ ዋጋ

1 ጎዳይ ሙሴስ ሂዝጊዴስ፤

2 « ረጎዳይ አዛዚዳ አዛዘይ ሃይሳን ጋዳ አርኔስ፥ ኢዛ ናይታሲኔ ኢስራኤሌ አሲ ኡባይ ዲዛ ሄራን ዮታ፤

3 ወይኮ ባ ዲዛ ሄራፔ ካሬን ቦራ ወይኮ ደርሰ ወይኮ ዳይሼ ያርሾ ሹኪዲ፡

4 ጎዳሰ ዲማቲዳሶን ጸሳሰ ያርሻናሰ ጋይቶቲፋ ዲንካኔ ፔንጌ ኤሆንታ ኣጊኮ ሄሳዳይ ሱፋ ጮ ሃዳ ጉሲዳ ማላ ቆዳቲዲ ዳሬ ጊዳፌ ሻኬቲ ጎዳቶ፡፡

5 ሄሳ ጊሻሰ ኢሰራኤል ናይቲ ኣይ ሜሄ ጊዲን ጮ ዳምባን ሹኮንታ ጎዳ ሲንሰ ጋይቶቲፋ ዲንካኔ ፔንጌ ኤሄቶ፤ ሜሄታ ዲንካኔ ፔንጌ ኤሂዲ ቄሴዛሰ ኢሜቶ፤ ቄሴዚካ ኢሲፊቲፋ ያርሾ ሂሰቲ ሹኮ፡፡

6 ቄሴዚካ ሱፋ ጋይቶቲፋ ዲንካኔ ፔንጌን ዲዛ ጎዳሰ ያርሾ ያርሺዛሶዛ ቦላ ወጸ፤ ጎዳ ኡፋይሲዛ ሎኦ ሳዎ ጊዳና ማላ ዋጄዛ ታማን ጸጎ፡፡

7 ኢሰራኤል ናይቲ ኢሰታ ኣማኖፔ ሃሲዛ ዳይዳንፋታሰ ያርሾ ኦላዲ ባ ሜሄ ቤቶሶን ቤቶሶን ያርሾሰ ሹካናሰ ቤሲና፤ ሂሲካ ኢሰታሲኔ ኢሰታፌ ጉዬ ዬሌታ ኡባሰ ሜርና ዎጋ ጊዲ ዳኦ፡፡

8-9 «ኔ ኢሰታሰ፡ ሓሰራኤል ናይታፔ ጊዲን ወይኮ ኢሰታራ ዲዛ ሃራ ዳሬ ኣሰ ጊዲን ዲንካኔዛ ፔንጌፌ ኣቲን ሃራሶን ኣዋንካ ጎዳሰ ጸጌቲዛ ያርሾ ወይኮ ሃራ ያርሾ ያርሺኮ ሄሳዳይ ጎዳ ዳሬታራ ቆዳታናሰ ቤሴና፡፡ ጋ ዮታ፡፡

10 «ኢሰራኤል ኣሰ ጊዲዳይ ኦኒካ ወይኮ ኢሰራኤል ናይታራ ኢሲፌ ዲዛ ሃራ ዳሬ ኣሲ ሱሰ ኡዩኮ ሄሳዳይ ታ ኣቻን ኢጾቲዳዳ ጊዳሰ፤ ታኒ ሄሳዳ ኢዛ ዳሬ ጋርሳፌ ሻካ ጳይሳና፡፡

11 ሽምፖራ ፓጸ ዲዛ ሜጴቲሰ ኡባሰ ሽምፖይ ሱፋ ጊዲን ዳሰ፤ ሄሳ ጊሻሰ ኣሳ ናጋራ ወርሳናሰ ጉኪዛ ሱላ ወሪካ ያርሾ ያርሺዛሶዛ ቦላ ጉካና ማላ ኢማዲሰ፤ ኣሳ ሽምፖ ናጋራፔ ማሪሲዛይ ሱፋ፡፡

12 ሄሳ ጊሻሰ ኢሰራኤል ኣሳ፡ ሓኒቴፌ ወይኮ ኢንቴ ጊዲን ዲዛ ሃራ ዳሬ ኣሳፔ ኦኒካ ሱሰ ኡዮፖ፡፡ ጋይሰ፡፡

13 «ኢሰራኤል ናይታፔ ወይኮ ኢሰታራ ዲዛ ሃራ ዳሬ ኣሳፔ ኦኒካ ኣሾይ ሜቲታና ማላ ኢሜቲዳ ሜሄ ጊዲን ወይኮ ዋራ ዶኣ ወይኮ ካፎ ሻንካቲ ኦይኪዲ ኢዛ ሱፋ ቢታ ቦላ ጉሲዲ ቢታ ኢዛ ቦላ ካዎ፡፡

14 ጋሶይካ ኣሾ ማይኢዳ ኡባ ሽምፖይ ሱፋ ጊዲን ዳሰ፤ ሄሳ ጊሻሰ ታኒ ኢሰራኤል ኣሳ፡ ሓሾ ማይኢዳ ሜጴታ ኡባ ሽምፖይ

ኢዛ ሱላ ጊደን ዲዛ ገሻሰ ሱሐ ሞጥቴ፤ ሚዳዳይ ኦኒካ ባ ዳሬ ጊደፌ ሻኬቲ ጳዮ» ጋይሰ።

15 «ኢሰራኤል ናይታፔ ዋይኮ ሃራ ዳሬ ኣሳፔ ኦኒካ ባወቲ ሃይቂዳዝ ዋይኮ ዶኣይ ዋጲዳ ሜሄ ኣሾ ሚኮ ባ ማይኦ ሜጮ፤ ባ ቦላ ሜጮቶ፤ ጊዲኮካ ኦማርሰ ጋካናሰ ቱና ጊደ፤ ሃሳፌ ጉዬ ጌሽ ጊደ።

16 ባ ማይኦ ሜጮንታ ኣጊኮኔ ባ ቦላ ሜጮቶንታ ኣጊኮ ሃሳዳይ ናጋራ ኦሒዳ ገሻሰ ባ ናጋራን ኦይሼታና።»

18

ዋጋን ዲጌቲዳ ዚንኦ

1 ጎዳይ ሙሴስ ሂዘጊ ዮቲዳስ፤

2 «ኢሰራኤል ናይታሰ፤ ታኒ ጎዳ ኢንቴ ጸሳ፤

3 ካሴ ኢንቴ ሄን ዳኢዳ ጊብጼ ቢታ ኣሳይ ዋይኮ ቡር ታ ኢንቴና ጌልላና ካናኔ ቢታን ዲዛ ዳሬ ኣሳይ ኦሒዛ ሻቲዛ ኦሶ ኢንቴ ኦሶፍቴኔ ኢሰታ ሃኖ ካሎፍቴ።

4 ታ ዋጋታ ናጊቴ፤ ታ ኣዛዘታካ ፖሊቴ፤ ታኒ ጎዳ ኢንቴ ጸሳ።

5 ታ ኣዛዘታኔ ዋጋታ ናጊቴ፤ ሃሳንታ ናጊዛ ኣሲ ባ ሼምፖ ኣሻና፤ ታኒ ጎዳ» ጋ ዮታ።

6 «ኢንቴፌ ኦኒካ ባሰ ኣሾ ዳቦራ ላይማቶ፤ ታኒ ጎዳ።

7 «ኔ ኣዬይራ ላይማታዳ ኔ ኣዋ ካወሾፋ፤ ኔሰ ኣዮ ጊዲዳ ገሻሰ ኢዚራ ላይማቶ።

8 «ኔ ኣዋሰ ሃራ ማቼታራካ ላይማታዳ ኔ ኣዋ ዬላቾፋ።

9 «ኔ ሚቼይራ ላይማቶ፤ ሃሳሶካ ኔናራ ኢሲፌ ዲጪዳር ጊዲን ዋይኮ ሃራሶን ዲጪዳር ጊዲን ኔ ኣዋይ ዬሊዳ ሃራ ማቼ ና ዋይኮ ኔ ኣያ ሃራ ኣዚናሰ ዬሊዳ ማጫ ናይራ ላይማቶ።

10 «ኔሰ ዬላ ጊደንታ ማላ ኔሰ ናዛ ናይራ፤ ዋይኮ ኔሰ ናይ ናይራ ላይማቶ።

11 «ኔ ኣዋሰ ሃራ ማቻ ዬሊዳ ኔ ሚቼይራ ዚንኦፋ፤ ጋሶይካ ኢዛ ኔሰ ሚቾ።

12 «ኔ ኣዋ ሚቼይራ ዚንኦፋ፤ ጋሶይካ ኢዛ ኔሰ ሚቾ።

13 ኔ ኣዬይ ሚቼይራካ ዚንኦፋ፤ ጋሶይካ ኢዛ ኔ ኣዬይሰ ኣሾ ዳቦ።

18:5 ናሂ 9:29፤ ሂዚ 18:9፤ 20:11-13፤ ሉቃ 10:28፤ ኦሮ 10:5፤ ጋላ 3:12

18:8 ሉዊ 20:11፤ ዛሬ 22:30፤ 27:20

18:9 ሉዊ 20:17፤ ዛሬ 27:22

14 «ኔ አዋ አሻ ማቺራ ዚንኦፋ፤ ጋሶይካ ኢዛ ኔሰ አዋ ማቺ ማላ።

15 «ኔ ናዛ ማቺይራ ዚንኦፋ፤ ኢዛ ኔሰ ናዛ ማቺ ጊዲዳ ጊሻሰ ኢዚራ ዚንኦፋ።

16 ኔ አሻ ማቺይራ ዚንኦፋ፤ ጋሶይካ ኢዛ ኔሰ አሻ ማቺ፤ ሄሲ ኔ አሻ ካወሺዛ ሚሻ።

17 «አዬይራኔ ናይራ ዚንኦፋ፤ ኢዚሰ ናይ ናዛ ናይራኔ ናይሰ ናይ ናይራ ዚንኦፋ፤ ኢሰቲካ ኢዛሰ ማታ ዳሶ ጊዲዳ ጊሻሰ ሄሳፉ ሃኖይ ካወሻቲ።

18 «ኔ ማቺያ ፓጻ ዲሺን ኢዚ ሚቺዮ ዳወል ኤኮፋ፤ ኢዚራካ ላይማቶ።

19 «አጊናን አጊናን ቤቲዛ ማጫሳ ዋጋይ ዪዛ ዋዴ ማጫሳራ ዚንኦፋ።

20 «ሃራ አሳ ማቺራ ዚንኦፋ ኔርካ ኔና ቱኒሶ።

21 «ኔ ናይታፔ ኦናካ ሞሎኬ ጌቲቲዛ ኤቃሰ ጸጌቲዛ ያርሾ ኦፋ አሞፋ፤ ጋሶይካ ኔ ጸሳ ሱንል ቱኒሶ። ታኒ ጎዳ።

22 «ጎዳ ሲንፋን አጽቲዳ ሚሽ ጊዲዳ ጊሻሰ ማጫሳራ ዚንኦፋ ማላ አዴራ ዚንኦፋ።

23 «አዴ ጊዲን ዋይኮ ማጫሲ ሜሄራ ፓራቲዲ ባናቲፋ ቱኒሶ። ሄሳ ማላ ሃኖይ ካወሻቲ።

24 «ጎዳይ ኔና ኢሰታ ዴሬ ጌልፋናሰ ኔ ሲንፋፌ ዲጋና፤ ሃንኮ አሳይ ባርካ ባ ኦሶን ባና ቱኒሲዳይሳ ማላ ኢሰቲ ኦሊዛ ኢታ ኦሶታፔ ኢሲኔይንካ አንቲና ቱኒሶ።

25 ኢሰታ ኦሶይ ቢታ ቱኒሲዳ ጊሻሰ ታኒ ሄ ቢታዮ ኢዚ ናጋራ ጊሻሰ ቃጸያዲሰ፤ ቢታያካ ባ ጊዲን ዲዛ አሳ ኬሳ ጨታዲሰ።

26 አንቲ ጊዲኮ ታ አዛዞታኔ ታ ዋጋ ናጌቲ፤ ኢሰራኤል አሳፔ ዋይኮ አንቲ ጊዲን ዲዛ ሃራ ቢታ አሳፔ ኦኒካ ሃይሳ ማላ አይ ኦሶካ ኦሶፍቲ።

27 አንቲፌ ካሴ ሄ ቢታይን ዲዛ አሳቲ ሄይታ ማላ ሃራሲዛ ሚሽ ኦሊዳ ጊሻሰ ቢታያ ቱናዲሰ።

28 አንቲ ሄሳፉ ኦሊኮ ቢታያ ካሴ አንቲፌ ሲንፋን ዲዛ ካዋቲፋታ ጨቲዳይሳፉ አንቲናካ ጨታና።

29 «ሃይታ ሃራሲዛ ኢታ ኦሶታፔ ኢሲኔዮካ ኦሊዛዴይ ባ ዴሬ ኣሳ ጊዶፌ ሻኬቲ ጳዮ።

30 ሄሳ ጊሻሰ ኢንቴፌ ካሴ ሲንፋን ቢታ ቦላ ዲዛ ኣሳቲ ኦሊዳ ቱና ኦሶታ ኡባ ኦሊዲ ኢንቴ ቱኖንታ ማላ ታ ኣዛዘታ ናጊቴ፤ ታኒ ጎዳ ኢንቴ ጸሳ።»

19

ዲማ ዲማ ዋጋታ

1 ጎዳይ ሙሴ ሂዝጊዴሰ፤

2 «ሃይሳ ኢሰራኤል ናይታሰ ዮታ፥ ታኒ ጎዳይ ኢንቴ ጸሳይ ዲማ ጊዲዳ ማላ ኢንቴካ ዲማ ጊዲቴ።

3 « ኢንቴፌ ኦኒካ ኣቶንታ ባ ኣዋኔ ባ ኣዮ ቦንቾ፤ ታ ኢንቴና ኣዛዚዳ ማላ ሳምባታ ጋላሳታ ቦንቾ፤ ታኒ ጎዳ ኢንቴ ጸሳ።

4 « ታና ኣጊዲ ኤቃታሰ ጎይኖፍቴ፤ ዋይኮ ኤቃ ጸሳታ ቢራታፔ ሴሪሲዲ ኢንቴሰ ሜጶፍቴ፤ ታኒ ጎዳ ኢንቴ ጸሳ።

5 « ኢንቴ ኢሲፌቴፋ ያርሾ ጎዳሰ ሺሺዛ ዋዴ ሄ ያርሾይ ኢንቴ ጊሻሰ ኤኬታና ቤሲዛ ማላ ያርሺቴ።

6 ያርሾዛ ሺሺዳ ጋላሰ ዋይኮ ዋንቴፋ ጋላሰ ሜቴታናሰ ቤሴሰ፤ ሄቫንፋ ጋላሰ ጋካናሰ ጋምኢዳ ያርሾይ ዉሪካ ታማን ጽጌቶ።

7 ሄቫንፋ ጋላሳን ኢዛ ሚኮ ሄሲ ቱና፤ ሄሳ ጊሻሰ ታኒ ሄ ያርሾዛ ኤኪኬ።

8 ኢዛፔ ሚዳዴይ ኦኒካ ታሰ ዲማቲዳይሳ ሃዳ ሚሻ ማላ ቆዲዳ ጊሻሰ ኢዚ ባ ናጋራን ኦይሼታና፤ ሄሳዴይ ባ ዴሬ ኣሳ ጊዶፌ ሻኬቲ ጳዮ።

9 « ኢንቴ ማጸ ዋዴ ኢንቴ ካል ማጸሺን ጋጸ ቦላ ዲዛ ካል ማጸፒቴ፤ ኢንቴ ማጸሺን ጌዶን ኣቲዳ ፑሺቾ ማጸናሰ ጉዬ ሲሞፍቴ።

10 ኔኒ ኔ ዋይኔ ሚፋ ኣይፌ ማጸሺን ሃጋ ጊዶን ቆቴቲ ኣቲዳይሳ ዋይኮ ጋዴን ቆቆፌቲዳይሳ ቆራ ኤካናሰ ጉዬ ሲሞፋ፤ ሄይታንታ ኡባ ማንቆታሲኔ ቤቴ ዪዳይታሰ ኣጋጋ፤ ታኒ ጎዳ ኢንቴ ጸሳ።

11 « ነይሶቶፒቴ፤ ኣሰ ባሌፍቴ፤ ዋርዶ ሃሳዮፒቴ፤

12 « ታ ሱንፋን ዋርዶራ ጫቆፍቴ፤ ዋርዶ ጫቂዲ ኢንቴ ጸሳ ሱንፋ ቱኒሶፒቴ፤ ታኒ ጎዳ ኢንቴ ጸሳ።

19:2 ሉዊ 11:44-45፤ 1ጴጽ 1:16

19:3 ኬሳ 20:8፤12፤ ዛሬ 5:12፤16

19:4 ሉዊ 20:15-16፤ ዛሬ 5:19-20

19:12 ኬሳ 20:7፤ ዛሬ 5:11፤ ማቶ

13 « ላሰ ሰሌዳ፤ ወይኮ ላሳ ሚሼ ሰንቃ ኤኮፋ፤ ሚሼ ኢማና ጋዳ ኔ ኦሶ ኦሲሲዳዳሰ ሚሻ ኢሞንታ ዳሼ ኔ ኣቻን ኢሲ ቃማካ ኣይሶፋ።

14 « ሲዬና ጋዳ ቱሌ ጫዮፓ፤ ቆቂይ ቆጵቲዲ ኩንዳና ማላ ኢዛ ሲንላን ቆጵዲዝ ወላፋ፤ ኔ ጸሳሰ ያያ፤ ታኒ ጎዳ ኔ ጸሳ።

15 « ሳኒ ፒርዳ ፒርዲዛ ወዴ ፒርዳ ጌላሶፓ፤ ማንቆ ኢዛ ማንቆቲላ ገሻሰ ማዳ ፒርዶፋ፤ ጌታ ኣሳታሰ ዱማ ሰንቾ ኢሞፋ፤ ዴሬ ኣሳካ ዱማ ማዳ ፒርዶፋ፤ ኣሳ ኡባሰ ቱሙ ፒርዳ ፒርዳ።

16 « ሳኒ ኣሳ ጌዶን ዘገርሰ ኤካዳ ዩዮፓ፤ ኔ ሾርዛ ሃይቆሰ ጋሊዛ ኣይ ሚሺካ ኦሶፋ፤ ታኒ ኔ ጎዳ።

17 « ሳኒ ኢሻ ኔ ወዚናን ኢጶፋ፤ ኢዛ ጋሶን ኔሰ ናጋራ ጌዶንታ ማላ ኔ ሾርዛ ሃንቃ።

18 « ላሰ ኡባ ኔ ኔና ሲቂዛ ማላ ሲቃ ኣቲን ኣይ ኣሳ ሶላካ ኔ ኡሎን ላንጨ ኦይካዳ ሃሎ ኬሶፋ፤ ታኒ ጎዳ።

19 « ታ ኣዛዘታ ናጌቲ፤ ዱማ ዱማ ቆሞ ሜሄታ ኢሲ ሶላ ጋሊ ሜሄቲሶፍቲ፤ ናሞኡ ቆሞ ካላ ዜሬላ ዋላኪዲ ኢሲ ሶላ ዜርፒቲ፤ ናሞኡ ቆሞ ሚሻፌ ዳዴቲዳ ማይኦ ማይኦፍቲ።

20 « ሲሳዳይ ሃራ ኣሳራ ጌታ ኡቲዳ ኣይሌይራ ላይማቲኮ ኢዛካ ባ ኣይሌቲላፌ ወዜቶንታሮ ጌዲኮ ኢዛዳይ ቃጸዬቶ፤ ጌዲኮካ ኢዛ ወዜቶንታ ገሻሰ ናሞኣይካ ሃይቆፌቶ።

21 ሄሳ ማላ ቆሆ ጋሊዳዳይ ቆሆ ገሻሰ ሺቂዛ ያርሾሰ ኢሲ ጳርሾ ጋይቶቲላ ዱንካኔ ፔንጌ ጎዳ ሲንላ ኤሆ።

22 ቄሴዚካ ሄሳዴ ናጋራ ዉርሳናሰ ጸሳ ሲንላን ቆሆ ያርሾሰ ኢማቲዳ ጳርሾዛ ሺሾ፤ ኢዛዴ ናጋራይካ ኣቶ ጌቲታና።

23 « ሲንቲ ካናኔ ጌሊዲ ኣይፌ ኣይፊዛ ሚላ ቶኪኮ ሄ ኣይፌ ኣይፊዛ ሚላያ ኣይፌ ዶሞሶፌ ቢዲ ሄቩ ላይላ ጋካናሰ ኢማዛ ኣይፌይ ሜቲቶንታ ዲጌቲዳይሳ ኤፊቲ፤ ሄ ላይላታን ሄ ሚላታ ኣይፌ ሞፒቲ።

24 ኦይዳንሶ ላይላ ሶላ ሄ ሚላ ኣይፌይ ኡባይ ጎዳሰ ጋላታሰ ሺሺዛ ያርሾ ጌዶ።

25 ኢቻሻንሶ ላይላን ቃሴ ሚላ ኣይፌዛ ኢንቲሰ ሚቲ፤ ኢንቲ ሄሳሶ ሂሰቲኮ ኣይፌ ኣይፊዛ ኢንቲ ሚላይ ወዴን ወዴን ኢንቲሰ

ኢሚዛ ኣይፌይ ካሴፔ ጌዴ ጉጃቲ ጉጃቲ ባና፤ ታኒ ጎዳ ኢንቴ ጸሓ።

26 « ሰላሳ ዲዛ ኣይ ኣሾካ ሞፒቴ፤ ማርሶፍቴኔ ቢታ ቢቶፒቴ።

27 « ለንቴ ሁኤ ቢናና ጋርሳራ ዩሺ ኣሊዲ ቃንጾፍቴ፤ ኢንቴ ቡቻካ ቃንሳን ቃንጾፍቴ።

28 « ለንቴ ኣሳቴላ ቦላ ኒቅሴ ጫኞ ጫዶፍቴ፤ ዎይኮ ኣሲ ሃይቂኮ ኢዛሰ ሚሼቲዲ ኢንቴ ቦላ ቃንጺ ማዲንሶፍቴ፤ ታኒ ጎዳ።

29 « ሰቢታያ ላይማኒኔ ቱናቴላን ኩሞንታ ማላ ኔ ናዮ ላይማቴላ ኦሶስ ኣላ ኢማዳ ካዉሾፋ።

30 ታ ሳምባታ ጋላሳታ ናጊቴ፤ ታ ኬላ ቦንቺቴ፤ ታኒ ጎዳ።

31 « ሳምፎቲሌ ሃሳይሲዛይታ ዎይኮ ኢታ ኣያናታ ሃሳይሲዛይታ ዘሬ ኦይቸፋ፤ ኢንቴ ቱናንታ ማላ ኢሰታ ኮዮፒቴ፤ ታኒ ጎዳይ ኢንቴ ጸሓ።

32 « ሳፔ ጨሚዳዴ ቤይኮ ኔ ኡቲዳሶሆፔ ዴንዳ ኤቃዳ ቦንቻ፤ ታሰ ጸሓሰ ያሻቴላን ኣዛዜታ፤ ታኒ ጎዳ።

33 « ሳራ ቢታፌ ዩዲ ኢንቴ ጊደን ዲዛ ኣሳታ ቆሆፒቴ።

34 ኢንቴ ኢንቴ ዴሬ ኣሳሰ ኦሊዛ ማላ ኢሰታሰካ ሎኦ ኦሊቴ፤ ኢንቴ ኢንቴና ሲቂዛ ማላ ኢሰታካ ሲቂቴ፤ ካሴ ኢንቴካ ጊብጾ ቢታን ቤቴታ ጊዲዳይሳ ዩሺ ቆፒቴ፤ ታኒ ጎዳ ኢንቴ ጸሓ።

35 « ሳማካ ሚሼን ጊዲን ዎይኮ ሜዛኔን ዎይኮ ዋፋ ሚሻን ኣሰ ጨሞፍቴ።

36 ኣሰ ጨሞንታ ቱሙ ሜዛኔይ፥ ማካ ሚሺኔ ሚጾ ሚሺ ኢንቴሰ ዴኦ፤ ታኒ ኢንቴና ጊብጾፔ ኬሲዳ ጎዳ ኢንቴ ጸሓ።

37 « ሳ ኢንቴሰ ኢሚዳ ታ ኣዛዘታኔ ታ ዎጋታ ኡባ ናጊቴኔ ኦሊቴ፤ ታኒ ኢንቴ ጎዳ። »

20

ኣዛዜቶንታይሳ ቦላ ጋኪዛ ቂጻቴ

1 ጎዳይ ሙሴ ሂዝጊዴሰ፥

19:26 ሚጲ 9:4፤ ሉዊ 7:26-27፤ 17:10-14፤ ዛሬ 12:16፥23፤ 15:23፤ 18:10

19:28 ሉዊ 21:5፤ ዛሬ 14:1 19:29 ዛሬ 23:17 19:30 ሉዊ 26:2

19:31 ዛሬ 18:11፤ 1ሳሚ 28:3፤ 2ካዎ 23:4፤ ኢሳ 8:19 19:34 ኬሳ

22:21፤ ዛሬ 24:17-18፤ 27:19 19:36 ዛሬ 25:13፥16፤ ሉሚ 20:10፤ ሂዚ

45:10

2 «ኢሰራኤል ናይታ፡ ሓንቴና ጊዲኮኔ ኢንቴ ጊደን ዲዛ ሃራ ዳሬ ኣሳታፔ ኦኒካ ሞሎኬ ጌቴቲ ዳይጌቴዛ ኤቃ ጸሳሰ ባ ናይታፔ ኢሳ ኣሉ ኢሚ ቤቴኮ ኩሜላ ኢሰራኤል ዳሬ ኣሳይ ሄሳዴ ሹቻን ጫዲ ዋጵ።

3 ኦኒካ ባ ናይታፔ ኢሳዴ ሞሎኬሰ ኣሉ ኢሚዲ ታ ኬላ ቱኒሲዳ ጊሻሲኔ ጌሻ ሱንላ ታይሳ ካዉሺዳ ጊሻሰ ታ ሄሳዴ ቦላ ቂጻቴ ዬዳና፤ ሄሳፌ ጉዬ ታ ኢዛዴሰ ሞርኬ ጊዳዳ ዳሬ ጊዶፌ ኢዛ ሻካ ጳይሳና።

4 ኢዛ ዳሬ ኣሳይ ኢዛዴይ ኦሶይሳ ኡባካ ዉዴቶንታ ቤሲ ኣጊኮኔ ዋጵንታ ኣጊኮ።

5 ታኒ ታ ባጋራ ሄሳዴኔ ኢዛዴሶ ኣሳ ቃሴካ ታሰ ኣማኔቶንታ ሞሎኬሰ ጎይኖን ኢዛራ ኢሲፌ ጊዲዳይታ ኡባ ቦላ ኢታ ሃንቆ ዬዳና፤ ሄሳፌ ጉዬ ሄይታንታ ታኒ ኢሰታ ኢሰታ ዳሬዛ ጊዶፌ ሻካ ጳይሳና።

6 « ኦኒካ ኢሰታፌ ዘሬ ኦይቻናሰ ሞይቲሌ ዳይጊዛይታኮኔ ማርታኮ ቢኮ ሄሳዴ ቦላ ታ ኢታ ሃንቆ ዬዳና፤ ሄሳፌ ጉዬ ሄሳዴ ታኒ ኢዛ ዳሬ ጊዶፌ ሻካ ጳይሳና።

7 « ኦኒካ ኣሳቴላ ኡባ ጌሺቴ፤ ዲማቴቴ፤ ጋሶይካ ታኒ ጎዳ ኢንቴ ጸሳ።

8 ታ ኣዛዞኖ ናጊቴኔ ፖሊቴ፤ ጋሶይካ ታኒ ኢንቴና ታሰ ዲማሲዳ ኢንቴ ጎዳ።

9 « ሓዋ ዋይኮ ባ ኣኖ ጫዬዛዴይ ሃይቆን ቃጻዬቶ፤ ኢዚ ሃይቆን ቃጻዬቲዛይ ባ ሞርና።

10 « ኢሲ ኣሲ ሃራ ኣሳ ማቺራ ላይማቴኮ ሄ ላይማቴዳ ኣዴዛራኔ ማጫሳይራ ናምኣይካ ሃይቆን ቃጻዬቶ።

11 ኢሲ ኣሲ ባ ኣዋ ማቺራ ላይማቴኮ ባ ኣዋ ካዉሺዳ ጊሻሰ ሄ ላይማቴዳይቲ ናምኣይካ ሃይቆን ቃጻዬቶ፤ ኢሰቲ ሃይቆን ቃጻዬቲዛይ ባ ሞሪዳ ሞርና።

12 ኢሲ ኣሲ ባሰ ናዛ ማቺራ ላይማቴኮ ሄ ላይማቴዳይቲ ናምኣይካ ሃይቆን ቃጻዬቶ፤ ኣሾ ዳቦቴላ ላይማን ቱኒሲዳ ጊሻሰ ኢሰቲ ሃይቆን ቃጻዬቲዛይ ባ ሞሪዳ ሞርና።

13 « ኢሲ ኣሲ ማጫራ ዚንኢዛ ማላ ኣዴይ ኣዴራ ዚንኢኮ ናምኣይካ ዬላቺዛ ሚሽ ኦሉዳ ጊሻሰ ሃይቆን ቃጻዬቶ፤ ኢሰቲ ሃይቆን ቃጻዬቲዛይ ባ ሞሪዳ ሞርና።

14 « ለኢሲ አሲ አዩዮኔ ናዮ ማቾ ኤኪኮ ሄይታንቲ ኦሊዳ ሃራሲዛ ሃኖዛ ጊሻሰ ሄቫይካ ታማን ጸጌቲ ሃይቁቶ፤ ሄይታንታ ማላ ኢታ ሃኖይ ኢንቲ ጊዶን ፖሌታናሰ ቤሴና።

15 « ለኣይ አሲካ ማሄራ ፓራቲኮ ኢዛዴይኔ ሄ ማሄዚ ናምኣይ ሃይቁቶ።

16 « ለኢሲ ማጫሲ ማሄራ ፓራቲኮ ኢዛኔ ሄ ኢዛ ፓራቲዳ ማሄይ ናምኣይ ሃይቁቶ፤ ኢሰቲ ሃይቁዛይ ባ ሞሪዳ ሞርና።

17 « ለኢሲ አሲ ባ ሚቺዮ፣ ባሰ አዪ ናዮ ዎይኮ አዋ ናዮ ማቾ ኤኪኮ ሄሲ ዩላቺዛዛ፤ ሄሳ ጊሻሰ ኢሰቲ ባንታ ዴሬ ጊዶሬ ቫኬቲ ቆዮቶ፤ ባ ኦሊዳ ሞር ጊሻሰ ባ ቁጻቲ ኤኬቶ።

18 « ለኢሲ አሲ አጊናን አጊናን ቤቲዛ ማጫሳ ዎጋይ ቤቲዳ ማጫሳራ ዚንኢኮ ኢዛዴይ ኢዚ ካሎቲል ቃሪዳ ጊሻሰኔ ኢዛካ ባ ካሎቲል ቃራ ቤሲዳ ጊሻሰ ናምኣይካ ባንታ ዴሬ ጊዶሬ ቫኬቲ ቆዮቶ።

19 « ለኣይ አሲካ ባ አዋ ሚቺራ ዎይኮ ባ አዪ ሚቺራ ዚንኦፎ፤ ሄሳሶ ኦሊዛ ጊዲኮ ናምኣይካ ባንታ ዳቦቲል ካወሺዛ ጊሻሰ ባ ሞሪዳ ሞርን ኦይሼታና።

20 « ለኣይ አሲካ ባ አዋ ኢሻ ማቺራ ዎይኮ ባ አዬይ ኢሻ ማቺራ ላይማቲኮ ባ አዋ ኢሻ ማቾ ዎይኮ ባ አዪ ኢሻ ዩላሲዳ ጊሻሰ ላይማቲዳይቲ ናምኣይካ ኦይሼታናኔ ዩሎይ ባይንዳ አታና።

21 ኣይ አሲካ ባ ኢሻ ማቾ ኤኪዛ ጊዲኮ ሄሲ ቱና ኦሌሰ፤ ባ ኢሻዛ ቦንቾ ካወሺዳ ጊሻሰ ናምኣይካ ና ዩሎንታ አታና።

22 « ሪታ ኢንቲና ኢዚን ጌልላና ካናኔ ቢታያ ኢንቲና ጩታ ዲንጎታ ማላ ኢንቲ ታ አዛዞታኔ ታ ዎጋታ ናጌቲኔ ፖሊቲ።

23 ታኒ ኢንቲ ሲንሳፌ ቆይሲዛ ካዎቲላታ ሎሴ ዎጋ ካሎፍቲ፤ ኢሰቲ ሄይታንታ ኡባ ኦሊዳ ጊሻሰ ታ ኢሰታ ቫቲታዲሰ።

24 ታ ቃሴ ኢዚፔ ማሊኔ ኤሲ ጎጊዛ ሄ ጪሊላ ቢታዮ ኢንቲና ጌልላናሰ ጫቃዲሰ፤ ኢዞካ ታ ኢንቲሰ ኢማና፤ ሃንኮ ዴሬፔ ኢንቲ ታሰ ቫኬቲዳይታ ጊዳና ማላ ኦሊዳይ ታና ጎዳ ኢንቲ ጸሳ።

25 « ሂሳ ጊሻሰ ኢንቲ ጌሽ ጊዲዳ ማሄታኔ ካፎታ ቱና ጊዲዳይታፔ ሎኤሊዲ ሻኪ ኤሪቲ፤ ታኒ ሃይታንቲ ኢንቲሰ ቱና ጋ ዎሊዳ ማሄታን፣ ካፎታኒኔ ቢታ ቦላ ቃጺዛ ኣይ ሚሻንካ ኢንቲና ቱኒሶፒቲ።

20:14 ሉዊ 18:17፤ ዛሬ 27:23 20:16 ኪሳ 22:19፤ ሉዊ 18:23፤ ዛሬ 27:21 20:17 ሉዊ 18:9፤ ዛሬ 27:22 20:18 ሉዊ 18:19 20:20 ሉዊ 18:12-14 20:21 ሉዊ 18:16

26 እንቲ ታሰ ዱማ ሻኬቲዳይታ ጊዲቲ፤ ጋሶይካ ታኒ ጎዳይ ዱማ ጸሳ፤ እንቲ ታ ዳሬታ ጊዳና ማላ ኣይዛቤታ ጊደፊ ታኒ እንቲና ታሰ ዱማሳ ሻካዲሰ።

27 « ኣይ ኣሲካ እንቲ ጊደፊ ሞይቲሌ ጸይጊዛ ዎይኮ ማርቲዛዴ ጊዲኮ ኢዚ ሹቻን ጫዴቲ ሃይቆ፤ ሃሳሉ ኣሉዛዴይ ኣይ ኣሲካ ሃይቆን ቃጸዬቲዛይ ባ ኣሉዳ ሞርና፡ ጋ ዮታ።»

21

ቄሴቲ ካላና ማላ እሚቲዳ ዎጋ

1 ጎዳይ ሙሴሰ፡ «ኣርኔ ናይታሰ ቄሴታሰ፡ «እንቲፊ ኦኒካ ባ ዳቦታ ጋርሳፊ ኣሲ ሃይቄኮ ኢዛዴ ኣሃ ቦቺዲ ባና ቱኒሶፖ።

2 ማታ ዳቦታፔ ኣያ ዎይኮ ኣዋይ ዎይኮ ባ ናይ ዎይኮ ባ ኣሻይ ሃይቄኮ።

3 ሃሳሉካ ኣዚና ጌሎንታ ኢጸዳ ዲዛ ሚቺያ ሃይቄኮ ኢሰታ ኣሃ ቦቻናሰ ዳንዳዬሰ።

4 ጊደ ኣቲን ጌሎኒኔ ኤኮን ዳቦቲዳይቲ ኣሃ ቦቺዲ ባና ቱኒሶፔቶ።

5 « «ቄሴታፔ ኦኒካ ሃይቄዳዴሰ ሚሹቲዲ ባ ሁኔ ቢናና ቡጮፖ፤ ባ ቡቺካ ቡጮፖ፤ ባ ቦላካ ቃጪ ማዲንላፎ።

6 ቄሴይ ወሪካ ታሰ ዱማ ጊደ፤ ባንታ ጸሳ ሱንላ ቱኒሶፔቶ፤ ጋሶይካ ኢሰቲ ጸሳሰ ታማን ጸጌቲዛ ያርሾኔ ጎዳሰ ካላ ያርሾ ሺሺዛይታ ጊዲዳ ጊሻሰ ኢሰቲ ጌሽ ጊዴቶ።

7 « «ቄሴ ጊዲዳዴይ ላይማ ማጫሰ ዎይኮ ጌላኦቴሉ ኤኮቲዳ ጌላኦፖ ዎይኮ ጌላ ኬዚዳ ማጫሰ ማቾ ኤኮፎ፤ ጋሶይካ ቄሴቲ ጸሳሰ ዱማቲዳይታ፤

8 ቄሴይ እንቲ ጸሳሰ ካላ ያርሾ ሺሺዛይሳ ጊዲዳ ጊሻሰ ኢዚ ሃራ ኣሳፔ ዱማ ጊደ፤ ታኒ እንቲና ጌሺዛ እንቲ ጎዳይ ጌሻ፤ ኢዚካ ጌሽ ጊደ።

9 ቄሴ ማጫ ናይ ላይማቲኮ ኢዛ ባ ኣዋ ካዉሺዳ ጊሻሰ ታማን ጸጌታ ሃይቄ።

10 « «ቄሴታ ሃላቃይ ኢዚ ባ ሁኔ ቲዬቲዛ ዛይቲይ ቲዬቲዳ ጊሻሲኔ ቄሴቴላ ማይኦ ማይኣና ማላ ዱማቲዳዴ ጊዲዳ ጊሻሰ ኣሲ ሃይቄኮ ሃይቄዳዴሰ ኢዚ ሚሹቲዛይሳ ኤሪሳናሰ ባ ሁኔ ቢናና ቡጮፖ፤ ባ ማይኣካ ዳኮፎ።

11 እሃይ ዲዛሶካ ኢዚ ጌሎፖ፤ ሃራይ አቶሺን ባ አዋ ዎይኮ ባ አዩይ እሃካ ቦቹዲ ባና ቱኒሶፖ።

12 ኢዛ ዲማሳናስ ቲይዳ ጸሳ ዛይቲይ ኢዛ ቦላ ዲዛ ጊሻስ ቄሴይ ጸሳ ኬላፌ ኬዚ ቢዲ ጸሳ ኬላ ቱኒሶፖ።

13 « ቀሴይ ኤካና ማቻ ጌላኦ ጊዱ።

14 እዚናይ ሃይቂዳሮ ዎይኮ ጌላ ኬዚዳሮ ዎይኮ ላይማ ማጫስ ኤኮፎ፤ ጌሎንታ ጌላኦ ጸላ ባ ዴሬ አሳ ጊዶፌ ዶሪ ኤኮ።

15 ሄሳላ ሂስቶንታ አጊኮ ኢዚ ባ ዴሬ ጊዶን ባ ናይታ ቱኒሳና፤ ኢዛ ዲማ ሻኪዳ ጎዳይ ታና ጸሳ፤ ጋ ዮታ» ጊዴስ።

16 ጎዳይ ሙሴ ሂዝጊ አዛዚዴስ፤

17 «አሮኔስ፤ ሳይ ቆሞታፔ ኢዛ አሳቴላ ቦላ ዎሶይ ዲዛዴይ ኦኒካ ታስ ያርሾ ሺሾፎ፤ ሃይሲ ሃ ዎጋይ ቡሮ ሲንላፌ ያና ዬሌታን ኡባን ናጌቲ ዴኦ።

18 ፓጩ አሳቴላ ዲዛዴይ ኦኒካ ሄሲካ ቆቂይ ዎይኮ ዎቤይ ዎይኮ ሜጶ ኢታይ ዎይኮ አሳቴላይ ቦርሲዛዴይ፤

19 ኩሼይ ዎይኮ ቶሆይ ሲሊዳዴይ፤

20 ዘኮ ቁናይ ዎይኮ ዲንኬይ፤ አይፌይ ሳኪዛዴይ ዎይኮ ኢዛ ቦላ ኡዛዚዛዚ ዲዛዴይ ዎይኮ ሹፋይ ካላ ያርሾ ታስ ሺሻናስ ቤሴና።

21 አሮኔ ዜሬሐ ኩሜላ ጊዶፌ አሳቴላ ቦላ ዎሶይ ዲዛ አሲ ኦኒካ ጸጌቲዛ ያርሾኔ ያርሾ ባ ጎዳስ ያርሻናስ ዮፖ።

22 ሄሳ ማላ አሲ ናሞኡ ቆሞ ካላ ያርሾታ ማናስ ዳንዳዬስ፤ ሄይቲካ ዲማቲዳ ካሊኔ ኬሂ ዲማቲዳ ያርሾ ካላ።

23 ጊዲኮካ ኢዛ አሳቴላን ቦሬይ ዲዛ ጊሻስ ታ ኬላ ቱኒሶንታ ማላ ኢዛዴይ ጌዴ ያርሾ ያርሺዛሶ ዎይኮ ጌዴ ማጋላሻኮ ሺቆፖ፤ ጋሶይካ ኢሰታ ዲማ ኦላ ሻኪዳይ ታና ጸሳ፤ ጋዳ ዮታ።»

24 ሙሴይካ ሄሳ ኡባ አሮኔሲኔ አሮኔ ናይታስ ኩሜላ ኢስራኤሌ ዴሬ አሳስ ዮቲዴስ።

22

1 ጎዳይ ሙሴ ሂዝጊዴስ፤

2 «አሮኔሲኔ ኢዛ ናይታስ፤ ሳይቲ ሃራፔ ዲማ ጊዲዳ ታ ሱንላ ቱኒሶንታ ማላ ኢስራኤሌ ናይቲ ታስ ዲማሲዲ ሺሺዛ ያርሾ ኡባ ቦንቸራ ኤኪዲ ጌሻቴላን ናጌቲ፤ ታኒ ጎዳ።

³ « ኢንቴ ዜሬላፌ ቱኒዳዳይ ኢሰራኤል ናይቲ ታሰ ዱማ ሻኪ ኢሚዳ ሚሽ ጸላቴላን ቦቺዳዳይ ታ ሲንላፌ ጳያና፤ ሃይሲ ሃ ዋጋይ ሃይሳፌ ጉዬ ሲንላሩ ያና ዬሌታ ኡባን ናጌቶ፤ ታጌ ጎዳ።

⁴ « ኀሮጌ ዜሬታፔ ኣይ ኣሲካ ኢዛ ቦላ ኣሳፔ ኣሳን ኣፉዛ ጋለባ ሃርጌይ ዲዛዴይ ዎይኮ ኢዛ ኣሳፔታፌ ጎጊ ኬዚዛ ሚሺ ዲዛዴይ ኦኒካ ጌያና ጋካናሰ ጸሳሰ ዲጫፔዳ ሚሽ ሞፖ፤ ኣሃይ ቦቺን ቱኒዳ ሚሽ ቦቺዳዴይ ዎይኮ ኢዛ ቦላፌ ዜሬላ ሃሉ ጸኬቲዛዴ ቦቺዳዴይ፤

⁵ ሄሳልካ ቢታራ ጎሽቴዛይታኔ አይ ሚሻንካ ቱኒዳ አስ ቦቺዳዴይ፡

6 ሄሳ ማለ ጸይ ቱና ሚሺካ ቦቹዳዴይ ኦማርስ ጋካናስ ቱና ጊደስ፤ ሄሳፌ ጉዬ ኢዚ ባ ቦላ ሃፋን ሜጨቶንታ ዲሼ ጸሳስ ዲማቲዳ ካል ሞፖ።

⁷ እርሼይ ወሊዳቴ ጉዬ ቃሴ ኢዚ ጌሽ ጊደስ፤ ሄሳፌ ጉዬ ደማ ጊዲዳ ካላ ያርሾዛ ኢዛስ ቁማ ጊዲዳ ጊሻስ ማናስ ዳንዳዩሰ።

8 ስላሳት ሃይቀዳዚኔ ደኣይ ዋጁዳ መሄ ኣሾ ሞፖ፤ ኢዚ ሄሳ መሃዝ ጊዲኮ ቱኔሰ፤ ታኒ ጎዳ።

⁹ « ቁሴቲ ታኒ ኢስታሰ አሚዳ ዋጋ ናጌቶ፤ ኢስቲ ናጎንታ አገሪ ጌሽ ገዲዳ ታ ኣዛዞታሰ ኣዛዜቶንታ ኢጲዳ ገሻሰ ኢስታሰ ቆሆ ገዲን ኢስቲ ሃይቃና፤ ኢስታ ዱማሳ ሻኪዳይ ታና ጎዳ።

10 « ጥሰ ዱማቲዳ ያርሾፌ ማናሰ ዳንዳይዛይ ቄሴታኔ ኢሰታሶ እስ ጸላ ኦቲን ሃራ እሲ ኢዛፔ ሞፖ፤ ቄሴራ ኢማሊ ዎይኮ ኦሶስ ቃጸቲዲ ኢዛራ ዲዛዴይካ ሞፖ።

¹¹ ጊድ አቲን ቄሴይ ባ ሚሻን ሻሚዳ ኣይሌይ ዋይኮ ሶን ዩሌቲዳ ኣይሌይ ቄሴዛ ጊሻፔ ሞ።

¹² ቁሌ ጊደንታ ሃራ ኣስ ጌሊዳ ቁሌዛ ናያ ጸሓስ ዱማቲዳ ያርሾፌ ሙቲ።

¹³ ጊደ አቲን ና ዩሎንታ ዲሺን ኢዚ ኣዚናይ ሃይቂዳራ ወይኮ ባ ኣዚናፔ ኣንጂታዳ ባ ኣዋ ሶ ሲማዳ ዲዛ ቄሴ ናያ ካሴ ኢዛ ናቲቲላ ወዴ ኦሊዛ ማላ ባ ኣዋ ገሻፔ ሙ፤ ጊዲኮካ ቄሴሶ ኣሳፔ አቲን ሃራ ኣሲ ዲማቲዳ ያርሾ ካላፌ ዋፖ።

¹⁴ « ቁሴሶ አስ ጊደንታዳይ ኦኒካ ኤርንታ ዲሼ ጎዳስ ደማቲዲ ኢሜቲዳ ሚሽ ሚኮ ሄ ኢዚ ሚዳይሳ ኩሜላ ዋጋ ጾታፔ ናምኡ ኩሽ ጉጂዲ ቁሴዛስ ቃንጾ።

15 ኢስራኤል ናይቲ ጸሓሰ ኢሚዛ ዱማ ያርሾታ ቄሴቲ ቱኒሳናሰ ቤሴና።

16 ሄሲካ ኢዛፔ ማናሰ ቤሶንታዴሰ ቄሴቲ ኢሚኮ ሄ ሚዳዴሰ ሞሮ ጊዲዲ ኢዛዴ ቦላ ሃንቆ ጋፋና፤ ኢሞታታ ኡባ ታሰ ዱማሲዳይ ታና ጎዳ፣ ጋ ዮታ።»

ጎዳሰ ሺቃናሰ ቤሶንታ ያርሾ

17 ጎዳይ ሙሴ ሂዝጊዴሰ፡

18 «ኣሮኔስ ኢዛ ናይታሲኔ ኢስራኤል ዴሬ ኡባሰ፡ ኢስራኤል ኣሰ ጊዲዳይ ወይኮ ኢስራኤል ናይታ ጊዶን ዲዛ ኢማላ ኣሲ ኣዲና ጋፋናሰ ወይኮ ኢዚ ጮ ኡፋይሳን ማላ ኢሚዛ ጽጌቲዛ ያርሾ ሺሺኮ፡

19 ኢዛ ያርሾይ ኤኬታና ማላ ኢሲ ቦሬይ ኢዛ ቦላ ባይንዳ ኮርማ ቦሬፔ፡ ጳርሾፌኔ ዴይሻ ኦርጌፌ ጊዶ።

20 ኢዛ ቦላ ዋሶይ ዲዛ ሜሄ ኢንቲ ሺሺኮ ጎዳይ ሄሳ ኤኬና።

21 « ሐሴ ኦና ጊዲኮካ ባ ኣዲና ጋፋናሰ ኢሲፌቲላ ያርሾ ጎዳሰ ያርሺዛ ወዴ ወይኮ ባ ዶሳን ባ ሜሄታፔ ኪያቲላ ኢሞታ ኢሚዛ ጊዲኮ ሄ ኢሞታ ኤካና ማላ ኢዚ ኢሚዛ ሜሄዛ ቦላ ኣይኮ ዋሶይ ባይንዳዝ ጊዶ።

22 ቆቄ ወይኮ ሜቆ ወይኮ ቂሻ ወይኮ ጊይዛ ማዲንላራ ዲዛ ወይኮ ጋራንዳ ወይኮ ሻቶራ ዲዛ ሜሄ ጎዳሰ ያርሾ ሺሾፋ፤ ሄሳንታ ማላ ሜሄ ያርሾ ያርሺዛሶዛን ጽጌቲዛ ያርሾ ሂሰታ ያርሾፋ።

23 ኢዛሰ ሜጴቲላ ዋጋይ ባይንዳ ኣዲሳ ወይኮ ቃንሐ ጊዲዳ ሜሄ ባ ዶሳን ኢሚዛ ኪያቲላ ኢሞታ ጊዲዲ ሺቃናሰ ዳንዳዬሰ፤ ጊዶ ኣቲን ኣዲና ጋሶሰ ሺሻናሰ ዳንዳዬና።

24 ሳንጌቲዳ ወይኮ ጳቂቲዳ ሜሄ ጎዳሰ ያርሾ ሺሾፍቲ፤ ኢንቲ ቢታን ሄይታንታ ማላ ያርሾፍቲ።

25 ኣላጋ ኣሳፔ ኢሜቲዳ ሜሄ ጸሓሰ ያርሾ ሺሾፍቲ፤ ሄይታንታ ማላ ሜሄቲ ቦሬይ ዲዛ ማላ ቆዴቲዛ ጊሻሰ ኢሰቲ ኤኬቴቲና፣ ጋ ዮታ።»

26 ጎዳይ ሙሴስ ሂዝጊዴሰ፡

27 «ሚዛ ማሪ ወይኮ ዶርሳ ላቃይ ወይኮ ዴይሻ ላቃይ ዬሌቲኮ ላፑን ጋላሰ ጋካናሰ ባ ኣይፔ ሻኬቶፎ፤ ጊዶ ኣቲን ኦሰፑንላ ጋላሳፌ ኦይኪዲ ጽጌቲዛ ያርሾስ ሺቃናሰ ዳንዳዬሰ።

28 ሚዝ ኢዚ ማራራ፥ ደርሰ ኢዚ ላቃራ ኢሲ ጋላሰ ያርሾሰ ሹኮፍቴ።

29 «ኢንቴ ጎዳሰ ጋላታ ያርሾ ያርሺዛ ዋዴ ኢንቴ ሺሺዛ ጋላታዚ ኤኬታና ማላ ኦሊ ሺሺቴ።

30 ኢንቴ ሺሺዳይሳፌ ኣይኮካ ዋንቶሰ ኣሾንታ ሄ ጋላሰ ኡባ ሚቹቴ፤ ታኒ ጎዳ።

31 «ኢንቴ ታ ኣዛዘታ ናጊቴኔ ኦሊቴ፤ ታኒ ጎዳ።

32 ታ ጌሻ ሱንሳ ቱኒሶፒቴ፤ ታ ጌሻቴላ ኩሜላ ኢሰራኤሌ ኣሳይ ኤሪዲ ታና ቦንቾ፤ ኢንቴና ዲማሲዳይ ታና ጎዳ።

33 ኢንቴ ጸሳ ጊዳናሰ ኢንቴና ጊብጼ ቢታፌ ኬሲዳይ ታና፤ ታኒ ጎዳ ኢንቴ ጸሳ።»

23

ኣይሁዳቲ ቦንቹዛ ባኣሌ

1 ጎዳይ ሙሴ ሂዘጊዳሰ፥

2 «ኢሰራኤሌ ኣሳሰ ዲማ ሸቆ ጊ ኣዋጂዲ ኢንቴ ቦንቻናሰ ቤሲዛ ዶሬቲዳ ባኣሌቲ ሃይሳፌ ካሊ ዲዛይታ፤

ሳምባታ

3 «ኢንቴ ኢንቴሰ ኦላናሰ ኡሱፑን ጋላሳቲ ዴቴሰ፤ ላፑንሳ ጋላሳይ ጊዲኮ ኢንቴሰ ሸምፒዛ ሳምባታ ጋላሳ፤ ሄ ጋላሰ ኢንቴ ጸሳ ጎይናናሰ ሸቂቲ ኣቲን ኣይ ኦሶካ ኦሶፍቴ፤ ኢንቴ ዲዛሶ ኡባን ሄሲ ኢንቴ ጸሳ ቦንቻና ሳምባታ ጋላሳ።

ፓዚጋ ባኣሌኔ ኡኬላ ባኣሌ

(ታይ 28:16-25)

4 «ኢሰታሰ ዋጂዳ ዋዴን ጌሻ ሸቆ ኦሊ ኣዋጂዲ ኢንቴ ቦንቻናሰ ቤሲዛ ጎዳ ባኣሌቲ ሃይሳፌ ካሊዛይታ፤

5 ጎዳይ ኢዛን ቦንቹቲዛ ፓዚጋ ባኣሌይ ኮይሮ ኣገናይ ጌሊዳ ታማኔ ኦይዳንሶ ጋላሰ ኣርሼይ ዉሊን ጋዴይ ሌምኢ ሌምኢሺን ኦይኬቴሰ።

6 ሄ ኣገናዛን ታማኔ ኢቻሻንሶ ጋላሰ ኡኬላ ባኣሌይ ኦይኬቴሰ፤ ሄሳፌ ጉዬ ላፑን ጋላሰ ጋካናሰ ኢርሾይ ጌሎንታ ኡኬላ ሚቴ።

7 ሄ ጋላሳታፔ ኮይሮ ጋላስ ጸሳ ጎይናናሰ ሸቂቲ፤ ሄ ጋላስ ኢንቲ ኦሶ ኦሶፍቲ።

8 ላፑን ጋላስ ጋካናሰ ጸጌቲዛ ያርሾ ጎዳሰ ሸሸቲ፤ ኢንቲ ኦሶ ኢጊዲ ላፑንፋ ጋላስ ጎዳ ጎይናናሰ ሸቂቲ።»

ካፋ ጸራ ባኣሌ ጋላስ

9 ጎዳይ ሙሴ ሂዝጊዳሰ፡

10 «ኢሰራኤሌ ኣሳሰ ታኒ ኢንቲሰ ኢሚዛ ቢታ ጌሊዲ ኢንቲ ካላ ሸሸዛ ዋዴ ካፋ ጸራ ቄሴኮ ኤሂቲ።

11 ጎዳ ሲንፋን ኢንቲ ሸሸዛይሲ ኤኬታና ማላ ቄሴዚ ቃሴ ካፋ ጸራ ኤኪዲ ያኔ ሃ ቃሊዛ ያርሾ ሂሰቲ ጸሳሰ ሸሸ፤ ቄሴዚ ሄ ጸራ ካፋ ያኔ ሃ ቃሊዛ ያርሾ ሂሰቲ ሸሻናሰ ቤሲዛይ ሳምባታ ጋላሳፌ ዋንቲፋ ጋላስ ጊዶ።

12 ኢንቲ ሄ ያርሾ ሸሸዛ ጋላስ ኢዛ ቦላ ቦሬይ ባይንዳ ኢሲ ላይላ ጳርሾ ላቃ ጸጌቲዛ ያርሾ ኦሊዲ ኢሲ ቦላ ጸሳሰ ሸሸቲ።

13 ኢዛራ ኢሲፌ ዋጋራ ሚላ ዛይቲን ሙኑቂቲዳ ናምኡ ከሎ ጊዲዛ ሊቆ ጳሌ ካፋ ያርሾ ሂሰቲ ሸሸቲ፤ ሂሲካ ኢዛ ሳዎይ ጎዳ ኡፋይሲዛ ጸጌቲዛ ያርሾ ጊዳና፤ ኢዛራ ኢሲፌ ኢሲ ሊቲሮ ጊዲዛ ዋይኔ ኡሹ አምታ ሸሸቲ።

14 ኢንቲ ሄይታ ጎዳሰ አማናፔ ኮይሮ ጋኪዳ ካፋ ኣይፌ ቃዬ ጊዲን ዋይኮ ሻሽ ዋይኮ ኡኬላ ኡኪዲ ሞፒቲ፤ ሃይሳ ሃ ዋጋዛ ኢንቲ ዲዛሶ ኡባን ጉዬፔ ያና ኢንቲ ዬሌታሰ ኤቂ ዲዛ ሜርና ዋጋ ጊዶ።

ካፋ ሸሸ ባኣሌ

(ታይ 28:26-31)

15 «ኢንቲ ጎዳሰ ያኔ ሃ ቃሊዛ ሸሸዛ ያርሾ ያርሺዳ ሳምባታ ጋላሳ ዋንቲፋፌ ዶሚዲ ላፑን ሳምባታ ቆዲቲ፤

16 ላፑንፋ ሳምባታፔ ጉዬ ኢቻሽ ታማንላ ጋላስ ቃሴካ ሃራ ኦራፋ ካፋ ያርሾ ጎዳሰ ሸሸቲ።

17 ናምኡ ከሎ ጊዲዛ ሊቆ ጳሌ ኢንቲ ሶፔ ኢርሾን ሙኑቂቲ ኡኬቲዳ ናምኡ ኡኬላ ያኔ ሃ ቃሊዛ ያርሾ ሂሰቲ ኤኪ ዪቲ፤ ሂሲካ ኦራላ ሸቂዛ ካፋ ጊሻሰ ጸሳሰ ሸቂዛ ካፋ ያርሾ ጊዶ።

18 ሄ ኡኬላራካ ኢሲፌ ኢሰታ ቦላ ዋሶይ ባይንዳ ኢሲ ላይላ ጊዲዛ ላፑን ጳርሾ ላቃታ ኢሲ ኮርማ ቦራራ ናምኡ

ቆርሾታ ሺሺቲ፤ ካላ ያርሾዛራኔ ወይኔ ኡሻ ያርሾዛራ ኢሲፊ ጎዳሰ ጽጌቲዛ ያርሾኔ ሳዎ ቱኑ ጊዛ ያርሾ ሂሰቲ ሺሺቲ።

19 ቃሴካ ናጋራ ጊሻሰ ሺቁዛ ያርሾሰ ኢሲ ዴይሻ ኦርጌ፥ ኢሲፊቴላ ያርሾሰ ኢሲ ላይላ ቆርሾ ላቃ ናሞኣታ ያርሾሰ ሺሺቲ።

20 ቄሴይ ኡኩላ ናሞኡ ላቃታራ ያኔ ሃ ቃሴሊዲ ጎዳሰ ዴማ ያርሾ ሂሰቲ ሺሾ፤ ሄሲካ ቄሴታ ጊሻ ጊዶ፤ ሄይቲ ሄ ኢሞታቲ ሃራፔ ዴማ ኢሞታ።

21 ሄ ጋላሰ ኣዋጃ ኣዋጃዲ ጎዳ ጎይናናሰ ኢሲ ቦላ ሸቂቲ ኣቲን ሃራ ኦሶ ኦሶፍቲ፤ ሃይሲ ኢንቲ ዲዛሶ ኡባን ኢንቲፊ ጉዬራ ዪዛ ዬሌታሰ ሜርናሰ ኤቂ ዲዛ ዎጋ ጊዶ።

22 ኢንቲ ኢንቲ ቢታን ካላ ሸሺዛ ዎዴ ቆሳ ቦላ ዲዛ ካላ ማጽፒቲ፤ ማጽሺን ጉዬን ኣቲዳይሳ ማጽናሰ ጉዬ ሰሞፍቲ፤ ጉዬን ኣቲዳይሲ ማንቆታሲኔ ሃራ ቢታፊ ቤቲ ዪዳ ኣሳታሰ ኣቶ፤ ታኒ ጎዳ ኢንቲ ጸሳ።»

ዛዬይ ፑኔቲዛ ባኣሌ

(ታይ 29:1-6)

23 ጎዳይ ሙሴሰ ሂዝጊዴሰ፥

24 «ኢሰራኤሌ ኣሳሰ ላፑንላ ኣጊናይ ጌሊዳ ኮይሮ ጋላሳይ ኢንቲሰ ሸሞፖ ጋላሰ ጊዶ፤ ሄ ዎዴ ዛዬይ ፑኔቲሺን ኢንቲ ጎዳ ጎይናናሰ ሸቁዛ ዴማ ሸቆ ጊዶ።

25 ሄ ጋላሰ ጎዳሰ ታማን ጽጌቲዛ ካላ ያርሾ ሺሺቲ ኣቲን ሄ ጋላሰ ኣይኮካ ኦሶፍቲ።»

ናጋራ ወርሶ ጋላሰ

(ታይ 29:7-11)

26 ጎዳይ ሙሴሰ ሂዝጊዴሰ፥

27 «ላፑንላ ኣጊናይ ጌሊዳፔ ጉዬ ታማንላ ጋላሳይ ናጋራፔ ማሬቴላ ጋላሳ፤ ሄ ጋላሰ ኣይ ካሊካ ሞፒቲ፤ ጎዳ ጎይናናሰ ሸቂቲ፤ ጸሳሰ ታማን ጽጌቲዛ ያርሾ ሺሺቲ።

28 ሄ ጋላሳይ ጎዳ ኢንቲ ጸሳ ሲንላን ኣሳ ናጋራ ወርሶ ጋላሰ ጊዲዳ ጊሻሰ ሄ ጋላሰ ኣይኮካ ኦሶፍቲ።

29 ሄ ጋላሰ ባናቴላ ካወሺዲ ማሬቶንታ ኣይ ኣሲካ ዴራ ጊዶፊ ሻኬቲ ቆሮ።

30 ሄ ጋላሰ ኣይ ኦሶ ጊዲን ኦሊዛዴ ታኒ ኢዛ ኢዛ ዴራ ጊዶፊ ሻካ ቆይሳና፤

31 ሄሳ ገሻሰ ሄ ጋላስ አንቲ አይ ኦሶካ አላፍቲ፤ ሃይሲ ሃ ዋጋዚ አንቲ ዲዛሶ ኡባን አንቲፌ ጉዬ ያና አንቲ ዬሌታስ ኤቂ ዲዛ ማርና ዋጋ ገደ።

32 ሄ አገናይ ጌሊዳ ኡዱፋንሶ ጋላሳ ኦማርሳፌ ቢዲ ታማንሶ ጋላሳ ኦማርስ ጋካናስ አንቲናቲላ ካወሺዲ ሄ ጋላሳ ሳምባታ ሂስቲ ቦንቺቲ።»

ዳሴ ባኣሌ

(ታይ 29:12-40)

33 ጎዳይ ሙሴስ ሂዝጊዴስ፡

34 «ጎዳስ ዳሴ ባኣሌይ ላፑንላ አገናይ ጌሊዳ ታማኔ ኢቻሻንሶ ጋላሳፌ ዶሚዲ ላፑን ጋላስ ጋካናስ ቦንቺቶ።

35 ሄ ጋላሳታፔ ኮይሮ ጋላስ ጎዳ ጎይናናስ ሸቂቲ ኣቲን አይ ኦሶካ አላፍቲ።

36 ላፑን ጋላሳታን ኢሳን ኢሳን ጎዳስ ጸጌቲዛ ያርሾ ሸሸቲ፤ ኦስፑንላ ጋላስ ቃሴካ ጎዳ ጎይናናስ ሸቂቲ፤ ጎዳስ ጸጌቲዛ ካላ ያርሾ ያርሸቲ፤ ሄ ጋላሳይ አንቲ ሸቆዛ ወርሲዛ ጋላስ ጊዲዳ ገሻሰ ሄ ጋላስ አይኮካ አላፍቲ።

37 «አንቲ ታማን ጸጌቲዛ ያርሾኔ ካላ ያርሾ ቃሴ ሃራ ያርሾታ ኡባኔ ኡሻ ያርሾ ኮሺዛ ኬና ዋሊዳ ጋላሳን ጎዳስ ሸሻናስ አንቲ ጌሻ ሸቆ ኦሊዲ አዋጃናስ ቤሲዛ ጎዳስ ዶሬቲዳ ባኣሌቲ ሃይታንታ።

38 ሃይቲ ሃ ያርሾቲ ጎዳ ሳምባታ ጋላሳታን አንቲ ሸሸዛይታፔ ጸሳስ አሚዛ አምታታፔ ኣዲና ጋሊዛይታፔኔ አንቲ አንቲ ዶሳን ጮ አሚዛይታፔ ቦላራ ጉጂዲ አንቲ አሚዛ አምታታ።

39 «አንቲ ካላ ሸሸዳፔ ጉዬ ላፑንላ አገናይ ጌሊዳ ታማኔ ኢቻሻንሶ ጋላስ ኮይሮራ ሃይሳ ኡፋይሳ ባኣሌዛ ጎዳ ሲንላን ላፑን ጋላስ ጋካናስ ቦንቺቲ፤ ኮይሮ ጋላሲኔ ኦስፑንላ ጋላሳይ አንቲስ ዲማ ሸምፖ ጋላስ ገደ።

40 ሄ ኮይሮ ጋላስ አንቲ ቢታን ካጺዛ ሎኦ ሚላ ኣይፌፔ፤ ዛምባ ሃይላ፤ ጨሊላ ሚላ ሃጋኔ ሃሊናጌ* ሚላ ሃጋ ኦይኪዲ ጎዳ አንቲ ጸሳ ሲንላን ኡፋዬቲሼ ላፑን ጋላስ ጋካናስ ባኣሌ ኦሊቲ።

23:32 ሉዊ 16:29-34 23:36 ዛሬ 16:13-15 * 23:40 ሃሊናጌ፡ ሃሊናጌ ጊዛይሳ ኢሲ ኢሲ ባጋ ጋምሶ ቃላን ሃሊናጎ ጌቲቲስ።

41 ሃይሳካ ላይላን ላይላን ላፑንላ ኣገናን ላፑን ጋላስ ጋካናስ ጎዳ ሲንላን ቦንቲቲ፤ ሃይሲ ሃ ዋጋይ ኢንቴስ ና ና ጋካናስ ሜርና ዋጋ ጊዲ ቦንቲቲ።

42 ኩሜላ ኢስራኤል ዳሬይ ላፑን ጋላስ ጋካናስ ዳሴን ኡቶ።

43 ሃይሳካ ታኒ ኢስራኤል ናይታ ጊብጾ ቢታፌ ኬሲዳ ዋዴ ኢስቲ ዳሴን ኡታና ማላ ታ ኦሊዲይሳ ኢንቴፌ ጉዬ ዪዛ ዩሌታይ ኤራና። ታኒ ጎዳ ኢንቴ ጸሳ።»

44 ሙሴይ ሃይሳሶ ኦሊዲ ጎዳ ባኣሌታ ቦንቲዛ ዋጋ ኢስራኤል ኣሳ ኤሪሲዴስ።

24

ጸምፔታ ጊሻስ ናጌቴል

(ኬሳ 27:20-21)

1 ጎዳይ ሙሴስ ሂዝጊዴስ፡

2 «ዲንካኔዛን ፓጨይ ባይንዳ ፖኣና ማላ ኦላናስ ዋጋራ ሚላፌ ጉምኢ ጸሊሲ ኬሲዳ ዛይቲ ኢስራኤል ዳሬ ኣሳይ ኔስ ኤሃና ማላ ኣዛዛ።

3 ኣሮኔይ ኦማርስ ኦማርስ ጸምፔዛ ኦይሴሶ፤ ሄሲካ ጋይቶቴላ ዲንካኔዛ ጊዶን ዲዛ ጫቆ ቃላ ታቦታዛፔ ሲንላ ባጋራ ዲዛ ማጋላሻፔ ካሬ ባጋራ ጎዳ ሲንላን ጋዴይ ዋንታና ጋካናስ ፖኢሼ ኣቆ፤ ሃይሲ ሃ ዋጋዚ ሲንላፌ ያና ዩሌታስ ሜርና ዋጋ ጊዶ።

4 ኣሮኔይ ሄ ጸምፔታ ዋሊዛ ዋላካይ ባይንዳ ዋርቃፌ ኦሴቲዳ ባላዛ ቦላ ዲዛ ጸምፔቲ ፓጨይ ባይንዳ ጎዳ ሲንላን ፖኣና ማላ ናጎ።

ጸሳስ ሸቂዛ ካላ ያርሾ

5 «ታማኔ ናምኡ ኪሎ ጊዲዛ ሊቆ ጳሌ ኤካዳ ታማኔ ናምኡ ኡኬል ኡካ።

6 ኡኬላታፔ ኡሱፑናታ ቦላራ ዋላካይ ባይንዳ ዋርቃን ቲዬቲዳ ጸራጸዛ ቦላ ኢሲ ባጋራ ዋላ፤ ቃሴ ሃንኮ ኡሱፑናታ ሃንኮ ባጋራ ዲዛ ማዳ ቦላ ማራን ማራን ዋላ።

7 ጎዳስ ታማን ጸጌቲ ያርሼቲዛ ካላ ያርሾ ጊዲዳይሳ ቆፍሳናስ ሙሩታ ኤጳኔ ናምኡ ባጋራካ ዋላ።

8 ሃይሳ ሃ ኡኬላዛ ሳምባታን ሳምባታን ኡባ ዋዴ ኣሮኔይ ጎዳ ሲንላን ኢስራኤል ኣሳ ጊሻስ ዋሶ፤ ሃይሲ ኢስራኤል ኣሳይ ፓጨይ ባይንዳ ኦላና ማላ ቤሲዛ ጫቆ ቃላ።

9 ኡኩላይ ኣሮኔሲኔ ኢዛ ዘፊላታሰ ገሻ ጊደ፤ ኢሰቲ ኡኩላ ጎዳሰ ዲማቲዳሶን ማቶ፤ ሄሲካ ጎዳሰ ታማን ጽጌቲ ሸቂዛ ያርሾታፔ ኬሂ ዲማቲዳ ኣሮኔሲኔ ኢዛ ዘፊላታሰ ኢማቲዳ ገሻ ጊደ።»

ቆሆ ጋሶን ጋኪዛ ቂጻቲ

10 ኣዪ ባጋራ ኢሰራኤሌ፥ ኣዋ ባጋራ ጌብጹ ዳሬ ኣሰ ጊዲዳ ኢሳዴይ ዴሰ፤ ኢዚካ ኢሲ ጋላሰ ባ ዲዛ ሄራን ዲዛ ኢሲ ኢሰራኤሌ ኣሰ ጊዲዳሪራ ኦዩቲዴሰ።

11 ሄ ኣዩይ ባጋራ ኢሰራኤሌ ኣሰ ጊዲዳይሲ ኦዩቲሼ ጎዳ ሱንሉ ጫዪዴሰ፤ ሂሰቲን ኢዛዴ ሙሴኮ ኤሂዳ፤ ሄ ኣዴዛ ኣያ ዳኔ ባጋፊ ጊዲዳ ዲብራዬ ና ሻሎሚቶ ጌቲታዉሰ።

12 ኢሰቲ ኢዛ ቦላ ኣይ ቂጻቲ ዬጋናሰ ቤሲዛኮ ጎዳይ ኢሰታሰ ዮታና ጋካናሰ ኢዛ ቃሾ ኬላን ዩጊዳ።

13 ጎዳይ ሙሴስ ሂዘጊዴሰ።

14 «ሄ ኣዴዛ ኣሳይ ዲዛሶፔ ጌዴ ሃራሶ ኬሳ፤ ኢዚ ጸሳ ጫዪሺን ሲዪዳ ኡባይ ሄሳዴይ ሞሮ ኦሊዳይሳ ማርካታናሰ ኢሶይ ኢሶይ ባ ኩሼ ሄ ኣዴዛ ሁኤ ቦላ ዋዶ፤ ሃሳፊ ካሊዲ ኩሜላ ኢሰራኤሌ ዳሬይ ኢዛ ሹቻን ጫዲ ዋጵ።

15 ታና ጸሳ ጫዪዳ ኣይ ኣሲካ ሄሳሶካ ባ ቂጻቲ ኤኮ።

16 ጎዳ ጫዪዳ ኣይ ኣሰ ጊዲንካ ዳሬይ ኡባይ ኢዛ ሹቻን ጫዲ ዋጵ፤ ኢሰራኤሌ ኣሰ ጊዲን ዋይኮ ኢሰራኤሌ ዳሬ ጋርሳን ዲዛ ሃራ ዳሬ ኣሰ ጊዲን ጎዳ ጫዪዳይ ሹቻን ጫዴቲ ሃይቆ።

17 «ኣሴ ዋጵዳዴይ ኦኒካ ሃይቆን ቃጻዬቶ።

18 ኣሳ ሜሄ ዋጵዳዴይ ኢዛ ማላ ሜሄ ቃንጾ፤ ሄሲ ሄ ዋጋዚ ሼሞፖ ገሻሰ ሼሞፖ ቃንጺዛ ዋጋ።

19 «ኣይ ኣሲካ ሃራ ኣሳ ቦላ ቆሆ ጋሊኮ ኢዛዴይ ቆሆ ጋሊዳይሳ ማላ ቆሆይ ሄ ጋሊዳዴ ቦላ ጋኮ።

20 ሜቁሉ ሜንሊዳዴሰ ሜቁሊ ሜቆ፤ ኣይፊ ቶይሲዳዴሰ ኣይፊይ ቶኦ፤ ኣኙ ሜንሊዳዴሰ ኣቺ ሜቆ፤ ሃራ ኣሳ ቦላ ኣይ ቆሆካ ጋሊዳዴሰ ኢዚ ጋሊዳ ቆሆዛ ማላይ ኢዛ ቦላ ጋኮ።

21 ሜሄ ዋጵዳዴይ ሜሄ ቃንጾ፤ ኣሴ ዋጵዳዴይ ጊዲኮ ሃይቆን ቃጻዬቶ።

22 ሃይሲ ዋጋዚ ኢንቴሰ ኢሰራኤሌ ናይታሰ ጊዲን ዋይኮ ኢንቴ ጊዲን ዲዛ ሃራ ዳሬ ኣሳ ኡባሳ፤ ጋሶይካ ታኒ ጎዳ ኢንቴ ጸሳ።»

23 ሙሴይ ሄሳ ኡባ ዳሬዛስ ዮቲ ፖሊዳፔ ጉዬ ሄ ጸሳ ጫዪዳ አዳዛ አሲ ዲዛሶፔ ሃራሶ ኬሲዲ ሹቻራ ጫዲ ዋጂዳ፤ ሄሳሶካ ኢስራኤል አሳይ ጎዳይ ሙሴ አዛዚዳ ማላ ኦሊዳ።

25

ላፑንሳ ላይሳ ሼምፖ

(ዛሬ 15:1-15)

- 1 ጎዳይ ሲና ዙማ ቦላን ሙሴ ሂዝጊ አዛዚዳስ፤
- 2 «ኔ ኢስራኤል አሳስ፤ ታኒ ኢንቴስ ኢሚዛ ቢታ ኢንቴ ጌሊዛ ዋዴ ላፑንሳ ላፑንሳ ላይሳን ቢታ ጎዮንታ ሻቺ ሼምፒሶን ጸሳ ቦንቺቴ።
- 3 ኡሱፑን ላያሰ ኩሜሰ ጎዬቴኔ ዜሬቴ፤ ዋይኔ ሚላይ ሎኤሊ አይፋና ማላ ቂርጸቴ፤ አይፊካ ማጺ ሺሺቴ።
- 4 ጊዶ አቲን ላፑንሳ ላይሳይ ታስ ጸሳስ ዱማ ጊዲን ቢታይ ሼምፖ ዳሚዛ ላይሳ ጊዶ፤ ሄ ላይሳ ቢታ ጎዮፒቴ፤ ዋይኔ ሚላይካ አይፋና ማላ ቂርጸቴ።
- 5 ኢንቴ ዜሮንታ አዛባ ጫሪዳ ካላ ኢንቴስ ማጺ ሺሹፍቴ፤ ሄ ላይሳይ ቢታያ ሙሉራ ሼምፒዛ ላይሳ።
- 6 ሄ ላይሳ ኢዛ አይኮካ ጎዮንታ አጊኮካ ቢታያ ኢንቴስ ኢንቴ አይሌታሲኔ ኢንቴስ ሚሻራ ኦሊዛይታስ፤ ቃሴካ ሃራ ዳሬፔ ዪዲ ኢንቴናራ ዲዛ ሃራ ዬሌታታስ ሚዛዝ ጊዶ።
- 7 ኢንቴ ሜሄታሲኔ ኢንቴ ቢታ ቦላ ዲዛ ዶአታሳራ ሜቴቲዛዝ ቢታያ ኢማና፤ ሄ ኢዛ ኢሚዛይሲ ኡባይ ኢስታስ ሜቴቲዛዝ ጊዶ።

ዋዙ ላይሳ

- 8 « ላፑንቶ ላፑን ላይሳ ቆዳ፤ ሄ ላይሳታ ቆዳይ ኦይዱ ታማኔ ኡዱፋን ላይሳ ጊዳስ፤
- 9 ላፑንሶ አጊናይ ጌሊዳፔ ታማንሳ ጋላስ ቦንቺቲዛ ናጋራፔ ማሬቴሳ ጋላስ ኩሜሳ ቢታ ቦላ ዛዬ ዛያናዴ ዬዲቴ።
- 10 ሄሳሶካ ኢቻሽ ታማንሶ ላይሳ ዱማሲ ሻኪዲ ቢታይ ቦላ ዲዛይታስ ኡባስ ዋዜቴሰ አዋጂቴ፤ ሃይሳፌ ካሴ ባይዜቲዳ ጋዴይ ካሴ ባይዚዳዴስ ዋይኮ ኢዛዴ ቆሞስ ሲሞ፤ አይሌቴሳን ባይዜቲዳ አይሌይካ ካሴ ባ አሳኮ ሲሞ።

11 ሄ ላይሰ ጎሼ ጎዬዲ ዘሬሰ ዘርፒቲ፤ ዘሬሰ ዘርንታ ጮ ኣዛባ ካጺዳ ካል ዋይኮ ቂርጾቶንታ ኣይፊዳ ዋይኔ ሚላ ኣይፊ ማጺ ሺሾፍቲ።

12 ሄ ላይሳይ ኩሚሰ ኢንቲስ ዱማ ሻኬቲዳ ላይሰ ጊዶ፤ ካሴ ኢንቲ ዘርንታ ጮ ባርካ ካጺዳ ካል ጸላ ሚቲ።

13 « ነሃይሳፊ ካሴ ባይዘቲዳ ጋዴይ ኡባይ ሄ ዋዘ ላይሳን ጋዴዴስ ሲሞ።

14 ሄሳ ጊሻስ ኔ ኣሾ ጊዲዳ ኢሰራኤሌ ኣሳ ኔኒ ጋዴ ባይዚዳዝ ጊዲኮ ዋይኮ ኔ ሃ ኔስ ሻሚዳዝ ጊዲኮ ጌኔ ኦሶ ኦሶ።

15 ጋዴዛ ዋጋይ ሄሬጌታናስ ቤሲዛይ ሲንሳፊ ቢታይ ሲሚዛ ላይሳይ ጋካናፕ ካሴ ሄ ጋዴይ ኢማና ዳንዲዳዛ ካላ ቆፒ ሄሬጋናስ ቤሴስ።

16 ላይሳይ ዳር ጊዲኮ ሄሬጋይካ ዳር ጊዶ፤ ላይሳይ ጉል ጊዲኮ ሄሬጋይካ ጉል ጊዶ፤ ጋዴይ ባይዘቲዳ ዋጋይ ጋዴዚ ኢሚዛ ካላ ማላ ጊዶ።

17 ኢሲ ኢሰራኤሌ ኣሲ ሃራ ኢሰራኤሌ ኣስ ቆሆፖ፤ ኢንቲ ኢንቲ ጸሳስ ያዩቲ፤ ታኒ ጎዳ ኢንቲ ጸሳ።

ላፑንላ ላይሳን ያና ሜቶ

18 « (ኢንቲ ኢንቲ ቢታ ቦላ ሳርን ዴኣና ማላ ጸሳ ዋጋ ኡባ ቦንቺቲ።

19 ቢታያ ኢንቲስ ጊዳና ካል ኢማና፤ ኢንቲካ ኢዚፔ ካላና ጋካናስ ማና፤ ሳርቲላንካ ዴኣና።

20 « (ጊዶ ኣቲን ላፑንላ ላይሳን ጎሼ ጎዮንታኔ ካል ዘርንታ ማጸንታ ኣይ ማኔ?) ጊዲ ኦይቺዛ ኣሲ ዶንታ ኣጌና።

21 ኡሱፑንላ ላይሳታን ቢታዮ ኣንጃና፤ ሂሰቲኮ ኢዛ ኢንቲስ ሄዙ ላይሳስ ጊዳና ካል ኢማና።

22 ኦስፑንላ ላይሳንካ ጎሼ ጎዬሼ ኢንቲ ካሴ ሺሺዳ ካላ ማና፤ ሄሳ ሄ ካላ ኡዱፋንላ ላይሳን ቦኔ ካል ኢንቲ ሺሻና ጋካናስ ኢዛፔ ማና።

ባይዘቲዳ ኣቆታ ዋዘ

23 « (ጋዴይ ዋዜቶንታ ማላ ባይዛናስ ቤሴና፤ ጋሶይካ ቢታይ ታሳ ኣቲን ኢዛ ኢንቲስ ጊዲኩ፤ ኢንቲ ኢማላታኔ ቤቲ ኣሳታ ማላ።

24 « (ቢታይ ባይዘቲኮ ሄ ባይዚዳይ ሄ ቢታ ዛሪ ዋዛናይሲ ኤሬቲዳዝ ጊዶ።

25 ኢሰራኤሌ ኣሳፕ ኢሳዴይ ሜቶፔ ኣታናስ ባ ጋዴ ባይዚኮ ኢዛስ ማቲዛ ዳቦይ ሄ ባይዘቲዳ ጋዴ ዋዘ።

26 ኢዛስ ዋዚዛ ማታ ዳቦይ ደንታ ኣጊኮ ኢዛዴይ ጋምኢሼ ሚሼ ዴሚዲ ዛሪ ዋዛናስ ዳንዳዬስ።

27 ሄሳ ዋዛናስ ኢዚ ዳንዳይዛ ዋዴ ባ ባይዚዳ ዋዴዛፔ ደሚዲ ዲዛ ላይላ ቆዲዲ ኣቲዳ ላይላታ ሚሻ ሻሚዳዴስ ዛሮ፤ ሄሳፌ ጉዬ ካሴ ባ ጋዴዛ ዛሪ ኤኮ።

28 ቃሴካ ጋዴዛ ዋዛናስ ጊዲዛ ሚሼ ኢዛስ ደንታ ኣጊኮ ኢዚ ባይዚዳ ጋዴይ ዋዜቲዛ ላይላይ ጋካናስ ሻሚዳዴ ኩሼን ዴኣ፤ ዋዜቲዛ ላይላይ ጋኪሺን ጋዴይ ጋዳዴስ ሲሞ፤ ጋዳዴይካ ጌዴ ባ ጋዴን ሲሞ።

29 « ኢሲ ኣሲ ጊምቤይ ጊምቤቲዳ ካታማ ጊደን ዲዛ ኬል ባይዚዳ ጊዲኮ ኢዚ ባይዚዳፔ ኢሲ ላይላ ጋርሳን ዛሪ ዋዛናስ ዳንዳዬስ፤ ኢዚ ዛሪ ዋዛና ዳንዳይዛይ ኢሲ ላይላ ጋርሳን ጸላ።

30 ጊዲኮካ ኢሲ ላይላ ጋርሳን ዛሪ ዋዛናስ ዳንዳዮንታ ኣጊኮ ሃራ ዋዴ ዛሪ ዋዚሲዛ ዋጋይ ኢዛስ ዴና፤ ኬላይ ሻሚዳዴስ ዋይኮ ኢዛ ና ናስ ሃሮ ጊዲ ኣቴስ፤ ባይዜቲዳ ሚሻይ ዋዜቲዛ ላይላንካ ባይዚዳዴስ ኬላይ ሲሜና።

31 ጊምቤይ ጊምቤቶንታ ጮ ዴሬ ጋርሳን ዲዛ ኬላቲ ባይዜቲዳፔ ጉዬ ጎሻ ቢታ ማላ ቆዴቲዲ ኬላ ጎዳይ ዛሪ ዋዛናስ ዳንዳዬስ።

32 « ረገዶ ኣቲን ሌዌ ናይቲ ባስ ኢሜቲዳ ካታማታን ዲዛ ባ ኬላታ ባ ኮዪዳ ኣይ ዋዴካ ዋዛናስ ዳንዳዬቲስ።

33 ሃይቲ ካታማታን ኢሲ ሌዌ ቆሞይ ኬል ባይዚኮ ቃሴ ዛሪ ዋዛናስ ኢዚ ዳንዳዮንታ ኣጊኮ ባይዜቲዳ ሚሻ ዋዚ ላይላን ኢዛስ ሲሞ፤ ጋሶይካ ሌዌ ቆሞቲ ባ ካታማታን ኬጲዳ ኬላቲ ኢስራኤሌ ናይታ ጊደን ኣይ ዋዴ ጋካናስካ ኢስታሳ።

34 ቃሴካ ኢስቲ ካታማታ ዩሾን ዲዛ ሜሄይ ሄሜቲዛ ቢታይ ሙሌካ ባይዜቶሮ፤ ሄ ቢታይ ኣይ ዋዴካ ኢስታሳ።

ማንቆታስ ታልኤ ኢሞ ዋጋ

35 « ሩኅ ባጋ ኢስራኤሌ ኣሳፔ ኢሳዴይ ማንቂዲ ባና ኣይሳናስ ዳንዳዮንታዴ ጊዲኮ ኢማላ ጊዲዳ ዋይኮ ቤቴ ኣሲ ኔ ኣቻን ዳና ማላ ኔ ማዲዘይሳሶ ኢዛካ ማዳ።

36 ኔ ባጋ ጊዲዳ ኢስራኤሌ ኣሲ ኔናራ ዳና ማላ ኢዛፔ ዲቕ ሞፓ፤ ኔ ጸሳስ ያያ።

37 ኔ ኢዛስ ታልኤ ኢሚኮ ኢዛፔ ዲቕ ኦይቕፋ፤ ኔ ካል ኢዛስ ዋዴራ ባይዘፓ።

38 ነና ካናኔ ቢታ ላቲሳናስ ኔስ ጎዳ ጊዳናስ ጊብጼ ቢታፊ ኬሲዳ ጸሳይ ታና።

አይሌቴላፌ ዋዜቴላ

39 « ሳኔ ባጋ ጊዲዳ ኢስራኤል አሳፔ አሳዳይ ማንቆቴላፌ ዳንዲዳይሳን አይሌ ማላ ኔስ ሃሬታናስ ባና ባይዚኮ ኔ ኢዛ አይሌ ማላ ኦሲሶፓ።

40 ኔ ኢዛ ኔ ማታን ዲዛ አማላ ማላ ዋይኮ ሚሻስ ኦሊዛ ኦሳንቻ ማላ ቆዳ፤ ኢዚካ ኢቻሹ ታሙ ላይላ ጋካናስ ኔስ ኦሉ።

41 ሄሳፌ ጉዬ ባ ናይታራ ኔፔ ሻኬቲ ጌዴ ባሶ አሳኮኔ ባ ዲሳሶ ሲሞ።

42 ኢስራኤል አሳ ታ ጊብጼ ቢታፊ ኬሲዳ ታ ኦሳንቻታ ጊዲዳ ጊሻስ ኢስቲ አይሌ ማላ ባይዜቶፌቶ።

43 ኔ ኢስታ ዋልቃራ ሃርፓ፤ ኔ ጸሳስ ያያ።

44 « ሳኔስ አቱማኔ ማጫ አይሌቲ ዳኣና ማላ ኮይኮ ኔ ዩሾን ዲዛ አይዛቤታ ጊዶፌ ሻማ ኤካ።

45 ቃሴካ ኢንቲ ቢታን ዲዛ ቤቲ አሳታፔኔ ኢንቲ ቢታን ዬሌቲዳ አሳታፔ ሻማናስ ዳንዳዬታ፤ ኢስቲ ኢንቲስ ሃር ጊዴቶ።

46 ሄይታን ኢንቲ ኢንቲ ናይታ ላቲሳናስ ዳንዳዬታ፤ ኢስቲ ዴኢዛ ላይላ ኡባን ኢንቲ ናይታስ ኦሊዛይታ ጊዳና፤ ኢንቲ ቆሞ ጊዲዳ ኢስራኤል አስ ዋልቃራ ሃርፔ፤።

47 « ሳኔቲ ጊዶን ዲዛ ሃራ ዳሬ አሳፔ አሳዳይ ዲሬ ጊዲኮ ኢንቲ ባጋ ጊዲዳ ኢስራኤል ናይታፔ ማንቆ ጊዲዳይ ባና ሃራ ዳሬ ዱሬስ ዋይኮ ኢዛሶ አሳፔ አሳዳስ ባና አይሌቴላስ ኦሊ ኢሚኮ።

48 ኢዚ ባይዜቲዳፔ ጉዬ ሲሚዲ ናሞኣንሉ ዋዜታናስ ዳንዳዬስ፤ ሄሳ ጊሻስ ኢዛ ኢሻታፔ አሳዳይ ኢዛ ዋዜ።

49 ኢዛ አዋ ኢሻይ ዋይኮ ኢዛ አዋ ኢሻ ናይ ዋይኮ ኢዛስ ማታ ዳቦታፔ አሳዳይ ኢዛ ዛሪ ዋዛናስ ዳንዳዬስ፤ ኢዛዳይ ባስ ጊዲዛ ሚሹ ሺሺዳ ጊዲኮ ባ ሚሻራ ዋዜታናስ ዳንዳዬስ።

50 ኢዚ ባና ሃሪዳዳራ ኢሲፌ ጊዲዲ ኢዚ ባና ባርካ ባይዚዳ ላይላፌ ዶሚዲ ዋዜቴላ ላይላ ጋካናስ ዲዛ ላይላ ቆዳ፤ ኢዛ ዋዚሲዛ ሚሻይ ሄ ላይላታ ቆዳ ጊዶ፤ ኢዚ ባና ሃሪዛይሳራ ጋሞኢዳ ዋዴ ዋጋይ ኢሲ ኦሲ ኦሊዲ ዳሚዛ ከራ ሚሻ ኬና ጊዶ።

51 ዋዜ ላይላይ ጋካናስ ቡር ዳር ላይላቲ አቲዳ ጊዲኮ ባ ባይዜቲዳ ዋጋፔ ሄ አቲዳ ላይላ ቆዳን ባና ዋዚዛ ዋጋ ቃንጾ።

⁵² ሄ አቲዳ ላይላቲ ጉል ጊዲኮ ባ ሃሬቲን አቲዳ ላይላ ቆዲዲ ባና ዋዚዛ ዋጋ ቃንጾ።

⁵³ ኢዚ ላይላፌ ላይላ ጋካናሰ ኡኔ * ኦሊዛ አሳ ማላ ባና ሃሪዳዴራ ዳኦፔ አቲን ኢዛ ዋልቃራ ሃራናሰ ቤሴና።

⁵⁴ « ሩሃሳ ሃኒዲ ዋዜታናሰ ዳንዳዮንታ አጊኮ ሲንላፌ ያና አይሌቴላፌ ዋዜቲዛ ላይላን ኢዚኔ ኢዛ ናይቲ ሜላ ዬዴቲቶ።

⁵⁵ ኢሰራኤል አሳይ ታሰ አይሌታኔ ታኒ ጊብጾ ቢታፊ ኬሲዳ ታ ኦሳንቻታ፤ ታኒ ጎዳ አንቲ ጸሳ።

26

አዛዜቴላን ቤቲዛ አንጆ

(ዛሬ 7:12-24፤ 28:1-14)

¹ « ለአንቲ ኢዛሰ ጎይናና ማላ አንቲሰ አይኮካ ኤቃ ሜጶፍቴ፤ ሂሳላካ ሚሰሌ ዋይኮ ሃወልቲ ዋይኮ ሹቻፌ ማሴቲ ኬዚዳ ቱሰ ኤሶፍቴ፤ ታኒ ጎዳ አንቲ ጸሳ።

² « ሳሞባታ ጋላሳታ ናጊቲ፤ ታ ኬላ ቦንቺቲ፤ ታኒ ጎዳ።

³ « ለአንቲ ታ ዋጋን ዲኮኔ ታ አዛዘታካ ናጊኮ።

⁴ ታኒ አንቲሰ ኢራ ዋዴራ ቡኪሳና፤ ቢታያካ ካል ዳርሳ አማና፤ አይፌ አሚዛ ሚላቲካ ዳርሲ አይፋና።

⁵ አንቲ ካላይ ኬሂ ዳር ጊዲዳ ጊሻሰ አንቲ ቡሮ ሺሾ ቦላ ዲሺሽ ዋይኔ ሚላ አይፌ ቃንጾዚ ዋዴይ ጋካና፤ አንቲ ዋይኔ ሚላ አይፌ ቃንጾዲ ሺሺ ወርሶንታ ዲሺን ካል ዜሪዛ ዋዴይ ጋካና፤ አንቲ ካል ካሊ ማና፤ አንቲ ቢታንካ ሳሮቴላን ዳና።

⁶ « ለአንቲ ቢታሰ ሳሮቴል አማና፤ ኦናሰካ ባቦንታ አንቲ ዋፑ ጊ አቃና፤ ኢታ ዶኢታ አንቲ ዴሬፔ ታ ዲጋና፤ ሃይሳፌ ጉዬ አንቲ ዴሬን ኦላይ ዳና።

⁷ አንቲ አንቲ ዋርኬታ ጎዳና፤ ኢሰቲካ አንቲ ሲንላን ማሻን ሃይቃና።

⁸ አንቲፌ ኢቻሽ ኣሲ ጾቱ ኣሰ፡ ጾታይ ቃሴ 10,000 ኣሰ ጎዳና፤ አንቲ ዋርኬይ አንቲ ሲንላን ማሻን ወራና።

⁹ « (ታኒ ታ ሲንል አንቲኮ ዛራና፤ ሂሰታዳ አንቲና ዳርሳና፤ ታ አንቲሰ ጌሊዳ ጫቆ ቃላ ናጋና።

* 25:53 ኡኔ ኡኔ ጊዛይሳ ኪራ ጊ ጎኤታና ዳንዳዬቲሰ። 26:1 ኬሳ 20:4፤

ሉዊ 19:4፤ ዛሬ 5:8፤ 16:21-22፤ 27:1 26:5 ዛሬ 11:13-15፤ 28:1-14

10 ካላይ አንቲስ ላይላፌ ላይላ ጋላና፤ ሃሳፌ ዴንዲዲሳን ኦራላ ጋኪዳ ካላ ገልላናስ ዚላይላ ካላፌ አቲዲሳ ሃራሶ ኬሴታ።

11 ታኒ አንቲ ጊዶን ዴያና፤ ታ አንቲና ሻቲቲኬ።

12 ታኒ ኡባ ዋዴ አንቲ ጊዶን ሲሜሬታና፤ ታኒ አንቲ ጾስ ጊዳና፤ አንቲካ ታ ዴሬታ ጊዳና።

13 አንቲ አይሌቴላን ሃሬቶንታ ማላ ጊብጼ ቢታፌ አንቲና ኬሲዲይ ታኒ ጎዳ አንቲ ጾሳ፤ ታኒ አንቲ አይሌቴላ ቃምባራ ሜንላዳ አንቲ ጶቁ ጊዲ ባና ማላ ኦላዲስ።

አዛዜቶንታ ኢጾይ ጋሊዛ ሜቶ

(ዛሬ 28:15-28)

14 « ረዶ አቲን አንቲ ታ ጊዛዝ ሲዮንታ ኢጲኮ ሃ አዛዞታ ኡባ ኦሶንታ ኣጊኮ።

15 ታ ዋጋኒ ታ አዛዞታ አንቲ ካጲዛ ጊዲኮ ታ አንቲናራ ጫቂቲዳ ጫቆዛ አንቲ ላሊኮ።

16 ሄ ዋዴ ታኒ አንቲ ቦላ ሃይሳ ኤሃና፤ ጊታ ዳጋማ፣ ጊልቃቴላ፣ አይፌ ቦልጄሲዛዝ፣ አሳቴላ ጊልቂሲዛዝ ቆጾ ሃርጌ ታ አንቲ ቦላ ኤሃና፤ አንቲ ዜሬላ ዜራናሺን ጮ ሜላ ሃዳ ጊዳና፤ ጋሶይካ አንቲ ዜሪዲይሳ አንቲ ሞርኬቲ ማና።

17 ታኒ አንቲ ቦላ ሃንቆን ዴንዲዛ ጊሻስ አንቲ ጸኔታና፤ አንቲ ኢጲዛ አንቲ ሞርኬቲ አንቲና ሃራና፤ ኦኒካ አንቲና ጎዶንታ አንቲ አንቲርካ ባቃታና።

18 « ሂሲ ወሪካ አንቲ ቦላ ጋኪዳፔ ጉዬካ አንቲ ታስ አዛዜቶንታ ኢጲኮ ታ አንቲ ቦላ ዬጋና ቂጻቴዛ ላፑን ኩሼ ዳርሳና።

19 አንቲ ኦቶሮቴላ ዋልቃ ታ ሜንላና፤ አንቲፌ ቦላራ ሳሎዛ ቢራታ ማላ ኦላና፤ አንቲ ቢታካ ጸርቂማላላ ኦላና።

20 አንቲ ዋልቃይ ጮ ሃዳ ዉራና፤ ጋሶይካ አንቲ ቢታይ ካላ ኢሜና፤ ሚላቲካ አይፌቴና።

21 « ሃኢካ አንቲ ታስ ኢጲስ ጊዲ አዛዜቶንታ ኣጊኮ ታኒ አንቲ ቦላ አንቲ ናጋራ ኬና ቂጻቴዛ ላፑን ኩሼ ዳርሳና።

22 ኢታ ዶኣታ ታ አንቲ ጊዶ ዬዳና፤ ሄ ዶኣቲ አንቲ ናይታ ዋጳና፤ አንቲ ሚዛታካ ኡባ ጳይሳና፤ አንቲፌ ጉላ አሳቲ ጸላ አታና፤ ካሴ አንቲ ሄሜቲዛ ኦጌይ ሳማና።

23 « ሃይሲ ሃ ቂጻቴዚ አንቲ ቦላ ጋኪዳፔ ጉዬካ አንቲ ታ ጊዛይሳ ሲዮንታ ኢጲዲ ታ ቦላ አንቲ ኤቄቴላ ዳርሲኮ።

24 ሄ ዋዴ ታኒካ እንቴሰ ሞርኬ ጊዳና፤ እንቴ ናጋራ ጊሻሰ ታ እንቴና ላፑን ዳኮ ቃጸያና።

25 እንቴ ታናራ ጫቂዳ ቃላ ላሊዳ ጊሻሰ ታ እንቴና ቃጸያናሰ እንቴ ቦላ ኦላ ዬዳና፤ እንቴ እንቴ ካታማታን ሺቂዛ ዋዴ ታ እንቴ ጊዳን ኢታ ሃርጌ ኪታና፤ እንቴ ሞርኬታሰ እንቴ ኣጲ እምታና።

26 እንቴ ካላ ታኒ ጳይሲዛ ዋዴ ታሙ ማጫሳቲ ዉሪ ኢሲ ባሽን ኡካና፤ ኢዞካ ማካ ሚሻን ጌዳሪ ጌዳሪ ኡካና፤ እንቴካ ሚዲ ካሌኬታ።

27 « ነይሲ ኡባይ እንቴ ቦላ ጋኪን እንቴ ታሰ ኣዛዜቶንታ ኢጲዲ ታ ቦላ ማካሊ ማካሊ ቢኮ።

28 ታ እንቴ ቦላ ሃንቆን ዴንዳና፤ እንቴ ናጋራ ጊሻሰ ታ እንቴና ላፑን ዳኮ ቃጸያና።

29 እንቴ ኮሻ ዳርፔ ዴንዲዳይሳን እንቴ ናይታ ኣሾ ማና።

30 ቋቃሶሆን ዲዛ እንቴ ጎይኒዛ ኤቃ ጸሳታ ታኒ ጳይሳና፤ እንቴ ኤጸኔ ያርሾ ኢዛን ሺሺዛሶዛ ታ ላላና፤ እንቴ ኣሃ እንቴ ኤቃታ ቦላ ታ ዬጋና፤ ታ ሸምፒያ እንቴና ሻቲታና።

31 ታ እንቴ ካታማታ ላላና፤ እንቴ ጎይኒዛሶታ ታ ካይሰ ሂሰታና፤ ሳዋዛ እንቴ ያርሾዛ ታ ኤኪኬ።

32 እንቴ ቢታ ሙሌራ ታ ጳይሳና፤ ሄን ዲዛ እንቴ ሞርኬቲ ማላሌታና ጋካናሰ ቢታዮ ታ ኣሲ ባይንዳሶ ሂሰታና።

33 ታ እንቴ ቦላ ኦላ ኤሃዳ እንቴና ኣይዛቤታ ጊዳን ላላና፤ ታኒ ታ ማሻ ኬሳዳ እንቴና ጎዳና፤ እንቴ ካዋቴላይ ኣሲ ባይንዳ ቢታ ጊዳና፤ እንቴ ካታማቲካ ላሌታና።

34 እንቴ እንቴ ሞርኬታ ቢታን ዲዛ ዋዴ እንቴ ቢታይ ካይሰ ጊዲዛ ጊሻሰ ሸምፖ ዴማዳ ሳምባታ ላይላታን ኡፋይታና።

35 እንቴ ቢታያ ካሴ እንቴ ኢዚን ዲሺን ሳምባታ ዴሞንታራ ኣሳይ ጳይዳ ዋዴ ኢዛ ሸምፖ ዴማና።

36 « ሱንቴ ቤቲ ቢታን ዲዛይቲ ዉሪካ ጫርኮይ ቃሊዛ ቆናሽ ጊሪሰ ሲዬዲ ዳጋማን ፒራጲ ባቃታና ማላ ታ ኦላና፤ ሞርኬይ ኦላሶን ጎዲን ዋጺዛ ማላ እንቴ ዋጸና፤ ኣይ ሞርኬይካ እንቴ ኣቻን ባይንዳ እንቴ ጱጴቲ ኩንዳና።

37 ኦኒካ እንቴና ጎዲንታ እንቴ እንቴርካ ኢሶይ ኢሳራ ቃጸቲ ኩንዳና፤ እንቴ እንቴ ሞርኬታራ ኤቂቲ ኦሌታናሰ ዳንዳይኬታ።

38 እንቴ ቤቲ ቢዲ ሄ ዴሬን ሃይቃና፤ እንቴ እንቴ ሞርኬታ ካዋቴላን ሚቴቲ ኣታና።

39 እንቴ ሞርኬታ ዴሬን ሃይቆንታ ኣቲዳይቲ ቃሴ እንቴ ናጋራኒኔ ካሴ እንቴ ኣዋታ ናጋራ ጊዳን ሄን ጊልቂ ኣታና።

40 « ረዳ ኣቲን ኢንቲ ታሰ ኣማኔቶንታ ኣጊዳይሳኔ ታ ቦላ ማካሊዳ ኢንቲ ናጋራኔ ኢንቲ ኣዋታ ናጋራ ኢንቲ ፓጺኮ፤

41 ታኒ ኢንቲሰ ሞርኬ ጊዳዳ ኢንቲና ጌዳ ኢንቲ ሞርኬታ ቢታ ዬዳና ማላ ታና ኦሲሲዳ ኢንቲ ናጋራ ኢንቲ ፓጺኮ ሙሚዳ ኢንቲ ዋዚና ኢንቲ ካወሺዲ ኢንቲ ናጋራፔ ኢንቲ ሲሚኮ፤

42 ኣብራሃሚራ፤ ዩሳቃራኔ ያቆቤራ ታ ጫቂዳ ጫቆ ቃላ ቆፓና፤ ቢታዮካ ታ ቆፓና።

43 ኢሰቲ ዬጊ ቢዳ ጊሻሰ ቢታያ ኣሲ ባይንዳ ባዞ ጊዳዱሰ፤ ሄ ዋዴ ኢዚን ኣሲ ባይንዳ ባዞ ጊዳዳ ባ ሳሞባታ ኡፋይሳን ቦንቻና፤ ኢሰቲ ታ ዋጋኔ ታ ኣዛዞዛ ካወሺዳ ጊሻሰ ኢሰቲ ኦሌዳ ናጋራ ጊሻሰ ቃጸዬታና።

44 ጊዲኮካ ኢሰቲ ባ ሞርኬታ ዴሬን ዲዛ ዋዴ ኢሰታ ሙሌራ ጳይሲኬ ጋዳ ታ ጫቂዳ ቃላ ማቤኬ፤ ታ ኢንቲና ኣጋጊኬ፤ ታ ኢንቲና ሃራሴቲኬ፤ ታኒ ጎዳ ኢንቲ ጸሳ።

45 ታኒ ኢሰታ ጸሳ ጊዳና ጋዳ ኣይዛቤ ኣሳይ ቤዪሺን ጊብጾ ቢታፌ ኬሲዳ ኢሰታ ኣዋታራ ጫቂዳ ጫቆዛ ታ ቆፓና፤ ታኒ ጎዳ ጌሰ።»

46 ኢሰራኤሌ ዴራሰ ዮታና ማላ ሙሴይ ሲና ዙማ ቦላ ዲሺን ጸሲ ኢዛሰ ኢሚዳ ዋጋቲ፤ ማራቲኔ ኣዛዞቲ ሃይታንታ።

27

ኢሞታታ ጊሻሰ ዋዲዳ ዋጋ

1 ጎዳይ ሙሴሰ ሂዝጊዴሰ፤

2 «ኢሰራኤሌ ኣሳሰ፤ ሳይ ኣሲካ ጎዳሰ ኣሰ ኢማናሰ ኣዲኔቲን ሄ ኣዲናይ ፖሌቲኮ ሄ ኢማና ጊ ኣዲኔቲዳይሳ ዋዛናሰ ኣዲና ዋጋይ፤

3 ሄሳዴ ላይላይ ናሞኡ ታማፌ ቢዲ ኡሱፑን ታሙ ኩሚዳ ኣቱማ ኣሰ ጊዲኮ ጎዳ ኬላን ኤሬቲዳ ሜዛኔን ሜዛኔቲዲ ኢቻሽ ታሙ ጊዲዛ ሳቂሌ * ቢራ ቃንጾ።

4 ማጫ ጊዲኮ ሄዡ ታሙ ሳቂሌ ቢራ ጊዶ፤

5 ቃሴካ ኢቻሽ ላይላፌ ቢዲ ናሞኡ ታሙ ላይላ ጋካናሰ ዲዛ ኣቱማ ና ጊዲኮ ናሞኡ ታሙ ሳቂሌ ቢራ፤ ማጫ ና ጊዲኮ ታሙ ሳቂሌ ቢራ ቃንጾ፤

26:42 ሜዴ 17:7-8፤ 26:3-4፤ 28:13-14

*

27:3 ሳቂሌ፡ ኢሲ ሳቂሌይ ታማኔ ኢሲኖኔ ባጋ ጊራሜ ቢራ ኦይኬሰ።

6 ኢሲ አገናፔ ቢዲ ኢቻሽ ላይላ ጋካናሰ ዲዛ አቱማ ና ጊዲኮ ኢቻሽ ሳቂሌ ቢራ ቃንጾ፤ ሄ ላይላታ ጊደን ዲዛ ማጫ ናሰ ጊዲኮ ሄቹ ሳቂሌ ቢራ ቃንጾ።

7 ሄሳሶካ ላይላይ ኡሱፑን ታማፌ ቦላራ ዲዛ አቱማ አሰ ጊዲኮ ታማኔ ኢቻሽ ሳቂሌ ቢራ፤ ማጫ ጊዲኮ ታሙ ሳቂሌ ቢራ ቃንጾ።

8 አዲና አዲኔቲዳዴይ ሃይሳ ሃ ሄሬጌቶይሳ ቃንጾናሰ ዳንዳዮንታ ኬሂ ማንቆ ጊዲኮ ኢዚ ባ አማና ጊ አዲኒዳይሳ ቄሴዛ ሲንላ ኤኪ ዮ፤ ቄሴዚካ አዲኔቲዳዴ ዴሊ ቤኢዲ ኢዛዴ ዋልቃ ኬና ሄሬሳ።

9 « ሳዲና አዲኔቲዳይሲ ጸሳሰ ያርሻናሰ ቤሲዛ ማሄ ጊዲኮ ሄሳ ማላ ማሄይ ጸሳሰ ዳማ ጊዲዳ ጊሻሰ ዋዜቴና።

10 አዲና አዲኔቲዳዴይ ባ አዲኔቲዳ ማሄዛ ሃራ ማሄን ላሞፎ፤ ጊዳ አቲን ኢታዛካ ሎኦ ማሄን ላሚዛ ጊዲኮ ኢዚ ካሴ ኤሆይሳራ ናሞኣይካ ጸሳሰ ዳማቲዳይታ ጊዴቶ።

11 ኢዛዴይ አሚዛይሲ ጸሳሰ ያርሼታናሰ ቤሶንታ ማሄ ጊዲኮ ሄ ማሄዛ ኤሂዳዴይ ማሄዛ ቄሴኮ ኤሆ።

12 ቄሴዚ ሄ ማሄዛ ኢታቴላኔ ኢዛ ሎኤቴላ ጫዲ ዴሊዲ ኢዚ ኬሳና ዋጋ ዮቶ፤ ሄ ኢዚ ጊዳ ዋጋይ ኢዚ ጊዳ ማላ ሃና።

13 ሄ ማሄዛ ጎዳይ ማሄዛ ዛሪ ሚሻራ ሻማና ኮይኮ ሄ ማሄዛ ዋጋ ቦላ ጴታፔ ናሞኡ ታሙ ኩሼ ጉጂዲ ሻሞ።

14 « ሳሳዴይ ባ ኬላ ጎዳሰ ዳማ አሞታ አሚኮ ቄሴታ ሃላቃይ ኬላይ ኢታኮኔ ሎኦኮ ኢዛ ሃናቴላ ጫዲ ዴሊ ሄሬጊዲ ዋጋ ዮቶ፤ ሄ ቄሴዚ ሄሬጊዳ ዋጋይ ኬላሰ ሄሬጋ ጊዳ።

15 ካሴ ኬላ ጎዳይ ሄ ኬላ ዛሪ ዋዛና ኮይኮ ሄሬጌቲዳ ዋጋ ጴታፔ ናሞኡ ታሙ ኩሼ ቦላራ ጉጂዲ ኬላ ባሰ ኤኮ።

16 « ሳሳዴይ ባ ጋዴፔ ሻኪ ጎዳሰ ዳማ አሞታ አሚኮ ቢታይ አሚዛ ካላ ማላ ሄሬጌቶ፤ ሄሲካ ኢሲ ኪሎ ባንጋ ጊሻሰ ኢቻሽ ታሙ ሳቂሌ ቢራይ ቃንጾቶ።

17 ጋዴዛ ጎዳይ ካሴ ጋዴዛ አሚዳይ ዋዛ ላይላ ባኣሌፔ ጉዬ ጊዲኮ ጋዴሰ ካሴ ዋዲዳ ዋጋይ ላማቴና።

18 ኢዛዴይ ጋዳ አሚዳይ ኢቻሽ ታማንላ ላይላፌ ጉዬ ጊዲኮ ቄሴዚ ሄሬጋናይ ዪዛ ኢቻሽ ታማንላ ላይላ ጋካናሰ ዲዛ አቲዳ ላይላ ቆዲዲ ሄሬጎ፤ ሚሻፌ አሺ ጨጎ።

19 ጋዴዛ አሚዳዴይ ዛሪ ዋዛና ኮይኮ ካሴ ጋዴዚ ሄሬጌቲዳ ዋጋ ቦላ ጴታፔ ናሞኡ ኩሼ ጉጂዲ ዛሪ ዋዛ።

20 ካሴ ጋዴይ ባ ጋዳ ጸሳፌ ሚሻን ዋዛናፔ ሲንላን ሃራ አሳስ ባይዚዳ ጊዲኮ ቃሴ ሄ ጋዴዛ ናምኣንሶ ዛሪ ዋዛና ዋጋይ ኢዛስ ዴና።

21 ዋዛ ላይላን ጋዴይ ሲሚዛ ዋዴ ሄ ጋዴዚ ጊዲኮ ጎዳስ ዱማቲዲ ቄሴታ ላታ ጋዴ ጊዲ አቶ።

22 « ሲሳዴይ ሃራ አሳፔ ሻሚ ኤኪዳ ጋዴ ጸሳስ አማና ኮይኮ።

23 ካሊ ዪዛ ዋዛ ላይላ ጋካናስ ጋዴዚ ኬሳና ዋጋ ቄሴዚ ሄሬጎ፤ ሄ ጋላስ ሄ ሄሬጌቲዳ ሚሽ ጋዴዴይ ቃንጾ፤ ሄ ሚሻይካ ጸሳ አሶስ ዱማቲዳዝ ጊዳና።

24 ዋዛ ላይላ ባኣሌይ ጋኪዛ ዋዴ ሄ ጋዴዛ ኮይሮ ላታን ኤኪዲ ባይዚዳዴስ ጋዴዚ ሲሞ።

25 ሄ ሄሬጋዛ ዋጋይ ጎዳ ኬላን ኤሬቲዳ ሜዛኔን ሜዛኔቲዲ ናምኡ ታሙ ሳቂሌ ጊዶ።

26 « ሐይሮ ባይሮ ዬሌቲዳ ሜሄይ ኢዚ ካሴካ ጎዳስ ጊዲዳ ጊሻስ ኦኒካ ኢዛ ጸሳስ ሚላ ኪያቴላ አማናስ ዳንዳዬና፤ ጋሎ ማር ጊዲን ዋይኮ ዶርሳኔ ዴይሻ ላቃቲ ካሴቲዲ ጸሳስ ዱማቲዳይታ።

27 ኢዛ ቦላ ዋሶይ ዲዛ ሜሄኔ ያርሾ ሺሻናስ ቤሶንታ ሜሄ ጊዲኮ ሄ ሜሄዛ ጎዳይ ኢዛ ሄሬጌቲዳ ዋጋ ቦላ ጴታፔ ናምኡ ታሙ ኩሼ ጉጂዲ ዛሪ ዋዚ ኤካናስ ዳንዳዬሰ፤ ኢዛ ጎዳይ ዋዚ ኤካናስ ኮዮንታ ኢጲኮ ሄ ሄሬጌቲዳ ዋጋን ሃራ አሳስ ባይዜቶ።

28 « ሲሳዴይ ባ ጎዳስ ባስ ዲዛይሳፌ አስ ጊዲን ዋይኮ ሜሄ፤ ጊዲን ዋይኮ ጋዴ ጊዲን ኩሜላራ ዱማ ሻኪዳፔ ጉዬ ሙሌካ ባይዛናሲኔ ዛሪ ዋዛናስ ቤሴና።

29 « ሲሳ ጊዶፌ ሻኬቲዲ ዴያና ማላ ፒርዴቲዳዴይ ዋዜቶፎ፤ ኢዛዴይ ሃይቃናስ ቤሴስ።

30 « ሲታፌ ሞኪዛ ካላ ጊዲን ዋይኮ ሚላ ኣይፌ ጊዲን ታማፌ ኢሶይ ጸሳስ ዱማቲዳ ኣስራታ።

31 ሄሳፌ አዋይሳካ ባስ ዋዚ ኤካናስ ኮይዛዴይ ሄ ሚሻይ ባይዜቲዛ ዋጋስ ጴታፔ ናምኡ ታሙ ኩሼ ጉጂዲ ሻማናስ ዳንዳዬሰ።

32 ሶ ሜሄታፔ ታማፌ ኢሳይ ጸሳ ጊሻ፤ ሜሄይ ታይቤቲሺን ታማንላይ ታማንላይ ጎዳስ ዱማ ሻኬቲዳዛ።

33 ታማንላ ሜሄይ ኢታ ጊዲን ዋይኮ ሎኦ ጊዲን ዶርፖ፤ ዋይኮ ሃራራ ላሞፎ፤ ላሚዛ ጊዲኮ ኮይሮይሴኔ ላሚ አሜቲዳይሳራ ናምኣይካ ጎዳስ ዱማቲዳዝ ጊዴቴስ ኣቲን ዛሪ ዋዛናስ ዳንዳዬና) ጋ ዮታ።»

³⁴ ሲና ዙማ ቦላ ጎዳይ ሙሴ ባጋራ ኢስራኤል አሳ አዛዚዳ አዛዞቲ ሃይታጎታ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 19 Dec 2025 from source files dated 3 May 2025

d0ee6825-f93e-584e-8c8f-567d8d068e4b